

新唐書

冊五



唐書卷七十八

宋 端 明 殿 學 士 宋 祁 撰

列傳第三

宗室

太祖八子長延伯次真次世祖皇帝次璋次繪次禕次蔚次亮

南陽公延伯蚤薨無嗣高祖武德中與六王同追封

譙王真從太祖戰歿無嗣

畢王璋仕周爲梁州刺史與趙王祐謀殺隋文帝不克死生二子曰韶曰孝基  
韶死隋世武德時追封東平王生子道宗

江夏郡王道宗字承範高祖卽位授左千牛備身略陽郡公裴寂與劉武周戰  
度索原寂敗賊逼河東道宗年十七從秦王討賊王登玉壁城以望謂道宗曰  
賊怙衆欲戰爾計謂何對曰武周席勝剡然鋒未可當正宜以計摧之且烏合  
之衆憚持久若堅壁以頓其銳須食盡氣老可不戰禽也王曰而意與我合旣

而賊糧匱夜引去追戰滅之出爲靈州總管時梁師都弟洛仁連突厥兵數萬傳于壘道宗閉城守伺隙出戰破之高祖謂裴寂曰昔魏任城王彰有卻敵功道宗似之因封任城王始突厥郁射設入居五原道宗逐出之震耀威武斥地贏千里貞觀元年召拜鴻臚卿遷大理太宗方經略突厥復授靈州都督三年爲大同道行軍總管助李靖破虜親執頡利可汗賜封六百戶還爲刑部尙書吐谷渾寇邊靖出崑丘道詔與侯君集爲靖副賊聞兵且至走嶂山數千里諸將欲止獨道宗請速追靖曰善君集未從道宗以單師進去大軍十日及之吐谷渾拒險殊死鬪道宗陰引千騎超山乘其後賊驚遂大潰徙封江夏授鄂州刺史久之坐貪贓帝聞怒曰朕提四海之富士馬若林如使轍跡環天下游觀不度采絕域之玩海表之珍顧不得邪特以勞民自樂不爲也人心無藝當以誼制之今道宗已王稟賜多而貪不止顧不鄙哉乃免官削封戶以王就第明年召爲茂州都督未行拜晉州刺史遷禮部尙書侯君集破高昌還頗怨望道宗嘗從容奏言君集智小言大且爲戎首帝問所以知必反者對曰見其忌而

矜功恥爲房李下官尙書常鬱鬱不平帝曰君集誠有功材無不堪朕寧惜爵位邪第未及耳不宜輕億度使自猜危旣君集反帝笑曰如公素揣帝將討高麗先遣營州都督張儉輕騎度遼窺形勢儉畏不敢深入道宗請以百騎往帝許之約其還曰臣請二十日行留十日覽觀山川得還見天子因秣馬東兵旁南山入賊地相易險度營陣便處將還會高麗兵斷其路更走間道謁帝如期帝曰實育之勇何以過賜金五十斤絹千匹乃詔與李勣爲前鋒濟遼拔蓋牟城會賊救至道宗與總管張君乂領騎裁四千虜十倍皆欲浚溝保險須帝至道宗曰賊遽來其兵必疲我一鼓摧之固矣昔耿弇不以賊遺君父吾爲前軍當清道迎乘輿尙何待勣善之選壯騎數十突進賊營左右出入勣合擊大破之帝至咨美賜奴婢四十口乃築拒闔攻安市城闔毀傅城道宗失部分反爲賊據帝斬其果毅傅伏愛道宗跣行請罪帝曰漢武帝殺王恢不如秦穆公赦孟明遂置不問在陣傷足帝親加砭治賜御膳還以疾辭劇就閑改太常卿高宗永徽初房遺愛以反誅長孫無忌褚遂良與道宗有宿怨誣與遺愛善流象

州道病薨年五十四無忌等得罪詔復爵邑道宗晚好學接士大夫不倨于貴國初宗室唯道宗孝恭爲最賢子景恆封盧國公相州刺史道宗弟道興武德初爵廣寧郡王以屬疏降封縣公貞觀九年爲交州都督以南方瘴癘恐不得年頗忽忽憂悵卒于官贈交州都督

永安壯王孝基武德初得王歷陝州總管鴻臚卿以罪奪官二年劉武周寇太原夏人呂崇茂以縣應賊詔孝基爲行軍總管攻之工部尙書獨孤懷恩內史侍郎唐儉陝州總管于筠隸焉筠請急攻城絕外援且當有變時懷恩挾異計給說孝基曰夏城堅攻之引日宋金剛在近內拒外疆一敗塗地不如頓兵待秦王破賊則夏自孤此謂不戰而屈人也孝基謂然會尉遲敬德至與崇茂夾虜官師遂大敗孝基及筠等皆執於賊謀亡歸爲賊所害高祖爲發哀優賜其家晉陽平購尸不獲招魂以葬贈左衛大將軍及謚無子以兄子道立嗣封高平王後降封縣公終陳州刺史曾孫涵

涵簡素忠謹爲宗室傳累授贊善大夫郭子儀表爲關內鹽池判官肅宗至平

涼未知所從朔方留後杜鴻漸等條土馬倉廩使涵奉牋馳謁肅宗涵既見敷  
奏明辯肅宗悅除左司員外郎再遷宗正少卿寶應初河朔平涵方母喪奪哀  
持節宣慰所至州縣非公事未嘗言蔬飯水飲席地以暝使還固請終制代宗  
見其癯毀許之服除擢給事中遷兵部侍郎朱希彩殺李懷仙復宣慰河北還  
爲浙西觀察使居五歲入朝拜御史大夫京畿觀察使德宗嗣位以涵和易無  
所繩舉除太子少傅山陵副使以父諱徙光祿卿未幾遷左散騎常侍以尙書  
右僕射致仕累封襄武縣公卒贈太子太保子觸貞元初爲饒州別駕妾高以  
善歌入宮觸因御醫許泳通書坐誅

雍王繪爲隋夏州總管子贄追爵河南王生道玄

淮陽壯王道玄性謹厚習技擊然進止都雅武德初例王年十五從秦王擊宋  
金剛於介州先登王壯之賞予良厚討王世充戰多寶建德屯虎牢王輕騎致  
賊遣道玄伏以待賊至走之轉戰汜水登南坂貫賊陣出其背復引還賊皆靡  
所發命中王喜以副騎給之每赴敵飛矢著身如蝟氣益厲東都平爲洛州總

管府廢更授刺史俄爲山東道行軍總管討劉黑闥以多見褻黑闥再亂道玄率史萬寶戰下博越濔馳約萬寶繼進萬寶素少之不肯前曰吾被詔以王兒子名大將而軍進退實在我今其輕鬪若大軍竭馳必陷濔莫如以王啗賊我結陣待之雖不利王而利國也道玄遂戰歿年十九萬寶爲賊所乘舉軍潰身獨免太宗追悼曰自兵興兒常從我每見我深入輒克故慕之惜其少遠圖不究哀哉因流涕贈左驍衛大將軍及諡無子以弟道明嗣王遷左驍衛大將軍貞觀十四年與武衛將軍慕容寶節送弘化公主於吐谷渾坐漏言主非帝女奪王終鄆州刺史六世孫漢

漢字南紀少事韓愈通古學屬辭雄蔚爲人剛略類愈愈愛重以子妻之擢進士第遷累左拾遺敬宗侈宮室舶賈獻沈香亭材帝受之漢諫曰以沈香爲亭何異瑤臺瓊室乎是時王政謬僻漢言切多所救補坐婬訐出佐興元幕府文宗立召爲屯田員外郎史館修撰論次憲宗實錄書宰相李吉甫事不假借子德裕惡之會李宗閔當國擢知制誥稍進御史中丞吏部侍郎初德裕貶袁州



漢助爲排擠後德裕復輔政漢坐宗閔黨出爲汾州刺史宗閔再逐改州司馬  
詔有司不二十年不得用然不數歲徙絳州長史遂不復振大中時召拜宗正  
少卿卒始漢爲中丞表孔溫業爲御史及漢晚見召溫業已爲中丞每燕集人  
以爲榮

郇王禧爲隋上儀同三司生子叔良德良幼良長平肅王叔良武德初例王鎮  
涇州捍薛仁果仁杲內史令翟長孫以衆降於是大饑米斗千錢叔良不恤士  
損糧以漁利下皆怨仁杲知之陽言食盡去遣高墪人詭降叔良遣驃騎劉感  
受之未至城三烽發仁杲兵自南原譟而還大戰百里細川感爲賊執叔良懼  
悉出金勞軍委事於長孫乃克安久之突厥入寇詔叔良率五將軍擊之中流  
矢道薨贈左翊衛大將軍靈州總管子孝協嗣

孝協始王范陽俄降爲郇國公魏州刺史麟德中坐賊抵死司宗卿隴西王博  
又等爲言於高宗求貸帝不許遂自殺弟孝斌爲原州都督府長史生子思訓  
爲江都令武后多殺宗室思訓棄官去中宗復位以耆舊擢宗正卿封隴西郡

公歷益州都督府長史開元初進彭國公加戶滿四百進右武衛大將軍卒贈秦州都督陪葬橋陵思訓善畫世所謂李將軍山水者弟思誨爲揚州參軍事子林甫自有傳

新興郡王德良少以疾不任職薨贈涼州都督孫晉先天中爲雍州長史治有名襲王坐豫太平公主謀被誅改氏厲晉就刑僚吏犇解唯司功參軍李撝從王如宅日晉死哭其尸盡哀姚元崇歎曰樂向儔邪擢爲尙書郎

長樂郡王幼良資暴急高祖數曉勒不悛有盜其馬者輒殺之帝怒曰盜信有罪王而專殺可乎詔禮部尙書李綱召宗室卽朝堂杖之百乃釋去爲涼州都督嘯不逞爲左右市里苦之太宗立或告王陰養士交境外詔中書令宇文士及往代并按狀士及繩之急左右恐欲劫王由間道趨長安自明不卽北奔突厥士及露劾帝復遣侍御史孫伏伽鞠視無異辭遂賜死六世孫回別傳

蔡烈王蔚爲周朔州總管生子安哲

西平懷王安仕隋爲右領軍大將軍封趙公武德時例王生子琛孝恭瑛瓌

襄武郡王琛字仲寶木訥少文隋義寧初封襄武郡公與太常卿鄭元璫持女  
伎聘突厥始畢可汗約和親始畢禮之贈遺蕃渥遣骨吐祿特勒隨琛入獻授  
刑部侍郎武德初始王歷利蒲絳三州總管宋金剛陷滄州稽胡多叛詔琛鎮  
隰州政寬簡爲夷夏愛便薨子儉襲王例降爲公

河間元王孝恭少沈敏有識量高祖已定京師詔拜山南招慰大使徇巴蜀下  
三十餘州進擊朱粲破之俘其衆諸將曰粲徒食人摯賊也請阬之孝恭曰不  
然今列城皆吾寇若獲之則殺後渠有降者乎悉縱之繇是騰檄所至輒下明  
年拜信州總管承制得拜假當是時蕭銑據江陵孝恭數進策圖銑帝嘉納進  
王趙郡以信州爲夔州乃大治舟艦肄水戰會李靖使江南孝恭倚其謀遂圖  
江陵盡召巴蜀首領子弟收用之外示引擢而內實質也俄進荆湘道總管統  
水陸十二軍發夷陵破銑二鎮縱戰艦放江中諸將曰得舟當濟吾用棄之反  
資賊奈何孝恭曰銑之境南際嶺左薄洞庭地險士衆若城未拔而援至我且  
有內外憂舟雖多何所用之今銑瀕江鎮戍見艦刼蔽江下必謂銑已敗不卽

進兵覘候往返以引救期則吾旣拔江陵矣已而救兵到巴陵見船疑不進銑  
內外阻絕遂降帝悅遷荊州大總管詔圖破銑狀以進孝恭治荆爲置屯田立  
銅冶百姓利之遷襄州道行臺左僕射時嶺表未平乃分遣使者綏輯安慰其  
款附者四十有九州朝廷號令暢南海矣未幾輔公柝反寇壽陽詔孝恭爲行  
軍元帥討之引兵趨九江李靖李勣黃君漢張鎮州盧祖尚皆稟節度將發大  
饗士楮水變爲血坐皆失色孝恭自如徐曰禍福無基唯所召爾顧我不負於  
物無重諸君憂公柝禍惡貫盈今仗威靈以問罪楮中血乃賊臣授首之祥乎  
盡飲罷衆心爲安公柝將馮惠亮等拒嶮邀戰孝恭堅壁不出遣奇兵絕饜道  
賊饑夜薄營孝恭臥不動明日使羸兵扣賊壘挑之祖尚選精騎陣以待俄而  
兵卻賊追北且囂遇祖尚軍薄戰遂大敗惠亮退保梁山孝恭乘勝破其別鎮  
賊赴水死者數千計公柝窮棄丹陽走騎窮追生禽之江南平璽書褒美賜甲  
第一區女樂二部奴婢七百口寶玩不貲進授東南道行臺左僕射行臺廢更  
爲揚州大都督孝恭再破巨賊北自淮東包江度嶺而南盡統之欲以威重夸

遠俗乃築第石頭城陳廬傲自衛或誣其反召還頗爲憲司鐫詰旣無狀赦爲  
宗正卿賜實封千二百戶歷涼州都督晉州刺史貞觀初爲禮部尙書改王河  
間性奢豪後房歌舞伎百餘然寬恕退讓無矜伐色太宗用是親重之宗室莫  
比也嘗謂人曰吾所居頗壯麗非吾心也當別營一區令粗足充事而已吾歿  
後子也才易以守不才不爲它人所利十四年中欽暴薨年五十帝哭之慟贈  
司空揚州都督及諡陪葬獻陵始隋亡盜賊徧天下皆太宗身自討定謀臣騎  
帥並隸麾下無特將專勳者惟孝恭獨有方面功以自見云子崇義晦崇義嗣  
王降封譙國公歷蒲同二州刺史益州都督府長史有威名終宗正卿晦乾封  
中爲營州都督以治狀聞璽書勞賜遷右金吾將軍檢校雍州長史摧擢姦伏  
無留隱吏下畏之高宗將幸洛詔晦居守謂曰關中事一以屬公然法令牽制  
不可以成政法令外苟可以利人者行之毋須以聞故晦治有異績武后時遷  
秋官尙書卒贈幽州都督初晦第起觀閣下臨肆區其人候晦曰庶人不及以  
禮然室家之私不願外窺今將辭公晦驚遽毀徹之子榮奉吳王恪祀

濟北郡王瑒武德中爲尚書左丞例王終始州刺史

漢陽郡王瓌始爲郡公進王高祖使持幣遺突厥頡利可汗言和親事頡利始見瓌倨甚瓌開說示以厚幣乃大喜改容加禮因遣使隨入獻名馬後復聘頡利謂其下曰前瓌來悔不少屈之當使拜我瓌伺知之旣見頡利卽長揖頡利怒留不遣瓌意象自若不爲屈虜知不可劫卒以禮遣遷左武侯將軍代孝恭爲荊州都督政務清靜嶺外酋豪數相攻瓌遣使諭威德皆如約不敢亂後例爲公長史馮長命者嘗爲御史大夫素貴事多專決瓌怒杖之坐免起爲宜州刺史散騎常侍薨

濟南郡王哲爲隋柱國備身將軍追王子瑗

廬江郡王瑗字德圭武德時例王累遷山南東道行臺右僕射與河間王孝恭合討蕭銑無功更爲幽州都督瑗素懦朝廷恐不任職乃以右領軍將軍王君廓輔行君廓故盜也其勇絕人瑗倚之許結婚寄心腹時隱太子有陰謀厚結瑗太子死太宗令通事舍人崔敦禮召瑗瑗懼有變君廓內險賊欲以計陷瑗

而取己功卽謂瑗曰事變未可知大王國懿親受命守邊擁兵十萬而從一使者召乎且趙郡王前已屬吏今太子齊王又復爾大王勢能自保邪因泣瑗信之曰以命累公乃囚敦禮勒兵召北燕州刺史王銑與計事兵曹參軍王利涉說瑗曰王今無詔擅發兵則反矣當須權結衆心若諸刺史召之不至將何以全瑗曰奈何對曰山東豪傑嘗爲竇建德所用今失職與編戶夷此其思亂若旱之望雨王能發使使悉復舊職隨在所募兵有不從得輒誅之則河北之地可呼吸而有然後遣王銑外連突厥絲太原南趨蒲絳大王整駕西入關兩軍合勢不旬月天下定矣瑗從之以內外兵悉付君廓利涉以君廓多翻覆請以兵屬誅瑗猶豫君廓密知之馳斬誅首詢于軍曰李瑗與王銑反錮敕使擅追兵今誅已斬獨瑗在無能爲也諸君從之且族滅助我者富貴可得衆曰願討賊乃出敦禮于獄瑗聞之率左右數百被甲出君廓呼曰瑗詩亂諸君皆註誤若何從之以取夷戮衆反走瑗罵君廓曰小人賣我行自及卽禽瑗縊之傳首京師廢爲庶人絕屬籍

鄭孝王亮仕隋爲海州刺史追王生子神通神符

淮安靖王神通少輕俠隋大業末在長安會高祖兵與吏逮捕亡命入鄂南山與豪英史萬寶裴勣柳崇禮等舉兵應太原約司竹賊帥何潘仁連和進與平陽公主兵合徇鄂下之自署關中道行軍總管以萬寶爲副勣爲長史崇禮爲司馬令狐德棻爲記室從平京師爲宗正卿典兵宿衛王永康郡俄徙淮安武德初拜山東安撫大使黃門侍郎崔幹副之進擊宇文化及于魏化及敗走聊城神通追北賊糧盡願降神通不肯受幹請納之神通曰師久暴露今賊食盡克不旦暮正當破之以玉帛酬戰力若降吾何所藉手幹曰竇建德俛至而化及未平我轉側兩賊間勢必危王又貪其玉帛敗不日神通怒囚幹軍中會士及自濟北魏軍化及復振神通進兵薄其壘貝州刺史趙君德先登板堞神通忌其功止軍不進君德怒詬而還城復堅神通遣兵走魏州取攻具爲莘人所乘引却後二日建德拔聊城勢遂張山東州縣靡然歸之神通麾下多亡乃退保黎陽依李世勣俄爲建德所虜後與同安公主自賊歸及建德滅復授河北



行臺左僕射從平劉黑闥遷左武衛大將軍薨贈司空神通十一子得王者七  
人道彥孝譽孝同孝慈孝友孝節孝義皆降王孝逸爵公孝銳不得封有子齊  
物顯

膠東郡王道彥幼孝謹初神通避吏于郢被疾山谷間累旬食盡道彥羸服丐  
人間或採野實以進神通未食不敢先卽有所分辭以飽乃藏弃以待高祖初  
封義興郡公例得王貞觀初爲相州都督徙岷州以父喪解荷土就墳躬蒔松  
柏偃廬柴毀雖親友不復識太宗嗟歎敕侍中王珪臨諭服除復拜岷州都督  
間遣入党項諭國威靈區落降從李靖擊吐谷渾詔道彥爲赤水道總管帝厚  
以利啖党項使爲鄉導其酋拓拔赤辭詣靖自言隋擊吐谷渾我資其軍而隋  
無信反見仇剽今將軍若無它我願資糧將復如隋乎諸將與歃血遣之道彥  
至闊水見無備因掠其牛羊諸羌怨卽引兵障野狐峽道彥不得進爲赤辭所  
乘軍大敗死者數萬退保松州詔滅死謫戍邊久之召爲嬌州都督卒贈禮部  
尙書初武德五年同封者孝登爲高密王孝同淄川王孝慈廣平王孝友河間

王孝節清河王孝義膠西王於是唐始興務廣支蕃鎮天下故從昆弟子凡勝衣以上皆爵郡王太宗卽位舉屬籍問大臣曰盡王宗子於天下可乎封德彝曰漢所封惟帝子若親昆弟其屬遠非大功不王如周郇滕漢賈澤尙不得茹土所以別親疏也先朝一切封之爵命崇而力役多以天下爲私奉非所以示至公帝曰朕君天下以安百姓不容勞百姓以養己之親於是疏屬王者皆降爲公唯嘗有功者不降故道彥等並降封公

孝逸少好學頗屬文始封梁郡公高宗時四遷益州大都督府長史武后擅國入爲左衛將軍親遇之徐敬業稱兵以孝逸爲左玉鈐衛大將軍揚州行軍大總管帥師南討至淮而敬業已攻潤州遣弟敬猷壁淮陰僞將韋超據都梁山以拒孝逸超衆憑險完屯孝逸會諸將議曰賊今負山攻則士無所用力騎不得騁寇救死傷夷必衆不如偏旅綴之全軍趨揚州勢不數日可破支度使薛克構曰超雖據險然兵少若置小敵不擊無以示威拔衆以守則戰有闕捨之則後憂不如擊之若克超淮陰自震淮陰破楚諸縣開門候官軍矣由是以趨

江都逆首可取孝逸從之登山急擊超殺數百人薄暝解超夜走進擊敬猷淮陰破之敬業回軍下阿溪孝逸引兵直度敬業大敗遂拔揚州以功進鎮軍大將軍徙封吳國公威名稜然武承嗣等忌之以讒下遷施州刺史又使人騰惡語聞上武后信之以嘗有功貸死流儋州薨景雲初贈金州大都督孝同曾孫國貞

國貞父廣業爲劍州長史國貞剛鯁有利才乾元中由長安令遷河南尹史思明寇東都李光弼壁河陽國貞率官吏西走陝數月召爲京兆尹上元初拜劍南節度使召爲殿中監以戶部尚書持節朔方鎮西北庭興平陳鄭節度行營兵馬及河中節度都統處置使治于絳尋加晉絳慈隰沁等州觀察處置使既至糧乏而所儲陳腐民貧不忍遽斂上書以聞而軍中讜謗突將王振乘衆怨給曰具畚鍤以待役事衆皆怒夜燒牙門左右奔告請避之國貞曰吾被命爲將其可棄城乎固請乃逃獄中振引衆劫取之置食其前曰食是而役其力可乎國貞曰與爾等方討賊何事役爲正緣儲食腐儉已請諸朝吾何所負衆服

其言且引去振曰都統不死吾曹殆矣遂害之并殺其二子及三大將有詔以郭子儀代之國貞清白善用法世稱辦吏然峻於操下故其衆思得子儀而振因肆其惡及子儀至振自謂且見德子儀怒曰汝臨賊境而害主將賊若乘虛是無絳矣又欲爲功乎卽斬以徇詔贈國貞揚州大都督子綰自有傳

孝節曾孫暲少孤事母孝始爲枝江丞荊州長史張柬之曰帝宗千里駒吾得其人累擢衛尉少卿居母喪柴瘠訖除家人未嘗見言笑與兄昇弟暲相友開元初爲汝州刺史政嚴簡有治稱昆弟繇東都候之輒羸服往州人無知者其清慎舉如此四遷至黃門侍郎檢校太原以北諸軍節度使太原俗爲浮屠法者死不葬以尸棄郊飼鳥獸號其地曰黃阬有狗數百頭習食齧頗爲人患吏不敢禁暲至遣捕羣狗殺之申厲禁條約不再犯遂革其風二十一年以工部尙書持節使吐蕃旣還金城公主請明疆場表石赤嶺上盟遂堅定還以奉使稱指再遷吏部暲美風儀以莊重稱當時有宰相望累爲太子少傅武都縣伯卒贈益州大都督暲至太僕少卿暲子進亦知名好從當世賢士游賙人之急

累擢給事中至德初從廣平王東征以工部侍郎署雍王元帥府行軍司馬爲回紇鞭之幾死遷兵部卒贈禮部尚書

孝節四世孫說字巖甫父遇及天寶時爲御史中丞東畿採訪使說以蔭補率府兵曹參軍馬燧節度太原辟署少尹遷汾州刺史李自良代燧復奏爲少尹大將張瑤得士心嘗請告未許而自良卒說與監軍王定遠祕其喪前給瑤告以毛朝陽代之然後告喪詔以通王爲節度大使授說行軍司馬節度留後定遠自以有勞於說頗橫恣請別賜印監軍有印自定遠始於是擅補吏易置諸將彭令茵者以久勞不服定遠怒殺之埋馬屎中其家請尸不許舉軍怨說上其事德宗以奉天扈從功恕死免官詔未至定遠謀刺說說走而免定遠召諸將出笥中詔書給曰詔以李景略知留後召說還公等皆有除諸將欲拜大將馬良輔呼曰妄言也不可受定遠懼走乾陽樓召麾下皆不至自投下死說盡斬同謀者乃安擢說檢校禮部尚書節度使累封隴西縣男說精于職築天成軍邊備積完晚被疾不能事軍幾亂卒贈尚書右僕射

齊物字道用天寶初擢累陝州刺史開砥柱通漕路發重石下得古鐵戟若鐔然銘曰平陸上之詔因以名縣遷河南尹坐與李適之善貶竟陵太守還遷京兆尹太子太傅兼宗正卿卒贈太子太師性苛察少恩喜發人私然潔廉自喜吏無敢欺者忿陝尉裴冕械而折愧之及冕當國除齊物太子賓客世善冕能損怨云子復

復字初陽以蔭仕累爲江陵司錄參軍衛伯玉才之表江陵令遷少尹歷饒蘇二州刺史李希烈叛荆南節度使張伯儀數爲賊窘朝廷以復在江陵得士心卽母喪奪爲少尹充行軍司馬佐伯儀會伯儀罷改容州刺史兼本管招討使先是西原亂吏獲反者沒爲奴婢長役之復至使訪親戚一皆原縱在容三年人賴以安轉嶺南節度使時安南經略使高正平張應繼卒其佐李元度胡懷義等因阻兵齊州縣肆爲姦賊復至誘懷義杖死流元度南裔肅然教民作陶瓦鑄諭蠻獠收瓊州置都督府以綏定其人召拜宗正卿歷華州刺史貞元十年鄭滑節度使李融卒軍亂以復檢校兵部尙書代融節度復下令墾營田以

稟其軍而賦不及民衆悅加檢校尙書右僕射卒年五十九贈司空諡曰昭復更方鎮所在稱治然頗嗜財爲世所譏從父若水爲左金吾大將軍兼通事舍人容貌瓌偉在朝三十年多識舊儀每宣勞揖贊進止閑華有可觀者

襄邑恭王神符字神符少孤事兄謹高祖與兵神符留長安爲衛文昇所囚京師平封安吉郡公帝受禪例王遷并州總管頡利可汗盜邊神符與戰汾東斬級五百獲馬二千又戰沙河獲乙利達官得可汗所乘馬及鎧召爲大府卿遷揚州大都督自丹陽度江治隋江都故郡揚人利之然少威嚴不爲下所畏累擢宗正卿以足不良改光祿大夫歸第月給羊酒太宗就第慰問又令乘小輿入紫微殿三衛挾輿以升遷開府儀同三司永徽二年薨年七十三贈司空荊州都督陪葬獻陵子七人並爵郡王例降公惟德懋文暕知名德懋官少府監臨川郡公五世孫從晦文暕幽州都督魏國公垂拱中坐累貶藤州別駕誅子挺捷襲封挺曾孫程捷曾孫石別傳從晦祖模仕至德中爲猗氏令史思明陷洛陽賊帥掠諸縣模率衆拒平之稍遷黔中觀察使終太子賓客贈太子太

保謚曰敬從晦寶曆初及進士第擢累太常博士甘露之禍御史中丞李孝本被誅從晦以族昆弟貶朗州司戶參軍改澶王府諮議分司東都忌者重發前坐下遷亳州司馬久乃轉吏部郎中兼侍御史知雜事出爲常州刺史鎮海軍節度使李琢表其政賜金紫歷京兆尹工部侍郎山南西道節度使又以最就進銀青光祿大夫卒年六十三贈吏部尚書從晦姿質偉岸所至以風力聞少與崔龜從李景讓裴休善獎目後進名知人楊收方布衣進謁從晦一見如雅識卽待以公輔後果宰相

世祖四子長曰澄次湛次洪次高祖神堯皇帝

梁王澄蚤薨無嗣武德初與二王同追封

蜀王湛生子博又奉慈

隴西恭王博又武德初與奉慈例王高宗時擢累禮部尚書特進驕侈不循法度伎妾數百曳羅紈甘梁肉放於聲樂以自娛其弟奉慈亦荒縱皆爲帝所鄙嘗曰吾仇人有善且用之況親戚乎王等昵小人專爲不軌先王墳典不聞學



何以爲善哉各賜市書絹二百疋以愧切之然不自克也薨贈開府儀同三司  
荊州都督

渤海敬王奉慈顯慶時爲原州都督薨七世孫戡

戡字定臣幼孤年十歲卽好學大寒撥薪自炙夜無然膏默念所記年二十明  
六經舉進士就禮部試吏唱名乃入戡恥之明日徑返江東隱陽羨里陽羨民  
有鬪爭不決不之官而詣戡以辨凡論著數百篇常惡元和有元白詩多纖豔  
不逞而世競重之乃集詩人之類夫古者斷爲唐詩以譏正其失云平盧節度  
使王彥威表爲巡官府遷還洛陽卒

贊曰景元子孫當草昧之初乘運而奮方高祖攘除四方所以宣力皆顯顯爲  
世豪英至河間之功江夏之略可謂宗室標的者也始唐與疏屬畢王至太宗  
稍稍降封時天下已定帝與名臣蕭瑀等喟然講封建事欲與三代比隆而魏  
徵李百藥皆謂不然徵意以唐承大亂民人彫喪始復生業遽起而瓜分之故  
有五不可之說百藥稱帝王自有命曆祚之短長不緣封建又舉春秋二百四

十二年之禍亟於哀平桓靈而詆曹元首陸士衡之言以爲繆悠而顏師古獨  
議建諸侯當少其力與州縣雜治以相維持然天子由是罷不復議至名儒劉  
秩目武氏之禍則建論以爲設爵無土署官不職非古之道故權移外家家廟  
絕而更存存之之理在取順而難逆絕之之原在單弱而無所憚至謂郡縣可  
以小寧不可以久安大抵與曹陸相上下而杜佑柳宗元深探其本據古驗今  
而反復焉佑之言曰夫爲人置君欲其蕃息則在郡縣然而主祚常促爲君置  
人不病其寡則在建國然而主祚常永故曰建國利一宗列郡利百姓且立法  
未有不敝者聖人在度其患之長短而爲之建國之制初若磐石然敝則鼎峙  
力爭陵遲而後已故爲患也長列郡之制始天下一軌敝則世崩俱潰然而戡  
定者易爲功故其爲患也短又謂三王以來未見郡縣之利非不爲也後世諸  
儒因泥古彊爲之說非也宗元曰封建非聖人意然而歷堯舜三王莫能去之  
非不欲去之勢不可也秦破六國列都會置守宰據天下之圖攝制四海此其  
得也二世而亡有由矣暴威刑竭人力天下相合劫令殺守圜視而並起時則

有叛民無叛吏漢矯秦枉剖海內立宗子功臣數十年間奔命扶傷不給時則有叛國無叛郡唐興制州縣而桀黠時起失不在州而在於兵時則有叛將無叛州以爲矯而革之垂二百年不在諸侯明矣又言湯之興諸侯歸者三千資以勝夏武王之興會者八百資以滅商徇之爲安故仍以爲俗是湯武之不得已也不得已非公之大也私其力於己也秦革之者其爲制公之大者也其情私也然而公天下之端自秦始皇云觀諸儒之言誠然然建侯置守如質文遞救亦不可一概責也救土崩之難莫如建諸侯削尾大之勢莫如置守宰唐有鎮帥古諸侯比也故王者視所救爲之勿及於敝則善矣若乃百藥推天命佑言郡縣利百姓而主胙促乃臆論也

唐書卷七十八

... (faded text) ...

... (faded text) ...

... (faded text) ...

... (faded text) ...

... (faded text) ...

... (faded text) ...

... (faded text) ...

唐書卷七十八考證

長樂郡王幼良傳帝遣侍御史孫伏伽鞠視無異辭遂賜死○臣德潛按舊書

帝令字文士及代爲都督並按其事士及慮其爲變遂縊殺之

河間元王孝恭傳帝嘉納進王趙郡○沈炳震曰進王者由公爵而進王也今

上文拜信州總管似闕中間公爵一層

孝逸傳以嘗有功貸死流儋州薨○臣德潛按則天紀天授元年五月殺梁郡

公孝逸似紀傳互異

襄邑恭王神符傳文暕幽州都督魏國公○舊書作郡公

唐書卷七十八考證

Blank page with vertical lines.

唐書卷七十九

宋 端 明 殿 學 士 宋 祁 撰

列傳第四

高祖諸子

高祖二十二子竇皇后生成建成太宗皇帝玄霸元吉萬貴妃生智雲莫嬪生元景孫嬪生元昌尹德妃生元亨張氏生元方郭婕妤生元禮宇文昭儀生元嘉及第十九子靈夔王才人生元則張寶林生元懿張美人生元軌楊美人生鳳劉婕妤生元慶崔嬪生元裕小楊嬪生元名楊嬪生元祥魯才人生元曉柳寶林生元嬰

隱太子建成小字毗沙門資簡弛不治常檢荒色嗜酒畋獵無度所從皆博徒大俠隋末高祖被詔捕賊汾晉間留建成護家居河東高祖已起兵密召與元吉赴太原隋人購之急從間道至授左領軍大都督封隴西郡公引兵略定西河從平京師唐國建爲世子開府置官屬又遷撫軍大將軍爲東討元帥將萬

人徇洛陽授尚書令高祖受禪立爲皇太子詔率將軍桑顯和擊司竹羣盜平之涼州人安興貴殺李軌以衆降詔趣原州應接建成素驕不恤士雖甚暑晝夜馳獵衆不堪其勞亡者過半帝欲其習事乃敕非軍國大務聽裁決之又以李綱鄭善果爲宮官參謀議稽胡劉仝成寇邊詔建成進討破之鄜州斬虜千計引渠長悉官之使還招羣胡仝成與它大帥降建成畏其衆給欲城州縣者使降胡操築陰勒兵殺六千人仝成奔梁師都嘗循行北邊遇賊四百出降悉馘其耳縱之中允王珪洗馬魏徵以帝初興建成不知謀而秦王數平劇寇功冠天下英豪歸之陰許立爲皇太子勢危甚會劉黑闥亂河北珪等進說曰殿下特以嫡長居東宮非有功德爲人所稱道今黑闥瘼叛殘孽衆不盈萬利兵鑿之唾手可決請往討因結山東英俊心自封殖建成遂請行黑闥敗洛水建成問徵曰山東其定乎對曰黑闥雖敗殺傷太甚其魁黨皆縣名處死妻子係虜欲降無繇雖有赦令獲者必戮不大蕩宥恐殘賊嘯結民未可安旣而黑闥復振廬江王瑗棄洛州山東亂命齊王元吉討之有詔降者赦罪衆不信建成



至獲俘皆撫遺之百姓欣悅賊懼夜奔兵追戰黑闥衆猶盛乃縱囚使相告曰  
襁而甲還鄉里若妻子獲者旣已釋矣衆乃散或縛其渠長降遂禽黑闥帝晚  
多內寵張婕妤尹德妃最幸親戚分事宮府建成與元吉通謀內結妃御以自  
固當是時海內未定秦王數將兵在外諸妃希所見及洛陽平帝遣諸妃馳閱  
後宮見府庫服玩皆私有求索爲兄弟請官秦王已封帑簿及官爵非有功不  
得妃媛曹怨之會爲陝東道行臺有詔屬內得專處決王以美田給淮安王神  
通而張婕妤爲父丐之帝手詔賜田詔至神通已前得不肯與婕妤妄曰詔賜  
妾父田而王奪與人帝怒召秦王讓曰我詔令不如爾教邪佗曰謂裴寂曰兒  
久典兵爲儒生所誤非復我昔日秦府屬杜如晦騎過尹妃父門恚其傲率  
家童摔毆折一指父懼卽使妃前訴秦王左右暴其父帝不察大怒詰王曰兒  
左右乃凌我妃家況百姓乎王自辨曉訖不置繇是見疏帝召諸王燕秦王感  
母之不及有天下也偶獨泣帝顧不樂妃媛因得中傷之爲建成游說曰海內  
無事陛下春秋高當自娛秦王輒悲泣正爲嗔忌妾屬耳使陛下萬歲後王得

志妾屬無遺類東宮慈愛必能全養乃皆悲不自勝帝惻然遂無易太子意突厥入寇帝議遷都秦王苦諫止建成見帝曰秦王欲外禦寇沮遷都議以久典兵而謀篡奪帝寢不悅初帝令秦王居西宮承乾殿元吉居武德殿與上臺東宮晝夜往來皆攜弓刀相遇如家人禮由是皇太子令秦齊二王教與詔敕雜行內外懼莫知所從建成等私募四方驍勇及長安惡少年二千人爲宮甲屯左右長林門號長林兵又令左虞候率可達志募幽州突厥兵三百內宮中將攻西宮或告於帝帝召建成責之乃流達志舊州華陰楊文幹素凶詖建成昵之使爲慶州總管遣募兵送京師欲爲變時帝幸仁智宮秦王元吉從建成謂元吉曰秦王且徧見諸妃彼金寶多有以賂遺之也吾安得箕踞受禍安危之計決今日元吉曰善乃命郎將爾朱煥校尉橋公山齋甲遺文幹趣興兵煥等懼至豳鄉白反狀寧州人杜鳳亦上變帝遣司農卿宇文穎驛召文幹元吉陰結穎使告文幹文幹遽率兵反帝以建成首謀未忍治卽詔捕王珪魏徵及左衛率韋挺舍人徐師暮左衛車騎馮世立欲殺之以薄太子罪乃手詔召建成

建成懼不敢往師蕃勸遂舉兵詹事主簿趙弘智諫建成損車服輕往謝罪乃詣行在所未至屏官屬徑入謁叩頭請死投身於地不能起帝怒夜囚幕中使兵衛守會文幹陷寧州帝驚以宮近賊夜率衛士南趣山行十餘里明乃還宮召秦王問計對曰文幹豎子耳官司當卽禽之就使假刻漏之久正須遣一將可辦帝曰事連建成恐應者衆爾自行還吾以爾爲太子使建成王蜀蜀地狹不足爲變若不能事汝取之易也秦王率衆趣寧州文幹爲其下所殺以其首降執宇文穎送京師秦王之行元吉及內嬖更爲建成請封德彝亦陰說帝由是意解復詔建成居守但責兄弟不相容而謫王珪韋挺天策兵曹參軍杜淹於遠方然怨猜日結建成等召秦王夜宴毒酒而進之王暴疾咯血數升淮安王扶掖還宮帝問疾因敕建成秦王不能酒毋夜聚又謂秦王曰吾起晉陽平天下皆爾力將定東宮爾亟讓故成而美志又太子立多歷年吾重奪之觀而兄弟終不相下同在京師忿鬪且深爾還洛陽行臺自陝以東悉主之建天子旌旗如梁孝王故事王泣曰非所願也不可遠膝下帝曰陸賈漢臣也猶遞過

諸子況我天下主東西兩宮思汝卽往何所悲邪王將行建成等謀曰秦王得土地甲兵必爲患留之京師一匹夫耳因密使人說帝言秦王左右皆山東人聞還洛皆洒然喜觀其意不復來矣事果寢俄而突厥寇邊太子薦元吉北討欲因其兵作亂長孫無忌房玄齡杜如晦尉遲敬德侯君集等勸秦王先圖之王乃密奏建成等與後宮亂因曰臣無負兄弟今乃欲殺臣是爲世充建德復仇使臣死雖地下愧見諸賊帝大驚報曰旦日當窮治而必早參張婕妤馳語建成乃召元吉謀曰請勒宮甲託疾不朝建成曰善然不共入朝事何繇知遲明乘馬至玄武門秦王先至以勇士十九人自衛時帝已召裴寂蕭瑀陳叔達封德彝宇文士及竇誕顏師古等入建成元吉至臨湖殿覺變遽反走秦王隨呼之元吉引弓欲射不能殼者三秦王射建成卽死元吉中矢走敬德追殺之俄而東宮齊府兵三千攻玄武門閉不得入接戰久之矢及殿屋王左右數百騎至合擊之衆遂潰帝謂裴寂等曰事今奈何蕭瑀陳叔達曰臣聞內外無限父子不親失而弗斷反蒙其亂建成元吉自草昧以來未始與謀旣立又無功德

疑貳相濟爲蕭牆憂秦王功蓋天下內外歸心立爲太子付軍國大務陛下釋重負矣帝曰此吾志也乃召秦王至慰撫之曰朕幾有投杼之惑秦王號泣不能止建成死年三十八長子成宗爲太原王早卒承道安陸王承德河東王承訓武安王承明汝南王承義鉅鹿王皆坐誅詔除建成元吉屬籍其黨疑懼更相告廬江王瑗遂反乃下詔建成元吉瑗支黨不得相告訐由是遂安太宗立追封建成爲息王諡曰隱以禮改葬詔東宮舊臣皆會帝於宜秋門哭之以子福爲後十六年追今贈字文穎者代人自李密所來降爲農圃監封化政郡公性貪昏與元吉厚善故豫文幹謀事敗帝責曰朕以文幹叛故遣卿乃同逆邪穎無以對斬之

衛懷王玄霸字大德幼辯慧隋大業十年薨年十六無子武德元年追王及諡又贈秦州總管司空以太宗子泰爲宜都王奉其祀葬芷陽泰徙封越更以宗室西平王瓊子保定嗣薨無子國除

巢刺王元吉小字三胡高祖兵已西留守太原封姑臧郡公進齊國總十五郡

諸軍事加鎮北將軍太原道行軍元帥帝授禪進王齊爲并州總管初元吉生太穆皇后惡其貌不舉侍媪陳善意私乳之及長猜驚好兵居邊久益驕侈常令奴客諸妾數百人被甲習戰相擊刺死傷甚衆後元吉中創善意止之元吉恚命壯士拉死私諡慈訓夫人劉武周略汾晉詔遣右衛將軍宇文歆助守元吉喜鷹狗出常載置罔三十車曰我寧三日不食不可一日不獵夜潛出淫民家府門不閉歆驟諫不納乃顯表於帝曰王數出與竇誕縱獵蹂民田縱左右攘歆畜產爲盡每射於道觀人避矢以爲樂百姓怨毒不可與共守有詔召還元吉密諷民詣闕請乃得歸武周以五千騎屯黃蛇嶺元吉使將軍張達以步卒百人嘗寇達辭兵少彊之至則盡沒達怒導武周陷榆次元吉保祁賊急攻之遁還并州賊張甚元吉給司馬劉德威曰公以老弱守吾率銳士拒賊因齎寶物攜妻妾夜出委軍奔京師并州陷帝怒自是嘗令從秦王征討不復顯軍矣尋授侍中襄州道行臺尙書令稷州刺史秦王圍東都竇建德來援王以精騎逆戰留元吉屈突通守而世充易之輒出兵元吉設伏劫之斬首八百級禽

其將東都平拜司空賜袞冕服鼓吹二部班劍二十人黃金二千斤與太子秦王得三鑪鑄錢累進司徒兼侍中并州大都督時秦王有功而太子不爲中外所屬元吉喜亂欲并圖之乃構於太子曰秦王功業日隆爲上所愛殿下雖爲太子位不安不早計還踵受禍矣請爲殿下殺之太子不忍元吉數諷不已許之於是邀結宮掖厚賂中書令封德彝使爲游說帝遂疏秦王愛太子元吉乃多匿亡命壯士厚賜之使爲用元吉記室參軍榮九思爲詩刺之曰丹青飾成慶玉帛禮專諸元吉見之弗悟也其典籤裴宣儼免官往事秦府元吉疑事泄鳩殺之自是人莫敢言秦王嘗從帝幸元吉第伏護軍宇文寶寢內將以刺王太子固止之元吉愠曰爲兄計於我何害突厥郁射設入圍烏城建成薦元吉北討乃多引秦王府驍將秦叔寶尉遲敬德程知節段志玄與行又籍秦府精兵益麾下帝知之不能禁元吉承間密請害秦王帝曰是有定四海功殺之無名元吉曰王昔平東都顧望不卽西散金帛樹私惠豈非反邪帝不應太子與元吉謀兵行吾與秦王至昆明池伏將士拉之以暴卒聞上無不信然後說帝

付吾國吾以爾爲皇太弟而盡擊殺叔寶等率更令王暕密以謀告秦王王召僚屬謀皆曰元吉戾狠使得志且不能事其兄往者護軍薛寶以元吉字合之其文成唐元吉喜曰但除秦王取東宮如反掌耳爲亂未克己復傾奪大王不蚤正之社稷非復唐有秦王由是定計死年二十四子承業爲梁郡王承鸞漁陽王承獎普安王承裕江夏王承度義陽王並伏誅貞觀初改葬追爵海陵郡王及諡後改封巢以曹王明嗣

楚哀王智雲初名稚詮善射工書奔隋大業末從建成寓河東高祖初建成走太原吏捕智雲送長安爲陰世師所害年十四武德元年追王及諡母萬貴妃性恭順爲帝所禮宮中事一一咨決三年以太宗子寬爲嗣又贈涼州總管司徒寬早薨國除貞觀二年復以濟南公世都子靈龜嗣歷魏州刺史爲政威嚴盜賊不發鑿永濟渠通新市百姓利之薨子福嗣降爲公卒子承況嗣神龍中爲右羽林將軍同節愍太子死于難

荆王元景武德二年始王趙與魯鄴二王同封貞觀初累遷雍州牧十年徙封



荆明年詔荊州都督荆王元景梁州都督漢王元昌徐州都督徐王元禮潞州都督韓王元嘉遂州都督彭王元則鄭州刺史鄭王元懿絳州刺史霍王元軌號州刺史號王鳳豫州刺史道王元慶鄧州刺史鄧王元裕壽州刺史舒王元名幽州都督燕王靈夔蘇州刺史許王元祥安州都督吳王恪相州都督魏王泰齊州都督齊王祐益州都督蜀王愔襄州刺史蔣王惲揚州都督越王貞并州都督晉王治秦州都督紀王慎所任州刺史并功臣令世世襲會長孫無忌等固讓遂廢不行徙鄜州永徽初進位司徒賜實封至千五百戶房遺愛謀反坐子則與往還繫獄時吳王亦抵罪高宗謂大臣曰朕欲從公丐叔及兄死兵部侍郎崔敦禮曰陛下雖申恩不可詘天下法遂賜死久之追封沈黎王以渤海王奉慈子長沙嗣降爲侯神龍初復王爵以孫元逖嗣薨無子國除

漢王元昌初王魯累遷梁州都督後徙封漢有勇力善騎射數觸軌憲太宗手詔誨督乃怨望附太子承乾通饋謝來朝京師宿東宮嘗有醜語又見帝側有宮人善琵琶乃曰事成幸賜我承乾許之割臂血盟事敗帝弗忍誅欲免死高

士廉李勣等固爭不奉詔乃賜死國除

鄴悼王元亨貞觀二年授金州刺史之藩太宗憐其幼思之數遣使爲勞問賜金醪以娛樂之六年薨無子國除

周王元方武德四年始王與鄭宋荆滕四王同封貞觀三年薨無子國除

徐康王元禮性恭畏善騎射始王鄭卽授鄭州刺史後徙王徐遷徐州都督爲絳州刺史有治名璽書勞勉實封至千戶永徽中加司徒兼潞州刺史薨贈太尉冀州大都督陪葬獻陵三子茂爲淮南王餘爵公茂險薄無行初元禮疾姬趙有美色茂逼烝之元禮切責茂恚屏侍衛藥膳曰爲王五十年足矣何服藥爲以不食薨茂嗣上元中事洩流死振州神龍初以茂子瓘嗣開元中爲宗正員外卿薨子延年嗣拔汗那王入朝廷年將以女嫁之爲右相李林甫劾奏貶文安郡別駕終餘杭司馬國除永泰初延年壻黔中觀察使趙國珍言諸朝詔以其子諷嗣王

韓王元嘉字元嘉始王宋後改王徐爲潞州刺史母昭儀宇文述女也寵於高

祖既卽位欲立爲后固辭元嘉以母寵故特爲帝愛後出諸子無及者在潞時年十五聞太妃病涕泣不食居喪毀甚太宗數慰勉少好學藏書至萬卷皆以古文字參定同異與弟靈夔友愛燕見終日如布衣禮閨門修整當世稱之貞觀九年更封韓遷滑州都督高宗末爲澤州刺史武后得政進授太尉徙定州刺史以霍王元軌爲司徒舒王元名爲司空滕王元嬰開府儀同三司魯王靈夔太子太師越王貞太子太傅紀王慎太子太保外示尊寵而內將圖之垂拱中元嘉徙絳州刺史與子譔及越王子冲糾合宗室同舉兵未發會武后詔宗室朝明堂元嘉遣使告諸王曰大享後太后必盡誅諸王不如先事起不然李氏無種矣乃爲中宗詔督諸王發兵冲卽以兵五千攻濟州而諸王倉卒兵不至遂敗元嘉至京師謀泄后逼令自殺年七十詔改氏元嘉魯王越王爲虺元嘉六子訓頴川王誼武陵王謏上黨公蚤卒譔黃公工爲辭章孟利貞嘗稱其文曰劉隣之周思茂不過也出爲通州刺史辭疾歸且謀應越王也謏通音律歷杭州別駕與譔俱死時籍沒者衆惟冲譔家書爲多皆文句詳正祕府所不

及神龍初追復元嘉爵土以第五子訥嗣薨子叔璩嗣歷國子司業薨子煒嗣建中中改王鄆後懿宗以鄆王卽位復改嗣韓王云

彭思王元則字彝初王荆出爲婺州刺史貞觀十年徙王爲遂州都督以冠服奢僭免久之爲澧州刺史更折節厲行薨贈司徒荆州大都督陪葬獻陵高宗登望春宮過其喪哭之慟無子以霍王子絢嗣龍朔中封南昌王薨子志暎嗣開元中爲宗正卿

鄭惠王元懿始王滕貞觀中出爲兗州刺史徙王歷鄭潞絳三州刺史實封千戶喜經術數斷大獄務寬平高宗嘉之璽詔褒錫薨贈司徒荆州大都督陪葬獻陵十子長子璲嗣王爲鄂州刺史薨子希言嗣開元中爲右金吾大將軍再爲太子詹事弟察言生二子曰自仙翻自仙爲楚州別駕生夷簡翻爲陳留公生宗閔璫弟琳安德郡公生擇言擇言生勉勉宗閔夷簡皆位宰相別有傳時稱小鄭王後亦曰惠鄭王後以別鄭王亮云

霍王元軌武德六年始王蜀與裔漢二王同封後徙吳多材藝高祖愛之太宗

嘗問羣臣曰朕子弟孰賢魏徵曰臣愚不盡知其能唯吳王數與臣言未嘗不自失帝曰朕亦器之然卿以爲前代孰比對曰經學文雅漢河間東平也至孝行曾閔不能過帝由是遇益厚詔納徵女爲妃嘗從獵遇羣豕帝使射之筈不虛穀豕爲盡帝撫其背曰爾藝過人顧今無所施方天下未定得若豈不用乎貞觀七年爲壽州刺史高祖崩去官毀瘠甚服除遂菜食布衣終身至忌日輒累晝不食十年徙王歷絳徐定三州刺史實封至千戶所至閉閣讀書以吏事委長史司馬謙慎未嘗與物忤數引見處士劉玄平爲布衣交或問王所長於玄平答曰無長問者不解玄平曰人有短所以見長若王無所不備吾何以稱之突厥寇定州元軌令開城門偃旗幟虜疑不敢入夜遁州人李嘉運潛結賊詔窮誅支黨元軌以寇近且強人心危但殺嘉運餘無所詰因自劾帝喜曰朕固悔之非王之明幾失定州矣王文操者與賊戰敗二子鳳賢更以身蔽父得全二子死縣抑不爲言元軌廉知之遣使弔祭上其事詔贈鳳賢朝散大夫旌禮其閭元軌每朝數上疏陳得失多所裨正帝尊重之有大事常密驛咨逮帝

崩與侍中劉齊賢同知山陵事元軌淹練故事齊賢歎曰是非吾等及已嘗遣國令督封租令請貿易取贏答曰汝當正吾失反誅吾以利邪不納進司徒出爲襄青二州刺史越王敗坐嘗通謀徙黔州檻車載至陳倉薨六子緒爲江都王純安定王餘皆爵爲公緒有名譽爲金州刺史誅神龍初並復官爵以緒孫暉嗣王開元中爲左千牛員外將軍

號莊王鳳字秀成始王豳爲鄧州刺史俄徙王歷號豫青三州刺史實封千戶喜畋游遇官屬尤慢使奴蒙虎皮怖其參軍陸英俊幾死因大笑爲樂薨贈司徒揚州大都督陪葬獻陵七子長子翼嗣爲平陽王薨子寓嗣寓無子爵不傳次子茂融以勇聞垂拱中爲申州刺史黃公譔與越王謀舉兵倚以爲助時詔諸王公赴東都茂融私問所親高子貢子貢報曰來必死乃稱疾不朝以俟兵期及得越王書倉卒不能應僚屬勸白其書擢太子右贊善大夫俄爲黨屬所引誅中宗更以鳳孫邕嗣王娶韋后妹累遷祕書監知隴右三使仗內諸廐徙王汴未幾韋氏敗邕殺其妻送首於朝議者鄙之削爵貶沁州刺史不事後復

爵還戶二百累遷衛尉卿薨子巨嗣巨剛銳果決略通書史好屬辭天寶五載出爲西河太守坐資給柳勳支黨貶義陽司馬明年御史中丞楊慎矜得罪其附離史敬忠與巨善巨坐免官錮置南賓郡召拜夷陵太守安祿山陷東京玄宗方擇將帥張增言巨有謀可屬大事召至京師楊國忠忌之謂人曰小兒詎可使對天子踰月不得見帝知之召入禁中對合旨帝大悅敕宰相與語久不得罷國忠怠謂巨曰比來人多口打賊君不爾乎巨曰誰爲相公手打賊者乎乃授陳留譙郡太守攝御史大夫河南節度使明日謝帝驚曰何攝爲卽詔兼御史大夫巨奏方艱難時賊多詐有如陛下召臣何以取信乃析契授之俄兼統嶺南何履光黔中趙國珍南陽魯炁三節度使事時炁戰數屈詔貶爲果毅以來瑱代之巨奏炁若能存孤城功足補過則何以處之帝曰卿隨所處置巨至內鄉賊將畢思琛解圍走遂趣南陽貶炁白衣從軍其暮稱詔復職京師平拜留守兼御史大夫明年拜太子少師兼河南尹東畿採訪使征乘牛之出入市者斥所得佐用度然稍自盜沒其妃卽張皇后從女弟內不睦巨選府縣官

備使令妃亦引蒲博少年分黨招貨賄撓政事宗正卿李遵素私張發巨賊事  
貶遂州刺史會段子璋反道遂州巨倉卒不知所出卽迎謁爲子璋所殺子則  
之嗜學年五十餘尙執經太學嗣曹王臯薦之貞元二年繇睦王府長史遷左  
金吾衛大將軍坐與從甥竇申善貶昭州司馬

道孝王元慶始王漢後徙陳出爲趙州刺史貞觀十年徙王授豫州刺史累實  
封千戶時諸王奉給薄於帝子王數窶乏大臣莫敢言十八年黃門侍郎褚遂  
良爲太宗從容言之不能行高宗時歷滑州刺史以治績聞數蒙褒賜遷徐沁  
衛三州刺史事母謹及喪請躬修墳墓詔不聽薨贈司徒益州都督陪葬獻陵  
九子誘爲嗣王臨淮爲澧州刺史坐賊削爵更以次子詢之子微嗣終宗正卿  
子鍊嗣廣德中亦至宗正卿

鄧康王元裕貞觀五年始王鄼十一年徙王始王及徙皆與譙魏許密四王同  
封累實封至千二百戶好學善談名理與典籤盧照隣爲布衣交五爲州刺史  
遷兗州都督薨贈司徒益州大都督陪葬獻陵無子以江王子廣平公炅嗣薨



子孝先嗣開元中爲冠軍大將軍

舒王元名始王譙後徙王高祖之在大安宮太宗晨夕使尙宮問起居元名纔十歲保媪言尙宮有品當拜元名曰此帝侍婢耳何拜爲太宗壯之曰真吾弟也及長矜嚴疏財未嘗問家人生業歷五州刺史實封至千戶子豫章王亶治江州有美政高宗以元名善訓子手詔褒美又欲授元名大州辭曰臣忝屬籍豈以州郡爲仕進資邪治石州二十年數游山林有高蹈意垂拱中徙鄭州境接東畿諸王貴戚爲刺史者縱家人暴百姓元名至一革之爲治廉威進加司空武后時亶爲丘神勳所構繫詔獄死元名坐遷利州尋被殺神龍初詔復官爵贈司徒時少子鄆國公昭已卒乃以亶子津嗣開元中爲左威衛將軍薨子萬嗣薨子藻嗣

魯王靈夔篤學善草隸通音律初王魏後王燕爲幽州都督已而徙王實封至千戶頻歷五州刺史遷太子太師垂拱元年徙相州坐與越王謀起兵流振州自殺子誥爲清河王早夭藹爲范陽王知越王必敗白發其謀得不誅歷右散

騎常侍爲酷吏所害神龍初悉追復王爵以藹子道堅嗣道堅方嚴有禮法閨門肅如也七爲州刺史遷國子祭酒開元中遷授汴州刺史河南道採訪使州據水陸都會前後刺史多黷利唯道堅以清毅稱入爲宗正卿薨贈禮部尙書子宇嗣從玄宗至蜀爲右金吾將軍寶應初皇太子子封魯王更封宇爲嗣鄒王弟道邃封戴國公恭默自守以修山東婚姻故事數任清職終尙書右丞

江安王元祥始王許後徙王四爲州刺史實封至千戶性庸遴所至營財產無厭時滕蔣號三王皆貪暴得其府官者惡之不願行故時語曰寧向儋崖振白不事江滕蔣號元祥魁大帶十圍食兼數人韓號魏亦鴻偉然不逮也薨贈司徒并州大都督陪葬獻陵二子暉爲永嘉王有禽獸行誅死皎爲武陽王餘皆爵公武后時多及誅皎子叢以幼流死嶺表葬南安人號其冢爲天孫墓中宗立以從子欽嗣王又以皎封絕更取弟子繼宗嗣旣而以郡王不襲降禮國公密貞王元曉貞觀中爲虢州刺史實封至千戶徙澤州薨贈司徒揚州都督陪葬獻陵子穎嗣爲南安王薨子勗嗣早薨神龍初以穎弟亮養子曇嗣開元五

年更詔元曉再從孫東莞郡公徹嗣徙封濮陽郡王歷宗正卿金紫光祿大夫  
滕王元嬰貞觀十三年始王實封千戶爲金州刺史驕縱失度在太宗喪集官  
屬燕飲歌舞狎昵廝養巡省部內從民借狗求宜所過爲害以丸彈人觀其走  
避則樂城門夜開不復有節高宗以書切責曰朕以王至親不忍致于法今署  
下上考冀媿王心久之遷洪州都督官屬妻美者給爲妃召逼私之嘗爲典籤  
崔簡妻鄭嫚罵以履抵元嬰面血流乃免元嬰慚歷旬不視事後坐法削戶及  
親事帳內之半謫置滁州起授壽州刺史徙隆州復不循法錄事參軍事裴聿  
諫正其失元嬰粹辱之聿入計具奏帝遷聿六品上階帝嘗賜諸王綵五百以  
元嬰及蔣王貪黷但下書曰滕叔蔣弟不須賜給麻二車助爲錢緡二王大慚  
武后時進拜開府儀同三司梁州都督薨贈司徒冀州都督陪葬獻陵子十八  
人長子修琦嗣爲長樂王餘爵公垂拱中六人死詔獄神龍初更以少子修信  
子涉嗣開元中授左驍衛將軍薨子湛然嗣從玄宗至蜀擢左金吾將軍



唐書卷七十九考證

霍王元軌傳檻車載至陳倉薨六子○舊書作有子七人

鄧康王元裕傳累實封至千二百戶○舊書通前一千五百戶

滕王元嬰傳神龍初更以修信子涉嗣○臣德潛按舊書以循琦弟循瑋子涉

嗣而新書表亦作瑋

唐書卷七十九考證

皇朝通志卷之六

皇朝通志卷之六

皇朝通志卷之六  
皇朝通志卷之六  
皇朝通志卷之六

皇朝通志卷之六  
皇朝通志卷之六  
皇朝通志卷之六

皇朝通志卷之六

唐書卷八十

宋端明殿學士宋祁撰

列傳第五

太宗諸子

太宗十四子文德皇后生承乾又生第四子泰高宗皇帝後宮生寬楊妃生恪又生第六子愔陰妃生祐王氏生憚燕妃生貞又生第十一子囂韋妃生慎後宮生簡楊妃生福楊氏生明

常山愍王承乾字高明生承乾殿卽以命之武德三年始王常山郡與長沙宜都二王同封俄徙中山太宗卽位立爲皇太子甫八歲特敏惠帝愛之在諒闇使裁決庶政有大體後每行幸則令監國及長好聲色慢游然懼帝祕其迹臨朝言諄諄必忠孝退乃與羣不逞狎慢左右或進諫危坐斂容痛自咎飾非辯給諫者拜答不暇故人人以爲賢而莫之察後過惡瀆聞宮臣若孔穎達令狐德棻于志寧張玄素趙弘智王仁表崔知機等皆天下選每規爭承乾帝必厚

賜金帛欲以厲其心承乾慙不悛往往遣人陰圖害之時魏王泰有美名帝愛重而承乾病足不良行且懼廢與泰交惡泰亦謀奪長各樹黨東宮有俳兒善姿首承乾嬖愛帝聞震怒收兒殺之坐死者數人承乾意爲泰告望甚內念兒不已築室圖其像贈官樹碑爲起冢苑中朝夕祭承乾至其處裴回涕數行下愈怨懟稱疾不朝累數月又使戶奴數十百人習音聲學胡人椎髻翦綵爲舞衣尋幢跳劍鼓鞞聲通晝夜不絕造大銅鑪六熟鼎招亡奴盜取人牛馬親視烹燂召所幸厮養共食之又好突厥言及所服選貌類胡者被以羊裘辮髮五人建一落張氈舍造五狼頭纛分戟爲陣繫幡旗設穹廬自居使諸部斂羊以烹抽佩刀割肉相啗承乾身作可汗死使衆號哭勢面奔馬環臨之忽復起曰使我有天下將數萬騎到金城然後解髮委身思摩當一設顧不快邪左右私相語以爲妖又嬖氈爲鎧列丹幟勒部陣與漢王元昌分統大呼擊刺爲樂不用命者披樹扶之或至死輕者輒腐之嘗曰我作天子當肆吾欲有諫者我殺之殺五百人豈不定又召壯士左衛副率封師進刺客張師政紇干承基等謀



殺魏王泰不克遂與元昌侯君集李安儼趙節杜荷饒臂血暈之謀以兵入西宮貞觀十七年齊王祐反齊州承乾謂承基等我宮西牆去大內正可二十步棘耳豈與齊州等會承基連齊王事繫獄當死卽上變帝詔長孫無忌房玄齡蕭瑀李勣孫伏伽岑文本馬周褚遂良雜治廢爲庶人徙黔州十九年死帝爲廢朝葬以國公禮子象爲懷州別駕厥鄂州別駕開元中象子適之爲宰相贈還承乾始王象越州督都郇國公

楚王寬武德三年出後楚哀王蚤薨貞觀初追封

鬱林王恪始王長沙俄進封漢貞觀二年徙蜀與越燕二王同封不之國久乃爲齊州都督帝謂左右曰吾於恪豈不欲常見之但令早有定分使外作藩屏吾百歲後庶兄弟無危亡憂十年改王吳與魏齊蜀蔣越紀六王同徙封授安州都督帝賜書曰汝惟茂親勉思所以藩王室以義制事以禮制心外之爲君臣內之爲父子今當去膝下不遺汝珍而遺汝以言其念之哉坐與乳媪子博塞罷都督削封戶三百高宗卽位拜司空梁州都督恪善騎射有文武才其母

隋煬帝女地親望高中外所向帝初以晉王爲太子又欲立恪長孫無忌固爭  
帝曰公豈以非己甥邪且兒英果類我若保護舅氏未可知無忌曰晉王仁厚  
守文之良主且舉棋不定則敗況儲位乎帝乃止故無忌常惡之永徽中房遺  
愛謀反因遂誅恪以絕天下望臨刑呼曰社稷有靈無忌且族滅四子仁瓌琬  
瓌並流嶺表顯慶五年追王鬱林爲立廟以河間王孝恭孫榮爲鬱林縣侯以  
嗣神龍初贈司空備禮改葬光宅中仁遇赦還適會榮以罪斥故得襲鬱林縣  
男歷岳州別駕爵郡公嘗使江左州人遺以金拒不內武后遣使者勞曰兒吾  
家千里駒更名千里自天授後宗室賢者多株翦唯千里詭躁不情數進符瑞  
諸異物得免中宗反正改王成紀未幾進王成節愍太子誅武三思千里與其  
子天水王禧率數十人斬右延明門以入太子敗誅死籍其家改氏蝮睿宗立  
詔還氏及官爵瑋蚤卒中宗追封朗陵王子衮出繼蜀王愔開元中以傍繼國  
改封廣漢郡王遷太僕卿同正員薨

琨武后時歷六州刺史皆有名聖曆中爲嶺南招慰使安輯反獠甚得其宜卒

贈司衛卿神龍初贈張掖郡王開元中以子禕貴追封吳王

禕少有志尚事繼母謹撫異母弟祇以友稱當襲封固讓祇中宗嘉其意特封  
嗣江王以繼囂後開元時亦以傍繼徙信安郡王累爲州刺史治嚴辨遷禮部  
尚書朔方節度使初吐蕃據石堡城數盜塞詔禕與河西隴右議攻取旣到屯  
諏日進師或謂城險賊所愛必固守今兵深入有不如捷吾軍必犇不如持重  
伺賊勢禕曰人臣之節豈憚險不進乎必衆寡不敵者吾以死繼之於是分兵  
迂賊路督諸將倍道進遂拔之自是河隴諸軍游奕拓地至千里玄宗喜更號  
其城曰振武軍契丹牙官可突干叛詔拜忠王爲河北道行軍元帥討之敕禕  
以副王不行故禕率裴耀卿諸將分道出范陽北擊二蕃破之擒酋長以還餘  
部竄伏加開府儀同三司領關內支度營田採訪處置使授二子官禕功多執  
政害之賞不讎爲當時所恨久之擢兵部尚書爲朔方節度大使坐事下除衢  
州刺史歷滑懷二州天寶初以太子少師致仕明年遷太師未拜薨禕治家嚴  
教子有法度故岷嶧峴皆顯

峘性質厚歷宦有美名以王孫封趙國公楊國忠亂政悉斥不附己者峘由考功郎中拜睢陽太守以清簡爲二千石最方入計而玄宗入蜀卽走行在除武部侍郎兼御史大夫俄拜蜀郡太守劍南節度採訪使郭千仞反與陳玄禮共討平之上皇還京遷戶部尙書改越國乾元元年持節都統江淮節度宣慰觀察使都統之號自峘始明年宋州刺史劉展有異志詔拜展爲淮南節度使密詔峘與揚州長史鄧景山圖之時展強扈旣受詔卽悉兵度淮峘景山拒之戰壽春敗績峘走丹陽詔貶袁州司馬卒于官贈揚州大都督弟峘別傳

祇封嗣吳王出爲東平太守安祿山反河南陳留滎陽靈昌相繼陷祇募兵拒賊玄宗壯之累遷陳留太守持節河南道節度採訪使歷太僕宗正卿代宗大曆時祇旣宗室老以太子賓客爲集賢院待制是時勳望大臣無職事者皆得待詔于院給餼錢署舍以厚其禮自左僕射裴冕等十三人爲之子巘以蔭補五品官祇薨兄岵得罪乃以巘嗣王累至宗正卿檢校刑部尙書薨贈太子少保性介直面刺人短歷官清白居室不能庇風雨收恤甥姪慈愛過人家無留

儲公卿合賻乃克葬境神龍初封歸政郡王歷宗正卿坐千里事貶南州司馬  
濮恭王泰字惠襄始王宜都徙封衛繼懷王後又徙封越爲揚州大都督再遷  
雍州牧左武侯大將軍改王魏帝以泰好士善屬文詔卽府置文學館得自引  
學士又以泰大腰腹聽乘小輿至朝司馬蘇勸泰延賓客著書如古賢王泰  
乃奏撰括地志於是引著作郎蕭德言祕書郎顧胤記室參軍蔣亞卿功曹參  
軍謝偃等撰次衛尉供帳光祿給食士有文學者多與而貴游子弟更相因藉  
門若市然泰悟其過欲速成乃分道計州緡緝疏錄凡五百五十篇歷四期成  
詔藏祕閣所賜萬段後帝幸泰延康坊第曲赦長安死罪免坊人一年租府僚  
以差賜帛又泰月稟過皇太子遠甚諫議大夫褚遂良諫曰聖人尊嫡卑庶謂  
之儲君故用物不會與王共之庶子不得爲比所以塞嫌萌杜禍源先王法制  
本諸人情知有國家者必有嫡庶庶子雖愛不得過嫡子如當親者疏當尊者  
卑則私恩害公惑志亂國今魏王稟料過東宮議者以爲非是昔漢竇太后愛  
梁王封四十餘城王築苑三百里治宮室爲複道費財鉅萬出警入蹕一不得

意遂發病死宣帝亦驕淮陽王幾至於敗輔以退讓之臣乃克免今魏王新出閣且當示以節儉自可在後月加歲增又宜擇師傅教以謙儉勉以文學就成德器此所謂聖人之教不肅而成也帝又敕泰入居武德殿侍中魏徵亦言王爲陛下愛子欲安全之則不當使居嫌疑之地今武德殿在東宮之西昔海陵居之矣論者爲不可雖時與事異人之多言尙或可畏又王之心亦弗違舍願罷之成王以寵爲懼之美帝悟乃止時皇太子承乾病蹇泰以計傾之乃引駙馬都尉柴令武房遺愛等布腹心而韋挺杜楚客相繼攝府事二人者爲泰要結中朝臣津介賂遺羣臣更附爲朋黨承乾懼陰遣人稱泰府典籤詣玄武門上封帝省之書言泰罪帝怒卽遣捕詰不獲旣而太子敗帝陰許立泰岑文本劉洎請遂立泰爲太子長孫無忌固欲立晉王帝以太原石文有治萬吉復欲從無忌泰微知之因語晉王爾善元昌得無及乎王憂甚帝怪之以故對帝憮然悟會召承乾譴勅承乾曰臣貴爲太子尙何求但爲泰所圖與朝臣謀自安爾無狀之人遂教臣爲不軌事若泰爲太子正使其得計耳帝曰是也有如立

泰則副君可詭求而得使泰也立承乾治俱死治也立泰承乾可無它卽幽泰將作監解雍州牧相州都督左武侯大將軍降王東萊因詔自今太子不道藩王窺望者兩棄之著爲令然帝猶謂無忌曰公勸我立雉奴雉奴仁懦得無爲宗社憂奈何雉奴高宗小字泰尋改王順陽居均州之鄖鄉帝常持泰表語左右曰泰文辭可喜豈非才士我心念泰無已時但爲社稷計遣居外使兩相完也二十一年進王濮高宗卽位詔泰開府置僚屬車服羞膳異等薨鄖鄉年三十五贈太尉雍州牧二子欣徽欣嗣王武后時爲酷吏所陷貶昭州別駕薨子嶠神龍初得嗣王開元中爲國子祭酒以罪貶鄧州別駕薨徽封新安郡王庶人祐字贊武德八年王宜陽進王楚又王燕已乃封齊領齊州都督貞觀十一年始歸國以明年入朝以疾留京師其舅尙乘直長陰弘智儉人也說祐曰王兄弟多卽上萬歲後何以自全要須得士自助乃引客燕弘亮謁祐祐悅賜金帛使募劍客十五年還州初帝用王府長史司馬必取骨鯁敢言者有過失輒聞而祐溺羣小好弋獵長史薛大鼎屢諫不聽帝以輔王無狀免之更用權

萬紀萬紀性剛急以法繩祐有咎君薨梁猛虎者騎射得幸萬紀斥之祐私引與狎昵帝數以書讓祐萬紀恐并獲罪卽說祐曰王上愛子上欲王改悔故數教責王誠能飭躬引咎萬紀請入朝言之上意宜解祐因上書謝罪萬紀見帝言祐且自新帝悅厚賜萬紀而仍譙戒祐祐聞萬紀見勞而已蒙責以爲賣己益不平會萬紀又以疑貳繫君薨等制祐不出國門悉暴祐罪于朝祐不勝忿有詔刑部尙書劉德威臨訊頗實帝召祐萬紀還京師祐與燕弘亮等謀射殺萬紀支解之左右勸祐遂發兵乃募城中男子年十五以上悉發私署左右上柱國光祿大夫開府儀同三司托東托西等王斥庫貲行賞驅人築堞浚隍繕甲兵人惡之皆夜縊亡去詔兵部尙書李勣與劉德威發便道兵討之祐日夜引弘亮等五人對其妃宴樂語官軍則弘亮妄言王母憂右手持酒啗左手刀拂之祐信愛弘亮聞之喜帝手敕祐曰吾常戒汝勿近小人正爲此耳往吾子今國讎我上慚皇天下愧后土題畢涕而遣祐檄諸縣縣輒以聞祐窮蹙上表曰臣帝子也爲萬紀讒構上天降靈罪人斯得臣狂失心悄怳驚悸左右無兵



卽欲顛走所以頗仗械以自衛護時勳未至而青淄等州兵已集或勸祐虜子女走豆子毓爲盜計未決兵曹杜行敏夜勒兵鑿垣入祐與弘亮等閉門拒至日中行敏呼曰吾爲國討賊不速降且焚士積薪祐乃出執送京師賜死內侍省貶爲庶人葬以國公禮詔齊州給復一年擢行敏巴州刺史封南陽郡公祐喜養鬪鴨方未反狸齧鴨四十餘絕其頭去及敗牽連誅死者凡四十餘人祐之亂州人羅石頭數祐罪以刀直前刺祐不克殺之詔贈亳州刺史祐嘗引騎徇邑聚野人高君狀曰上親平寇難土地甲兵不勝計今王以數千人爲亂猶一手搖泰山又如君父何祐擊擒之愧其言不能殺詔擢榆杜令

蜀悼王愔貞觀五年始王梁與郟漢申江代五王同封徙王蜀實封八百戶出爲岐州刺史數畋游爲非法帝頻責教不悛怒曰禽獸可擾於人鐵石可爲器愔曾不如之乃削封戶及國官半徙號州久之還戶增至千復出馳弋敗民稼典軍楊道整叩馬諫愔摔擊之御史大夫李乾祐劾愔罪高宗怒貶黃州刺史擢道整匡道府折衝都尉吳王恪得罪愔以母弟廢爲庶人徙巴州俄封涪陵

王薨咸亨初復爵土贈益州大都督陪葬昭陵以子璠嗣王璠武后時謫死歸誠州神龍初以朗陵王禕子禴嗣

蔣王暉始王郟又徙王蔣拜安州都督賜實封千戶永徽三年徙梁州暉造器物服玩多至四百車所經州縣騷然護送爲有司劾奏詔貸不問上元中遷箕州刺史錄事參軍張君徹誣告暉反詔使者按驗暉惶懼自殺高宗知其枉斬君徹贈暉司空荊州大都督陪葬昭陵三子煒煌休道煒初王汝南郡暉薨遂嗣王爲武后所害神龍初以嫡孫紹宗爲嗣蔣王薨子欽福嗣爲率更令煌封蔡國公孫之芳有令譽安祿山奏爲范陽司馬祿山反自拔歸京師歷工部侍郎太子右庶子廣德初詔兼御史大夫使吐蕃被留二歲乃得歸拜禮部尙書改太子賓客休道子琚神龍初封嗣趙王開元中改王中山

越王貞始王漢後徙原已乃封越貞善騎射涉文史有吏幹爲宗室材王武后初遷累太子太傅豫州刺史中宗廢居房陵貞乃與韓王元嘉及王子黃公譔魯王靈夔王子范陽王藹霍王元軌王子江都王緒及子琅邪王沖計議反正

垂拱四年明堂成悉追宗室行享禮共疑后遂大誅戮不遺種事且急讓乃矯帝璽書賜沖曰朕幽繫諸王宜卽起兵於是命長史蕭德琮募兵告諸王師期八月沖先發諸王莫有應者獨貞將兵攻上蔡破之而沖已敗貞稍徇屬縣得士七千列五營貞爲中營以裴守德爲大將軍領中營趙成美爲左中郎將領左營閻弘道爲右中郎將領右營安摩訶爲郎將領後軍王孝志爲右將軍領前軍以韋慶禮爲司馬署官五百然脅誘無鬪志家童皆佩符以辟兵九月后遣左豹韜衛大將軍麴崇裕夏官尙書岑長倩率兵十萬討之以鳳閣侍郎張光輔爲諸軍節度乃下詔削貞父子屬籍改氏虺崇裕等次豫州貞少子規及裴守德拒戰兵潰貞乃閉門守守德者驍勇士貞始起以女妻之委以腹心至是欲殺貞自贖會軍薄城家人白貞今事乃爾王豈受戮辱者邪卽仰藥死規自殺守德與主俱縊起凡二十日敗始貞臨水自鑿不見其首惡之未幾及禍沖貞長子也好學勇而才累遷博州刺史初發有士五千度河趣武水武水令告急魏州州遣莘令馬玄素領兵先乘城沖攻之因風積薪焚其門火作風反

衆心沮解其屬董元寂誦言王與國家戰乃反爾冲斬以徇衆懼遂潰唯家僮數十從之乃走博州爲當關刺死后命丘神勣討之兵未至冲已死起七日敗二弟積溫積常山公坐死溫以前告流嶺南初貞騰檄壽州刺史趙瓌諭以興兵且假道瓌得檄許爲應瓌妻常樂長公主亦趣諸王蚤立功故瓌與主皆死濟州刺史薛顓與其弟紹謀應冲率所部庸調治兵募士冲敗下獄死顓駙馬都尉瓘之子母城陽長公主封河東縣侯紹尙太平公主擢累右玉鈐衛員外將軍以主壻不加戮餓死河南獄神龍初敬暉等奏冲父子死社稷請復爵土爲武三思等沮罷開元四年乃復爵土有司謚死不忘君曰敬五年又詔王嗣絕國除朕甚悼焉其以貞從孫故許王子夔國公琳嗣王奉王祀琳薨爵不傳貞最幼息珍子謫嶺表數世不能歸開元中女孫持四世柩北還求祔王塋詔嘉憫敕宗正寺京兆府爲訪其兆非陪陵者聽葬女名元貞爲道士

紀王慎始王申後徙紀食戶八百貞觀中遷襄州刺史以治當最天子璽書勞勉人爲立石頌德二十三年進戶至千文明初累遷太子太師貝州刺史慎少

好學善星步與越王齊名當世號紀越初貞連諸王起兵慎知時未可獨拒不與合將就誅而免改氏虺載以檻車謫巴州薨于道七子續琮睿秀獻欽證續與秀最知名續王東平歷和州刺史薨

琮義陽王叡楚國公秀襄陽郡公獻廣化郡公欽建平郡公五人並爲武后所殺神龍初以證嗣王擢左驍衛將軍薨子行同嗣琮三子行遠行芳行休始琮與二弟同死桂林開元四年行休請身迎柩既至無封樹議者謂不可復得行休歸地布席以祈是夜夢王乘舟舟判爲二旣而適野見東洲中斷乃悟焉又靈堂鎖一夕莖自屈管上有指迹一奇二並使卜人筮之曰屈於文爲尸出指者示也一奇二並三殯也先王告之矣乃趣其所發之如言而一節獨闕行休號而寢夢琮告曰在洛南州明日直殯南得之於是以三喪歸陪葬昭陵贈琮陳州刺史永昌時行遠行芳斥薺州六道使至行遠先就戮行芳幼當赦抱持請代遂與俱死西南人稱冤悌云慎女東光縣主始八歲聞慎有疾不食父哀之給云已愈主察顏色未平終不肯御內外稱之長適太子司議郎裴仲將時

妃主多恃貴以奢豫相矜主獨儉素姊弟謂曰人生富貴在得志獨勤苦欲何求答曰我幼好禮今行之不違非得志謂何且自古賢妃淑女以恭遜著名驕縱敗德況榮寵貴盛儻來物也可恃以凌人乎及王死號慟嘔血數升免喪絕膏沐者二十年始諸王妃主自垂拱後被害者皆擗掩之神龍初詔州縣普加求訪祭以牲牢復官爵諸王皆陪葬昭獻二陵主聞感慟卒敕其子曰爲我謝親戚酷憤已雪下見先王無恨矣中宗爲舉哀章善門下詔褒揚

江殤王囂封之明年薨無後

代王簡已封薨無後

趙王福貞觀十三年始王出後隱太子累遷梁州都督實封八百戶薨贈司空并州都督陪葬昭陵無子神龍初以蔣王暉孫思順嗣王

曹王明母本巢王妃帝寵之欲立爲后魏徵諫曰陛下不可以辰嬴自累乃止貞觀二十一年始王曹累爲都督刺史高宗詔出後巢王永隆中坐太子賢事降王零陵徙黔州都督謝祐逼殺之帝聞悼甚黔官吏皆坐免景雲中陪葬昭

陵三子俊傑備俊嗣王南州別駕傑爲黎國公垂拱時並及誅神龍初以傑子胤爲嗣曹王是時諸王子孫自嶺外還入見中宗皆號慟帝爲泣下初武后時壯者誅死幼皆沒爲官奴或匿人間庸保至是相繼出帝隨屬遠近封拜云後備自南還詔停胤封而封備歷衛尉少卿同正員薨開元十二年復封胤薨子戡嗣位左衛率府中郎將子臯嗣

臯字子蘭少補左司禦兵曹參軍天寶十一載嗣王事母太妃鄭以孝聞安祿山反奉母逃民間走蜀謁玄宗由都水使者遷左領軍將軍上元初旱歉臯祿不足養請補外不許乃故抵輕法貶温州長史俄攝州事州大饑發官粟數十萬石賑餓者僚史叩庭請先以聞臯曰人日不再食且死何俟命後發哉苟殺我而活衆其利大矣旣貸乃自劾優詔開許就進少府監時殿中侍御史李鈞與其弟京兆法曹參軍鏗宦旣遂不肯還鄉母窮不自給臯行縣見之歎曰入則孝出則悌有餘力則學若二子者可與事君乎哉舉劾之並錮死召還未得見卽上書言治道詔授衡州刺史爲觀察使謾劾貶潮州會楊炎起道州爲

宰相知臯直復用爲衡州刺史初御史覆訊臯懼憂其母出則囚服入乃衣冠  
貌言如平常及爲潮以遷入告至是復位乃言其實建中元年進拜湖南觀察  
使前帥辛京杲貪虐使部將王國良戍武岡賴其富卽劾以死國良恐據縣反  
斂荆黔洪桂兵討之再歲不能下臯至遺書曰觀將軍非敢大逆者特逃讒抗  
死爾將軍遇我可以降我固爲京杲誣者幸蒙雪何忍以兵加將軍哉以爲不  
然我以陣術破將軍陣以攻法屠將軍城非將軍所度也國良得書喜且畏因  
請降然內尙首鼠臯卽日單騎稱使者造國良壘賊延使者入臯大呼其軍曰  
有識曹王者乎乃我也來受良降良今安在一軍愕眙不敢動國良迎拜叩頭  
請罪臯執手約爲昆弟則盡焚攻守具散其兵有詔赦之賜名惟新明年持母  
喪至江陵會梁崇義反奪爲左衛大將軍復觀察湖南李希烈反遷江西節度  
使受命日不宿家至豫章大令將吏曰有功未申與懷器謀不發者皆自言得  
裨校伊慎李伯潛劉旻悉補大將擢王鏐爲中軍以馬彝許孟容爲幕府治戰  
艦哀兵二萬以士二千五百委慎等教之自將五百人教以秦兵團力法聯其



賞罰弛張如一乃約以五百人擊慎卒二千五百莫能當其鋒卽盡以教之初  
慎嘗從希烈平襄州至是希烈懼爲臯用卽反間德宗信之將誅慎臯請赦之  
使自效會與賊夾江陣臯勉慎立功以所乘馬及其鎧賜之使將先鋒斬賊數  
百級乃免賊柵蔡山不可攻臯聲言西取蘄引兵艦循厓沂江上賊聞以羸師  
保柵悉軍行江北與臯直西去蔡山三百里臯遣步士悉登舟順流下攻蔡山  
拔之間一日賊救至遂大敗乃取蘄州降其將李良平黃州兵益振會舒王爲  
元帥授臯前軍兵馬使俄而天子狩奉天鹽鐵使包佶爲陳少游所窘以運糧  
沂江次蘄口希烈使杜少誠將步騎三萬將絕江道臯遣伊慎兵七千禦于永  
安走之以功進工部尙書帝駐梁州臯之貢助相望以天子處外乃不敢居城  
府出屯西塞山大洲徙郡縣爲軍市改戶部尙書又遣伊慎王鏐攻安州未下  
希烈遣劉戒虛以步騎八千援之臯命李伯潛迎擊於應山俘之遂下安州斬  
僞刺史王嘉祥希烈別遣兵援隋州臯破之厲鄉因下平靜白鴈關賊遂不敢  
南略遷荆南節度使賜實封三百戶凡戰大小三十二取州五縣二十斬首三

萬三千擒生萬六千未嘗敗師所過不敢伐桑棗踐禾稼朝廷仰食江淮而西道出九江至大別皆與賊接臯轉戰數千里餉路遂通江漢倚臯爲固淮西平乃請護喪歸東都帝走中人贈弔訖葬來朝還就鎮初江陵東北傍漢有古鄣不治歲輒溢臯修塞之得其下良田五千頃規江南廢洲爲廬舍構二橋跨江而流人自占者二千餘家繇荆抵樂鄉二百里其間墟聚凡數十不井飲臯始命鑿井以便人貞元初吳少誠擅蔡故徙臯鎮山南東道割隋汝以益軍練兵峙糧市回鶻馬以益戰騎歲時大畋以教士少誠畏之臯性勤儉能知人疾苦參聽微隱盡得吏下短長其賞罰必信所至常平物估豪舉不得擅其利教爲戰艦挾二輪蹈之鼓水疾進駛于陣馬有所造作皆用省而利長以物遺人必自視衡量庫帛皆印署以杜吏謾扶風馬彝未知名臯識之卒以正直稱張柬之有園圃在襄陽臯嘗宴集將市取之彝曰漢陽有中興功今遺業當百世共保奈何使其子孫鬻乎臯謝曰主吏失詞以爲君羞微君安得聞此言卒年六十贈尙書右僕射諡曰成臯嘗自創意爲欹器以槩木上出五觚下銳圓爲盂

形所容二豆少則水弱多則疆中則水器力均雖動搖乃不覆云子象古道古象古元和中自衡州刺史擢安南都護貪縱不法驩州刺史楊清者蠻酋也象古忌其豪召爲牙門將常鬱鬱思亂會討黃賊象古發甲助之乃授清兵三千清與子志烈還襲安南殺象古并其家詔赦清爲瓊州刺史以桂仲武爲都護清拒命仲武分諭渠酋兵皆附破城斬清夷其族

道古舉進士獻書闕下擢校書郎集賢院學士累遷司門員外郎歷利隋唐睦四州刺史柳公綽鎮鄂岳爲飛譖上聞憲宗欲代之裴度言嗣曹王臯嘗能以江漢兵制李希烈威惠在人今以其子將必有功會道古自黔中觀察使入朝乃代公綽倍道入其軍公綽惶遽出財貲皆被奪元和十二年攻申州破其郭進圍中城守卒夜驅女子登而譟發懸門以出道古衆亂多死於賊李聽守安州未嘗敗道古誣逐之自將出穆陵關士卒驕不能制又度支錢道古悉以饋權倖故賜不給其下怨怒戰不甚力賊亦易之故再入申不能下卒無功淮西平加檢校御史大夫召爲宗正卿左金吾將軍帝喜服餌道古欲自媚而所善

柳泌自謂能化金爲不死藥乃因宰相皇甫鏘以聞俄會帝崩穆宗爲太子惡之旣立誅泌貶鏘斥道古爲循州司馬終以服丹歐血死長慶初詔還其官道古巧于宦便佞傾下游公卿間常與奕博僞不勝厚進所償嗜利者多得其懽心故少盜美名及死賣宅以葬

唐書卷八十

唐書卷八十考證

曹王明子暉改戶部尙書○舊書加工部尙書

凡戰大小三十二取州五縣二十斬首三萬三千擒生萬六千○臣德潛按舊

書凡下州四縣十七大小十餘陣而韓愈曹成王碑敘討李希烈云大小之戰三十有二取五州十九縣與二書又不皆合也

徙臯鎮山南東道割隋汝以益軍○臣德潛按方鎮表增領唐鄧安與此異

唐書卷八十考證

卷之六

凡此諸物皆以金銀為之○

錢三十貫二兩重限十大錢每二貫又不得有餘

諸物不得用絲十寸大小十粒朝而轉者皆與玉新綠拾奉保保正大小

其與大小三十二兩限在錢二十兩首三兩三十兩並保六千○

其正朝子專地取進商書○諸書取正朝商書

卷之六

唐書卷八十一

宋 端 明 殿 學 士 宋 祁 撰

列傳第六

三宗諸子

高宗八子後宮劉生忠鄭生孝楊生上金蕭淑妃生素節武后生弘賢中宗皇帝睿宗皇帝

燕王忠字正本帝始爲太子而忠生宴宮中俄而太宗臨幸詔宮臣曰朕始有孫欲共爲樂酒酣帝起舞以屬羣臣在位皆舞賚賜有差貞觀二十年始王陳永徽初拜雍州牧王皇后無子后舅柳奭說后以忠母微立之必親己后然之請於帝又奭與褚遂良韓瑗長孫無忌于志寧等繼請遂立爲皇太子后廢武后子弘甫三歲許敬宗希后旨建言國有正嫡太子宜同漢劉彊故事帝召見敬宗曰立嫡若何對曰正本則萬事治太子國本也且東宮所出微今知有正嫡不自安竊位而不自安非社稷計帝曰忠固自讓敬宗曰能爲太伯不亦善

乎於是降封梁王梁州都督賜甲第實封戶二千物二萬段俄徙房州刺史忠  
變懼不聊生至衣婦人衣備刺客數有妖夢嘗自占事露廢爲庶人囚黔州承  
乾故宅麟德初宦者王伏勝得罪於武后敬宗乃誣忠及上官儀與伏勝謀反  
賜死年二十二無子明年太子弘表請收葬許之神龍初追封又贈太尉揚州  
大都督

原悼王孝永徽元年始王許與杞雍二王同封早薨神龍初追封及謚

澤王上金始王杞永徽三年遙領益州大都督歷郿壽二州刺史武后疾其母  
故有司誣奏削封邑徙置澧州久之後陽若可喜者表杞王上金鄱陽王素節  
聽朝集義陽宣城二公主各增夫秩由是上金爲沔州刺史素節岳州刺史然  
卒不朝高宗崩詔上金素節二公主赴哀文明元年徙王畢又徙王澤歷五州  
刺史載初中武承嗣諷周興誣上金素節謀反召繫御史獄上金聞素節已被  
殺卽雉經七子並流死顯州神龍初追還官爵以子義珣嗣王義珣始被謫匿  
身爲傭保而嗣許王瓘利其爵邑告義珣假冒復流嶺外開元初以素節子璆



爲後而玉真公主表義珣實上金子乃奪璆爵復使義珣嗣王拜率更令薨子  
漣嗣

許王素節始王雍授雍州牧方羈卽誦書日千言師事徐齊聃淬勉自彊帝  
愛之轉岐州刺史更王郇母被譖死出素節爲申州刺史乾封初詔素節病無  
入朝而實不病乃著忠孝論自明倉曹參軍張柬之以聞欲帝省其誣武后滋  
不悅坐受賊降王鄱陽削封戶什七徙置袁州錮終身儀鳳三年爲岳州刺史  
更王葛又徙王歷三州刺史與上金同追逮赴都道聞遭喪哭者謂左右曰病  
死何可得而須哭哉至龍門驛被縊年四十三葬以庶人禮子瑛等九人並誅  
惟琳瓘璆欽古尙幼長囚雷州中宗復位追故封又贈開府儀同三司許州刺  
史陪葬乾陵詔瓘嗣王實封戶四百開元初封琳爲嗣越王璆嗣澤王琳至右  
監門衛將軍子隨封夔國公瓘爲衛尉卿以抑上金子不得封貶鄂州別駕因  
詔外繼嗣王者皆歸宗乃以嗣江王禕爲信安王嗣蜀王禴爲廣漢王嗣密王  
徹爲濮陽王嗣曹王臻爲濟國公嗣趙王琚爲中山王武陽王繼宗爲禮國公

瓘累遷太子詹事薨贈蜀郡大都督二子解需皆幼以璆子益嗣天寶十四載解始襲封王

璆初封嗣澤王降爲郢國公宮宗正光祿卿進封襄信王初張九齡撰龍池頌刊石興慶宮宗子以爲不稱盛德更命璆爲頌建花萼樓北天寶初復拜宗正卿性友弟聰敏宗子有一善無不薦延故宗室在省闈者多璆所啓薨贈江陵郡大都督三子謙爲郢國公梓州刺史巽汝南郡公欽古封巴國公子賁嗣孝敬皇帝弘永徽六年始王代與潞王同封顯慶元年立爲皇太子受春秋左氏於率更令郭瑜至楚世子商臣弑其君喟而廢卷曰聖人垂訓何書此邪瑜曰孔子作春秋善惡必書褒善以勸貶惡以誠故商臣之罪雖千載猶不得滅弘曰然所不忍聞願讀它書瑜拜曰里名勝母曾子不入殿下睿孝天資黜凶悖之迹不存視聽臣聞安上治民莫善於禮故孔子稱不學禮無以立請改受禮太子曰善四年加元服又命賓客許敬宗右庶子許圜師中書侍郎上官儀中舍人楊思儉卽文思殿擿采古今文章號瑤山玉彩凡五百篇書奏帝賜物

三萬段餘臣賜有差又詔五日一赴光順門決事總章元年釋菜國學請贈顏回爲太子少師曾參太子少保制可會有司以征遼士亡命及亡命不卽首者身殊死家屬沒官弘諫以爲士遇病不及期或被略若溺壓死而軍法不因戰亡則同隊悉坐法家曰亡命而家屬與真亡者同沒傳曰與殺不辜寧失不經臣請條別其科無使淪胥詔可帝幸東都詔監國時關中饑弘視廡下兵食有榆皮蓬實者悄然命家令寺給米義陽宣城二公主以母故幽掖廷四十不嫁弘聞貽惻建請下降武后怒卽以當上衛士配之由是失愛又請以同州沙苑分假貧民會納妃裴而有司奏費用白鴈適苑中獲之帝喜曰漢獲朱鴈爲樂府歌今得白鴈爲婚贅婚乃人倫首我則無慚禮畢曲赦岐州帝嘗語侍臣弘仁孝賓禮大臣未嘗有過而后將騁志弘奏請數拂旨上元二年從幸合璧宮遇酖薨年二十四天下莫不痛之詔曰太子嬰沈瘵朕須其痊復將遜于位弘性仁厚旣承命因感結疾日以加宜申往命諡爲孝敬皇帝葬緱氏墓號恭陵制度盡用天子禮百官從權制三十六日釋服帝自製睿德紀刻石陵側營陵

功費鉅億人厭苦之投石傷所部官司至相率亡去妃薨諡哀皇后無子永昌  
初以楚王隆基嗣中宗立詔以主祔太廟號義宗開元中有司奏孝敬皇帝宜  
建廟東都以諡名廟詔可於是罷義宗號妃卽裴居道女有婦德而居道以妃  
故拜內史納言歷太子少保翼國公爲酷吏所陷下獄死

章懷太子賢字明允容止端重少爲帝愛甫數歲讀書一覽輒不忘至論語賢  
賢易色一再誦之帝問故對曰性實愛此帝語李世勣稱其夙敏始王潞歷幽  
州都督雍州牧徙王沛累進揚州大都督右衛大將軍更名德徙王雍仍領雍  
州牧涼州大都督實封千戶上元年復名賢是時皇太子薨其六月立賢爲皇  
太子俄詔監國賢於處決尤明審朝廷稱焉帝手勅褒賜賢又詔集諸儒左庶  
子張大安洗馬劉訥言洛州司戶參軍格希玄學士許叔牙成玄一史藏諸周  
寶寧等共注范曄後漢書書奏帝優賜段物數萬時正諫大夫明崇儼以左道  
爲武后所信崇儼言英王類太宗而相王貴賢聞惡之宮人或傳賢乃后姊韓  
國夫人所生賢益疑而后撰少陽政範孝子傳賜賢數以書讓勒愈不安調露

中天子在東都崇儼爲盜所殺后疑出賢謀遣人發太子陰事詔薛元超裴炎高智周雜治之獲甲數百首於東宮帝素愛賢薄其罪后曰賢懷逆大義滅親不可赦乃廢爲庶人焚甲天津橋貶大安普州刺史流訥言於振州坐徙者十餘人開耀元年徙賢巴州武后得政詔左金吾將軍丘神勣檢衛賢第迫令自殺年三十四后舉哀顯福門貶神勣疊州刺史追復舊王神龍初贈司徒遣使迎喪陪葬乾陵睿宗立追贈皇太子及諡三子光順守禮守義光順爲樂安王徙義豐被誅守義爲犍爲王徙封桂陽薨先天中追封光順莒王守義畢王守禮嗣王始名光仁授太子洗馬武后革命畏疾宗室而守禮以父得罪與睿宗諸子閉處宮中十餘年睿宗封相王許出外邸於是守禮等始居外改司議郎中宗卽位復故封拜光祿卿實封戶五百唐隆元年進封邠王睿宗立兼檢校左金吾衛大將軍出爲幽州刺史遙兼單于大都護遷司空開元初累爲州刺史時寧申岐薛王同爲刺史皆擇僚首持綱紀守禮惟弋獵酣樂不領事故源乾曜袁嘉祚潘好禮皆爲邠府長史州佐督檢之後還諸王京師守禮以外

支爲王不甚才而多寵嬖子六十餘人無可稱者常負息錢數百萬或勸少治居產守禮曰豈天子兄無葬者邪諸王每白上以爲歡岐王嘗奏守禮知兩賜帝問故答曰臣無宅當天后時太子被罪臣幽宮中歲被勅杖凡四三累創痕膚前兩則沈懣霽則佳以此知之因泣下帝爲惻然薨年七十贈太尉子承宏承寧承案可記者

承宏爵廣武王坐交非其人貶房州別駕還爲宗正卿廣德元年吐蕃入京師天子如陝虜宰相馬重英立承宏爲帝以翰林學士于可封霍瓌爲宰相賊退詔放承宏于華州死承寧封嗣邠王

承案燉煌王拜宗正卿與僕固懷恩使回紇和親卽納其女爲妃封毗伽公主薨贈司空唐制嗣郡王加四品階親王子服緋開元中張九齡奏寧薛及邠王三子爲王者賜紫餘皆服緋官不越六局郎王府掾屬仍員外置後從帝至蜀者皆服紫

中宗四子韋庶人生重潤後宮生重福重俊殤帝

懿德太子重潤本名重照避武后諱改焉帝爲皇太子時生東宮高宗喜甚乳月滿爲大赦天下改元永淳是歲立爲皇太孫開府置官屬帝問吏部侍郎裴敬彝郎中王方慶對曰禮有嫡子無嫡孫漢魏太子在子但封王晉立愍懷子爲皇太孫齊立文惠子爲皇太孫皆居東宮今有太子又立太孫於古無有帝曰自我作古若何對曰禮君子抱孫不抱子孫可以爲王父尸者昭穆同也陛下肇建皇孫本支千億之慶帝說詔議官屬敬彝等奏置師傅友文學祭酒左右長史東西曹掾主簿管記司錄六曹等官加王府一級然卒不補將封嵩山召太子赴東都以太孫留守京師中宗失位太孫府廢貶庶人別囚之帝復位封邵王大足中張易之兄弟得幸武后或譖重潤與其女弟永泰郡主及主壻竊議后怒杖殺之年十九重潤秀容儀以孝愛稱誅不緣罪人皆流涕神龍初追贈皇太子及謚陪葬乾陵號墓爲陵贈主爲公主

譙王重福高宗時王唐昌郡徙封平恩長安末乃進王神龍初韋庶人譖與張易之兄弟陷重潤貶濮州員外刺史徙合均二州不領事景龍三年中宗親郊

赦天下十惡者咸宥流人得還重福不得歸自陳蒼生皆自新而一子擯棄皇天平分固若此乎不報章后得政詔左屯衛大將軍趙承恩薛思簡以兵護守睿宗立徙集州未行洛陽男子張靈均說重福曰大王居嫡長當爲天子相王雖平大難安可越居大位昔漢誅諸呂乃東迎代王今百官士庶皆願王來王若陰幸東都殺留守擁兵西據陝徇河南河北天下可圖也重福又遣靈均與其黨鄭愔計愔亦密招重福爲天子預尊睿宗爲皇季叔重茂皇太弟制稱中元克復元年愔自署左丞相知內外文武事以靈均爲右丞相天柱大將軍知出征事其餘以次除署重福自均州與靈均乘驛趨東都舍駙馬裴巽家洛陽令候巽重福驚遽出欲劫左右屯營兵至天津橋願從者數百人侍御史李邕遇之先馳至右屯營呼曰譙王得罪先帝擅入都爲亂公等勉立功取富貴稍閉皇城諸門以拒重福徇右營不能動趨左掖門已闔怒縱火燒之左營兵寢逼衆遂潰重福走山谷留守裴談總兵大索投漕渠死年三十一磔其屍帝

詔以三品禮葬



節愍太子重俊聖曆三年王義興神龍初王衛拜洛州牧實封千戶俄領揚州大都督明年爲皇太子以太后喪殺冊禮詔在藩食封歲納東宮給事中盧粲上言太子與列國同入封不可爲法詔罷之重俊性明果然少法度旣楊璈武崇訓爲賓客二人馮貴寵無學術惟狗馬蹴鞠相戲昵左庶子姚瑛數上疏諍導右庶子平貞慎又獻孝經議養德等傳太子納而不克用武三思挾韋后勢將圖逆內忌太子而崇訓又三思子尙安樂公主常教主辱重俊以非韋出置爲奴數請廢自爲皇太女三年七月重俊恚忿遂率李多祚洎左羽林將軍李思冲李承況獨孤禕之沙吒忠義矯發左羽林及千騎兵殺三思崇訓并其黨十餘人使左金吾大將軍成王千里守宮城自率兵趨肅章門斬關入索韋后安樂公主昭容上官所在后挾帝升玄武門宰相楊再思蘇瓌李嶠及宗楚客紀處訥統兵二千餘人守太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃我爪牙忽爲亂能斬賊者有賞於是士倒戈斬多祚餘黨潰重俊亡入終南山欲奔突厥楚客遣果毅趙思慎

追之重俊憇于野爲左右所殺詔殊首朝堂獻太廟并以告三思崇訓樞睿宗立加贈諡陪葬定陵初重俊被害官屬莫敢視惟永和丞寧嘉勗號哭解衣裹其首時人義之楚客怒收付獄貶平興丞卒至是亦贈求和令重俊子宗暉景雲三年封湖陽郡王天寶中至太常員外卿薨

睿宗六子肅明皇后生憲宮人柳生撝昭成皇后生玄宗皇帝崔孺人生範王德妃生業後宮生隆悌

讓皇帝憲始王永平文明元年武后以睿宗爲皇帝故憲立爲皇太子睿宗降爲皇嗣更冊爲皇孫與諸王皆出閣開府置官屬長壽二年降王壽春與衡陽巴陵彭城三王同封復詔入閣中宗立改王蔡固辭不敢當唐隆元年進封宋睿宗將建東宮以憲嫡長又嘗爲太子而楚王有大功故久不定憲辭曰儲副天下公器時平則先嫡國難則先功重社稷也使付授非宜海內失望臣以死請因涕泣固讓時大臣亦言楚王有定社稷功且聖庶抗嫡不宜更議帝嘉憲讓遂許之立楚王爲皇太子以憲爲雍州牧揚州大都督太子太師實封至二

千戶賜甲第物段五千良馬二十奴婢十房上田三十頃進尚書右僕射又兼  
司徒讓司徒更爲太子賓客時太平公主有醜圖姚元崇宋璟白帝請出憲及  
申王成義爲刺史以銷釋陰計乃以司徒兼蒲州刺史進司空玄宗旣討定蕭  
岑之難進憲位太尉增千戶固辭更授開府儀同三司解太尉揚州大都督徙  
王寧又兼太常卿開元十四年表解卿久之復爲太尉歷澤岐涇三州刺史累  
封至五千五百戶二十九年薨初帝五子列第東都積善坊號五王子宅及賜  
第上都隆慶坊亦號五王宅玄宗爲太子嘗製大衾長枕將與諸王共之睿宗  
知喜甚及光天後盡以隆慶舊邸爲興慶宮而賜憲及薛王第於勝業坊申岐  
二王居安興坊環列宮側天子於宮西南置樓其西署曰花萼相輝之樓南曰  
勤政務本之樓帝時時登之聞諸王作樂必亟召升樓與同榻坐或就幸第賦  
詩燕嬉賜金帛侑歡諸王曰朝側門旣歸卽具樂縱飲擊毬鬪鷄馳鷹犬爲樂  
如是歲月不絕所至輒中使勞賜相踵世謂天子友悌古無有者帝於敦睦蓋  
天性然雖讒邪亂其間而卒無以搖時以鶴鴿千數集麟德殿廷樹翔棲浹日

左清道率府長史魏光乘作頌以爲天子友悌之祥帝喜亦爲作頌憲尤謹畏未嘗干政而與人交帝益信重嘗以書賜憲等曰魏文帝詩西山一何高高殊無極上有兩仙童不飲亦不食賜我一丸藥光耀有五色服之四五日身體生羽翼朕每言服藥而求羽翼寧如兄弟天生之羽翼乎陳思王之才足以經國絕其朝謁卒使憂死魏祚未終司馬氏奪之豈神丸效耶虞舜至聖捨象傲以親九族九族旣睦平章百姓今數千載天下歸善焉此朕廢寢忘食所慕歎也頃因餘暇選仙錄得神方云餌之必壽今持此藥願與兄弟共之偕至長齡永永無極也後申王等相繼薨唯憲在帝親待愈益厚每生日必幸其第爲壽往往留宿居常無日不賜遺尙食總監及四方所獻酒酪異饌皆分餉之憲嘗請歲盡錄賜目付史官必數百紙後有疾護醫將膳騎相望也僧崇一者療之少損帝喜甚賜緋袍銀魚已而疾寢劇薨年六十三帝失聲號慟左右皆泣下帝以憲實推天下有高世之行非大號不稱乃追諡讓皇帝遣尙書左丞相裴耀卿太常卿韋縉持節奉冊其子璉表陳憲宿素退讓不敢當大號制不許及

斂出天子服一稱詔右監門大將軍高力士以手書寘靈坐贈妃元爲恭皇后  
葬橋陵旁及葬勅中使諭璉等送終之具使衆見之示以儉薄所司請如諸陵  
設千味食內壙中監護使耀卿建言尙食料水陸千餘種及馬牛驢犢麋鹿鵝  
鴨魚鴈體節之味并藥酒三十名盛夏胎養不可多殺考求禮據無所憑依陛  
下每申讓帝之志務存約素請蠲省折衷詔可旣發引大雨有詔慶王潭等涉  
途泥步送十里號其墓曰惠陵憲常從帝按舞萬歲樓從複道上見衛士已食  
棄其餘竇中帝怒詔高力士杖殺之憲從容曰從複道上窺人之私恐士不自  
安且失大體豈以性命輕於餘飧乎帝遽止謂力士曰王於我可謂有急難也  
不然且誤殺士又涼州獻新曲帝御便坐召諸王觀之憲曰曲雖佳然宮離而  
不屬商亂而暴君卑逼下臣僭犯上發於忽微形於音聲播之詠歌見於人事  
臣恐一日有播遷之禍帝默然及安史亂世乃思憲審音云憲本名成器避昭  
成太后諡與申王成義俱改今名憲子十九人其聞者璉嗣莊琳瑤

璉眉宇秀整性謹潔善射帝愛之封汝陽王歷太僕卿與賀知章褚庭誨梁涉

等善薨贈太子太師嗣莊幼有令名爲太子左諭德封濟陰王薨贈幽州大都督琳以祕書監爲嗣寧王從天子幸蜀薨

瑀早有材望偉儀觀始封隴西郡公從帝幸蜀至河池封漢中王山南西道防禦使乾元初寧國公主降回紇詔瑀以特進太常卿持節冊拜回紇爲威遠可汗瑀亦知音嘗早朝過永興里聞笛音顧左右曰是太常工乎曰然它日識之曰何故臥吹笛工驚謝又聞康崑崙奏琵琶曰琵琶聲多琵琶聲少是未可彈五十四絲大絃也樂家以自下逆鼓曰琵琶自上順鼓曰琵琶云肅宗詔收羣臣馬助戰瑀與魏少游等持不可帝怒貶蓬州長史薨贈太子太師諡曰宣孫景儉

景儉字寬中及進士第彊記多聞善言古成敗王霸大略高自負於士大夫無所屈王叔文等更譽之以爲管仲諸葛亮比叔文敗景儉以母喪得不坐韋夏卿守東都辟幕府竇羣任中丞引爲監察御史羣貶景儉亦爲江陵戶曹參軍累擢忠州刺史元和末入朝不見用復爲澧州刺史素與元稹李紳善二人方在翰林言其才及延英奉辭景儉自陳見抑遠穆宗憐之追詔爲倉部員外郎

不遣閱月拜諫議大夫性矜誕使酒縱氣語侵宰相蕭俛段文昌訴于帝貶建州刺史稹得君爲之助故還爲諫議大夫與馮宿楊嗣復溫造李肇等集史官獨孤朗所景儉醉至中書慢罵宰相王播崔植杜元穎更爲遜言厚謝乃去坐貶漳州刺史宿等皆逐矣未及漳稹輔政改楚州刺史議者謂景儉辱丞相貶未至卽遷非是稹懼改少府監悉還宿等景儉旣湮阨不得志卒然其爲人輕財篤於義旣沒士悵悼之

莊惠太子撫本名成義初生武后以母賤欲不齒以示浮屠萬回回詭曰此西土樹神宜兄弟后喜乃畜之垂拱三年始王恆與衛趙二王同封俄改王衡陽睿宗立進王申與岐薛二王同封累遷右衛金吾二大將軍實封至千戶進司徒兼益州大都督四爲州刺史開元八年停刺史復爲司徒薨冊書贈太子及謚陪葬橋陵撫性寬裕儀貌瓌重無嗣詔以讓帝子珣嗣爲懷寧王徙封同安薨天寶中復以讓帝子瑋嗣

惠文太子範始名隆範玄宗立與薛王隆業避帝諱去二名初王鄭改封衛俄

降封巴陵進王岐爲太常卿并州大都督左羽林大將軍從玄宗誅太平公主以功賜封與薛王業並滿五千戶歷爲州刺史遷太子太傅開元十四年薨冊書贈太子及謚陪葬橋陵帝哭之慟徹常膳至累旬羣臣勉請乃復範好學工書愛儒士無貴賤爲盡禮與閭朝隱劉延琦張諤鄭絲等善常飲酒賦詩相娛樂又聚書畫皆世所珍者初隋亡禁內圖書湮放唐興募訪稍稍復出藏祕府長安初張易之奏天下善工潢治乃密使摹肖殆不可辨竊其真藏于家旣誅悉爲薛稷取去稷又敗範得之後卒爲火所焚駙馬都尉裴虛己善讖緯坐私與範游徙嶺南延琦貶雅州司戶諤爲山莊丞然帝於範無少間也謂左右曰兄弟情天至於我豈有異哉趨競者彊相附我終不以爲纖介時王毛仲等起賤微暴貴諸王見必加禮獨範接之自如子瑾嗣瑾落魄不飭名檢沈酒色歷太僕卿封河東王暴薨贈太子少師天寶中復以薛王子略陽公珍爲嗣岐王珍儀觀豐偉爲宗正員外卿與蔚州鎮將朱融善融嘗言珍似上皇因有陰謀往語金吾將軍邢濟曰關外寇近京師草草奈何濟曰我金吾天子押衙以死



生從安自脫融曰見嗣岐王無慮矣濟以聞肅宗詔廢珍爲庶人賜死融黨皆誅擢濟爲桂管防禦使

惠宣太子業始王趙降封中山授都水使者徙彭城兼陳州別駕進王薛爲羽林大將軍荊州大都督以好學授祕書監開元初進太子少保卽拜太保累歷州刺史初母早終從母賢妃鞠之八年迎賢妃外郎事之甚謹其女弟淮陽涼國二公主亦早卒撫甥與己子均帝益愛之嘗被疾帝自祝禱旣瘳幸其第置酒賦詩爲初生歡帝嘗不豫業妃弟內直郎韋賓與殿中監皇甫恂妄言休咎事賓坐死恂貶錦州刺史妃恐降服待罪業亦不敢入謁帝聞遽召之業伏殿下請罪帝趨就執其手曰吾所猜于兄弟者天地共咎之遂復燕歡仍諭妃復位俄進司徒二十二年業有疾帝憂之一昔容髮爲變因假寢夢獲方寤而業少間邠王守禮等請以事付史官及薨帝悲不能食冊書加贈及謚陪葬橋陵十一子其聞者瑗瑒瑒帝後追思業引見瑗等傷之乃下詔共賜實封千戶瑗爲樂安王瑒滎陽王宗正卿瑒爲嗣薛王歷鴻臚卿天寶中瑒舅韋堅爲李林

甫所構坐貶夷陵別駕徙置夜郎南浦及安祿山亂乃還京師

曾孫知柔嗣王再爲宗正卿久之擢京兆尹始鄭白渠梗墮民不得歲知柔調三輔治復舊道灌浸如約遂無旱虞民詣闕請立石紀功知柔固讓得止加累檢校司徒同中書門下平章事又詔營緝太廟判度支充諸道鹽鐵轉運使昭宗出莎城獨知柔從乘輿器用庖頓皆主之大細畢給性儉約雖位通顯無居第未幾出拜清海軍節度使在鎮廉潔貢獻時入進檢校太傅兼侍中仕凡四紀常爲宗室冠卒于鎮

隋王隆悌始封汝南王早薨睿宗追王贈荊州大都督爵不傳

贊曰中宗失道身爲母所廢妻所弑而四子皆不得其死嗣亦不傳殆天穢其德而絕之何耶彼固自絕于天云爾睿宗有聖子一受命一追帝三贈太子天與之報福流無窮盛歟

唐書卷八十一考證

章懷太子孫承宏賊退詔放承宏于華州死承寧封嗣邠王○沈炳震曰舊書止放號州尋死承寧天寶初授率更令同正員

謙王重福傳貶濮州員外刺史徙合均二州○沈炳震曰舊書貶濮州後轉均州無合州文

讓皇帝憲傳進尚書右僕射○舊書作拜尚書左僕射

憲子十九人○舊書作憲凡十子

唐書卷八十一考證

八十一

○

○

○

○

八十一

唐書卷八十二

宋 端 明 殿 學 士 宋 祁 撰

列傳第七

十一宗諸子

玄宗三十子劉華妃生琮第六子琬第十二子璿趙麗妃生瑛元獻皇后生肅  
宗皇帝錢妃生琰皇甫德儀生瑤劉才人生琚武惠妃生一第十五子敏第十  
八子璿第二十一子琦高婕妤生璪郭順儀生璘柳婕妤生玢鍾美人生環盧  
美人生瑄閻才人生玼王美人生珪陳才人生珙鄭才人生璿武賢儀生璿第  
三十子璪餘七子天母氏失傳

奉天皇帝琮景雲元年王許昌郡與真定王同封先天元年進王郟與郢王同  
封開元四年領安西大都護安撫河東關內隴右諸蕃大使十三年徙王慶與  
忠棟榮光儀賴永壽延盛濟十一王同封十五年與十五王並領節度不出閭琮  
以涼州都督兼河西諸軍節度大使天寶元年改節河東十載薨贈太子諡靖

德肅宗立詔曰靖德太子琮親則朕兄睿愍聰明朕昔踐儲極顧誠非次君父有命不敢違永言懇讓不克如素宜進諡奉天皇帝妃竇爲恭應皇后詔尙書右僕射裴冕持節改葬羣臣素服臨送達禮門帝御史哭以過喪墓號齊陵無子以太子瑛子佖嗣王琮始名嗣直太子嗣謙棟王嗣真鄂王嗣初靖恭太子嗣玄開元十三年更名曰潭曰鴻曰洽曰涓曰滉後十年改今名

太子瑛始王真定進王郢開元三年立爲皇太子七年詔太子諸王入國學行齒胄禮太常擇日謁孔子太子獻詔右散騎常侍褚無量執經羣臣學官諸生以差賜帛明年瑛加元服見太廟十六年詔九品官息女可配太子者有司採閱待進止以太常少卿薛紹女爲妃帝種麥苑中瑛諸王侍登帝曰是將薦宗廟故親之亦欲若等知稼穡之難因分賜侍臣曰春秋書無麥禾古所甚重比詔使者閱田畝所對不以實故朕自蒔以觀其成云初瑛母以倡進善歌舞帝在潞得幸及卽位擢妃父元禮兄常奴皆至大官鄂光二王母亦帝爲臨淄王時以色選及武惠妃寵幸傾後宮生壽王愛與諸子絕等而太子二王以母失

職頗快快惠妃女咸宜公主壻揚洄揣妃旨伺太子短譁爲醜語惠妃訴于帝且泣帝大怒召宰相議廢之中書令張九齡諫曰太子諸王日受聖訓天下共慶陛下享國久子孫蕃衍奈何一日棄三子昔晉獻公惑嬖姬之讒申生憂死國乃大亂漢武帝信江充巫蠱禍及太子京師喋血晉惠帝有賢子賈后譖之乃至喪亡隋文帝聽后言廢太子勇遂失天下今太子無過二王賢父子之道天性也雖有失尙當掩之惟陛下裁赦帝默然太子得不廢俄而九齡罷李林甫專國數稱壽王美以握妃意妃果德之二十五年洄復構瑛瑤瑑與妃之兄薛鏞異謀惠妃使人詭召太子二王曰宮中有賊請介以入太子從之妃白帝曰太子二王謀反甲而來帝使中人視之如言遽召宰相林甫議答曰陛下家事非臣所宜豫帝意決乃詔太子瑛鄂王瑤光王瑑同惡均罪並廢爲庶人鏞賜死瑛瑤瑑遇害天下寃之號三庶人歲中惠妃數見庶人爲祟因大病夜召巫祈之請改葬且射行刑者瘞之訖不解妃死崇亡寶應元年詔贈瑛皇太子瑤等復王瑛子五人儼伸倩佺備瑛之廢帝使慶王畜儼等爲子儼封新平

郡王伸平原郡王侁嗣慶王備太僕卿倩失傳

棟王琰開元二年始王鄆與鄂鄂二王同封後徙王棟領太原牧太原以北諸軍節度大使天寶初爲武威郡都督經略節度河西隴右會妃韋以過置別室而二孺人爭寵不平求巫者密置符琰履中以求媚讎人告琰厭魅上帝伺其朝使人取履視之信帝怒責琰琰頓首謝曰臣罪宜死然臣與婦不相見二年有二孺人爭長臣恐此三人爲之及推果驗然帝猶疑琰怒未置太子以下皆爲請乃囚於鷹狗坊以憂薨妃縉之女無子還本宗琰凡五十五子得王者四人僕王汝南郡僑宜都俊濟南倭順化僚太僕卿俠國子祭酒仁殿中監優祕書監寶應元年詔復琰王爵

鄂王瑤旣封遙領幽州都督河北節度大使開元二十三年與榮光儀賴永壽延盛濟信義十一王並授開府儀同三司實封二千戶詔詣東宮尙書省上日百官集送有司供張設樂是日悉拜王府官屬然未有府也而選任冒濫時不以爲榮



靖恭太子琬始王郾徙王榮爲京兆牧領隴右節度大使又詔親巡按隴右選關內河東飛騎五萬防盛秋累兼單于安北大都督安祿山反詔琬爲征討元帥募河隴兵屯陝以高仙芝副之會薨琬風格秀整有素望中外倚之及薨莫不爲國悵恨詔加贈諡琬男女五十八人得王者三人俯王濟陰郡偕北平倩陳留原衛尉卿儋祕書監佩鴻臚卿

光王瑊開元十三年始王與儀穎永壽延盛濟七王同封俄領廣州都督勇力善騎射帝愛之與鄂王同居友睦甚皆篤學旣廢無嗣初瑊名湑儀王維穎王湮永王澤壽王清延王洄盛王沐濟王溢信王沔義王灌陳王沘豐王澄恆王漣涼王縱汴王滔至二十三年詔悉改今名

夏悼王一生韶秀以母寵故鍾愛命之曰一未免懷薨追爵及諡時帝在東都故葬龍門東岑欲宮中望見云

儀王璿旣封授河南牧薨贈太傅子侁王鍾陵郡健廣陵

穎王璵喜讀書好文辭開元十五年遙領安東都護安祿山反詔領劍南節度

大使以楊國忠爲之副帝西出令御史大夫魏方進爲置頓使移書劍南屬郡  
託璈之藩大設儲侍璈先卽鎮更以蜀郡長史崔圓爲副璈濟江舟中以綵席  
藉步命徹之曰此可寢奈何踐之璈之出遽不及受節司馬史賁請建大槩蒙  
油囊先驅以威道路璈笑曰旣爲真王矣安用假節爲將至成都崔圓迎拜馬  
前璈不爲禮圓銜之璈視事再踰月人便其寬圓奏罷居內宅乃詔宣慰肅宗  
於彭原從還京師建中四年薨年六十六子伸爲滎陽王儁高邑王倪楚國公  
傳夔國公

懷思王敏貌豐秀若圖畫帝愛之甫晬薨追爵及謚祔葬敬陵

永王璘少失母肅宗自養視之長聰敏好學貌陋甚不能正視旣封領荊州大  
都督安祿山反帝至扶風詔璘卽日赴鎮俄又領山南江西嶺南黔中四道節  
度使以少府監竇昭爲副璘至江陵募士得數萬補署郎官御史時江淮租賦  
鉅億萬在所山委璘生宮中於事不通曉見富且強遂有闕江左意以薛鏐李  
臺卿韋子春劉巨鱗蔡駟爲謀主肅宗聞之詔璘還覲上皇子蜀璘不從其子

襄成王傷剛驚乏謀亦樂亂勸璘取金陵卽引舟師東下甲士五千趨廣陵以  
渾惟明季廣琛高仙琦爲將然未敢顯言取江左也會吳郡採訪使李希言平  
牒璘璘因發怒曰寡人上皇子皇帝弟地尊禮絕今希言乃平牒抗威落筆署  
字何邪乃使惟明襲希言而令廣琛趨廣陵攻採訪使李成式璘至當塗希言  
已屯丹陽遣將元景曜等拒戰不勝降於璘江淮震動明年肅宗遣宦者啖廷  
瑤等與成式謀招諭之時河南招討判官李銑在廣陵有兵千餘廷瑤邀銑屯  
楊子成式又遣裴戎以廣陵卒三千戍伊婁埭張旗幟大閱士璘與傷登陴望  
之有懼色廣琛知事不集謂諸將曰與公等從王豈欲反邪上皇播遷道路不  
通而諸子無賢於王者如總江淮銳兵長驅雍洛大功可成今乃不然使吾等  
名縫叛逆如後世何衆許諾遂割臂盟於是惟明奔江寧馮季康奔白沙廣琛  
以兵六千奔廣陵璘使琦追躡之廣琛曰我德王故不忍決戰逃命歸國耳若  
逼我且決死追者止乃免是夜銑陣江北夜然束輦人執二炬景亂水中覘者  
以倍告璘軍亦舉火應之璘疑王師已濟攜兒女及麾下遁去遲明覺其給復

入城具舟楫使傷驅衆趨晉陵謀者告曰王走矣成式以兵進先鋒至新豐璘使傷仙琦逆擊之銑合勢張左右翼射傷中肩軍遂敗仙琦與璘奔鄱陽司馬閉城拒璘怒焚城門入之收庫兵掠餘千將南走嶺外皇甫侁兵追及之戰大庾嶺璘中矢被執侁殺之傷爲亂兵所害仙琦逃去璘未敗時上皇下誥降爲庶人徙置房陵及死侁送妻子至蜀上皇傷悼久之肅宗以少所自鞠不宣其罪謂左右曰皇甫侁執吾弟不送之蜀而擅殺之何邪由是不復用薛鏐等皆伏誅子儻爲餘姚王偵莒國公儼郟國公伶儀並國子祭酒

壽王瑁母惠妃嬪姓不育及瑁生寧王請養邸中元妃自乳之名爲己子故封比諸王最後開元十五年遙領益州大都督初帝以永王等尙幼詔不入謁瑁七歲請與諸兄衆謝拜舞有儀矩帝異之寧王薨請制服以報私恩詔可太歷十年薨贈太傅子王者三人僂王德陽郡伉濟陽郡倓廣陽郡伉薛國公傑國子祭酒

延王玢母尙書左丞範之孫帝重其名家而玢亦仁愛有學旣封遙領安西大

都護帝入蜀玠凡三十六子不忍棄故徐進數日見行在所帝怒漢中王瑀申  
救得解聽歸靈武興元元年薨子倬王彭城郡徙平陽僚魯國公偃荆國公仇  
太僕卿

盛宣王琦既封領揚州大都督帝之西詔爲廣陵大都督淮南江東河南節度  
大使以劉彙爲副李成式爲副大使琦不行廣德二年薨贈太傅子償封真定  
王佩武都王俗徐國公係許國公

濟王環逸其薨年子儵王永嘉郡俛平樂郡

信王瑄開元二十一年始王與義陳豐恆涼汴六王同封子修封新安王侗晉  
陵王

義王玘與信王並失薨年子儀爲舞陽王僂高密王

陳王珪二十一子得王者三人倫王安南郡佗臨淮佻安陽

豐王珙已封爲左衛大將軍帝至普安授珙武威都督河西隴右安西北庭節  
度大使以隴西太守鄧景山爲副珙不行廣德初吐蕃入京師代宗幸陝將軍

王懷忠閉苑門以五百騎劫諸王西迎虜遇郭子儀懷忠曰上東遷宗社無主今僕奉諸王西奔以係天下望公爲元帥惟所廢置子儀未對琪輒曰公何如司馬王延昌質責琪曰上雖蒙塵未有失德王爲藩翰安得狂悖之言子儀亦讓之卽護送行在所帝赦不責琪語不遜羣臣恐其亂請除之乃賜死子佻爲齊安王

恆王瑱好方士常服道士服從帝幸蜀還代宗時薨

涼王璿母高平王重規之女宮中號小武妃者璿薨代宗時子佻爲瀘陽郡王汴哀王璿於諸子爲最少初封纔數歲容貌秀澈有成人風帝愛之開元二十三年授右千牛衛大將軍明年薨唐制親王封戶八百增至千公主三百長公主止六百高宗時沛英豫三王太平公主武后所生戶始踰制垂拱中太平至千二百戶聖歷初相王太平皆二千壽春等五王各三百神龍初相王太平至五千衛王三千溫王二千壽春等王皆七百嗣雍衡陽臨淄巴陵中山王五百安樂公主二千長寧千五百宣城宜城宣安各千相王女爲縣主各三百相王

增至七千安樂三千長寧二千五百宣城以下二千相王太平長寧安樂以七  
丁爲限雖水旱不蠲以國租庸滿之中宗遺詔雍壽春王進爲親王戶千開元  
後天子敦睦兄弟故寧王戶至五千五百岐薛五千申王以外家微戶四千邠  
王千八百帝妹戶千中宗諸女如之通以三丁爲限及皇子封王戶二千公主  
五百咸宜公主以母惠妃故封至千自是諸公主例千戶止初文德皇后崩晉  
王最幼太宗憐之不使出閣豫王亦以武后少子不出閣嗣聖初卽帝位及降  
封相王乃出閣中宗時譙王失愛遷外藩温王年十七猶居宮中遂立爲帝開  
元後皇子幼多居禁內旣長詔附苑城爲大宮分院而處號十王宅所謂慶忠  
棟鄂榮光儀賴永延盛濟等王以十舉全數也中人押之就夾城參天子起居  
家令每進膳引詞學士入授書謂之侍讀壽信義陳豐恆涼七王就封亦居十  
宅鄂光廢死忠王立爲太子慶棟繼薨唯榮儀十四王居院而府幕列於外坊  
歲時通名起居旣又諸孫多則於宅外更置百孫院天子歲幸華清宮又置十  
王百孫院于宮側宮人每院四百餘百孫院亦三四十人禁中置維城庫以給

諸王月奉諸孫納妃嫁女就十王宅太子不居東宮處乘輿所幸別院太子親王公主婚嫁並供帳於崇仁之禮院此承平制云

肅宗十四子章敬皇后生代宗皇帝宮人孫生係張生倓王生倓陳婕妤生僅章妃生儻張美人生倓後宮生榮裴昭儀生儻段婕妤生倓崔妃生倓張皇后生倓後宮生儻

越王係生開元時玄宗末年悉王太子子故係王南陽郡帝卽位至德二載十二月進王趙與彭兗涇鄆襄杞召興定九王同封乾元二年九節度兵潰河北朝廷震駭乃以李光弼代郭子儀總兵關東而光弼請賢王爲帥於是詔係充天下兵馬元帥而光弼以司空兼侍中薊國公副知節度行營事係留京師史思明陷洛陽係請行不聽明年徙王越帝寢疾皇太子監國張皇后與中人李輔國有隙因召太子入謂曰輔國典禁軍用事久四方詔令皆出其口矯天子制逼徙聖皇天下側目今上疾彌留輔國常怏怏忌吾與汝又程元振陰結黃門圖不軌若釋不誅禍不移頃太子泣曰此二人者陛下勳舊而上體不豫重



以此事得無震驚乎願出外徐計之后曰是難與共事者乃召係曰汝能行此乎係許諾卽遣內謁者監段恆俊選材勇宦者二百人授甲長生殿以帝命召太子元振以告輔國乃相與勒兵凌霄門迎太子以難告太子曰上疾亟吾可懼死不赴乎元振曰赴則及禍乃以兵護太子止飛龍廡勒兵夜入三殿收係及恆俊等百餘人繫之幽后別殿后及係皆爲輔國所害係三子建王武威郡道興道逾齊國公

承天皇帝俊始王建寧英毅有才略善騎射祿山亂典親兵扈車駕度渭百姓遮道留太子太子使喻曰至尊播遷吾可以違左右乎俊進說曰逆胡亂常四海崩分不因人情圖興復雖欲從上入蜀而散關以東非國家有夫大孝莫若安社稷殿下當募豪傑趣河西收牧馬今防邊屯士不下十萬而光弼子儀全軍在河朔與謀興復策之上者廣平王亦贊之於是議定太子北過渭兵仗監惡士氣崩沮日數十戰俊以驍騎數百從每接戰常身先血殷袂不告也太子或過時未食俊輒涕泗不自勝三軍皆屬目至靈武太子卽帝位議以俊爲天

下兵馬元帥左右固請廣平王帝曰廣平旣冢嗣安用元帥答曰太子從曰撫軍守曰監國元帥撫軍也莫宜於廣平王帝從之更詔俊典親軍以李輔國爲府司馬時張良娣有寵與輔國交構欲以動皇嗣者俊忠蹇數爲帝言之由是爲良娣輔國所譖妄曰俊恨不總兵鬱鬱有異志帝惑偏語賜俊死俄悔悟明年廣平王收二京使李泌獻捷泌與帝雅素從容語俊事帝改容曰俊於艱難時實自有力爲細人間鬩欲害其兄我計社稷割愛而爲之所泌曰爾時臣在河西知其詳廣平於兄弟篤睦至今言建寧則嗚咽不自己陛下此言得之讒口耳帝泣下曰事已爾末耐何泌曰陛下嘗聞黃臺瓜乎高宗有八子天后所生者四人自爲行而睿宗最幼長曰弘爲太子仁明孝友后方圖臨朝鳩殺之而立次子賢賢曰憂惕每侍上不敢有言乃作樂章使工歌之欲以感悟上及后其曰種瓜黃臺下瓜熟子離離一摘使瓜好再摘令瓜稀三摘尙云可四摘抱蔓歸而賢終爲后所斥死黔中陛下今一摘矣慎無再帝愕然曰公安得是言是時廣平有大功亦爲后所構故泌因對及之廣平遂安及卽位追贈俊齊

王大歷三年有詔以俊當艱難時首定大謀排衆議於中興有功乃進謚承天皇帝以興信公主季女張爲恭順皇后冥配焉葬順陵祔主奉天皇帝廟同殿異室云初李泌請加贈俊代宗曰俊性忠孝而困於讒追帝之若何答曰開元中上皇兄弟皆贈太子帝曰是特祖宗友愛耳豈若俊有功乎於是追帝號遣使迎喪彭原旣至城門喪轎不動帝謂泌曰豈有恨邪卿往祭之以白朕意且卿及知俊艱難定策者泌爲挽詞二解追述俊志命挽士唱泌因進酌轎乃行觀者皆爲垂泣

衛王佖始王西平蚤薨寶應元年五月與鄆王同追封

彭王僅始王新城進封彭史思明陷河洛人心震騷羣臣請以諸王臨統方鎮兵遙相維壓於是詔僅充河西節度兗王北庭涇王隴右杞王陝西興王鳳翔並爲大使是歲僅薨子鎮爲常山郡王

兗王儻始王潁川進王兗寶應元年薨

涇王佖始王東陽進王涇興元元年薨

鄆王榮始王靈昌蚤薨追封

襄王儻至德二載始王與杞召興定四王同封貞元七年薨子宣爲伊吾郡王  
案樂安王宣裔孫焜

焜性謹柔材無過人者光啓二年田令孜逼僖宗幸興元邠寧節度使朱玫以  
五千騎追乘輿不及焜以疾不能從玫劫之駐鳳翔得臺省官百餘乃脅宰相  
蕭遘等率羣臣盟石鼻驛奉焜爲嗣襄王監軍國事因還京師卽封拜官屬初  
遘執不可於是罷遘而玫自爲侍中號令已出以裴澈爲門下侍郎鄭昌圖中  
書侍郎皆平章事遣柳陟等十餘人分諭天下嗣襄王所以監國意皆得進官  
玫又脅太子太師裴瓌等奉牋勸進焜五讓乃卽位改元建貞尊僖宗爲太上  
元皇聖帝河中節度使王重榮率諸藩貢奉歸者十八九而蔡州秦宗權自僭  
號惟太原李克用不從時帝遣使喻重榮克用故二人聽命樞密使楊復恭等  
傳檄三輔募能斬玫者以邠寧節度界之其僞將王行瑜自鳳州入京師殺玫  
而焜與澈昌圖并官屬奔東渭橋重榮給使迎之焜與官屬別且泣曰朕見重

榮當令備所服迓公等至瀧執殺之因械澈等于獄誅殺僞官函煜首至行在所煜卽僞位凡九月敗始煜首至羣臣白帝御興元南門受之百官稱賀太常博士殷盈孫奏言禮公族有罪有司曰某之罪在大辟君曰赦之如是者三走出致刑焉君爲素服不舉者三日今煜皇族以不能固節迫脅至此宜廢爲庶人絕屬籍葬以庶人禮大捷之慶須朱玫首至乃賀詔可

杞王倓貞元十四年薨

召王偲元和元年薨

恭懿太子伾始封興王上元元年薨伾生后方專愛帝最憐之后數撼儲嫡欲以伾嗣會薨計塞是夕帝及后夢伾辭決流涕去帝鯁悵故冊贈皇太子

定王侗寶應初薨

代宗二十子睿真皇后生德宗皇帝崔妃生邈貞懿皇后生迥十七王史亡其母之氏位

昭靖太子邈好學以賢聞上元二年始王益昌帝卽位寶應元年進王鄭與韓

王同封淄青牙將李懷王逐其帥侯希逸詔邈爲平盧淄青節度大使以懷玉知留後大歷初代皇太子爲天下兵馬元帥八年薨遂罷元帥府

均王遐早薨貞元八年追封

睦王述大曆十年田承嗣不臣而昭靖天無彊王帝乃悉王諸子領諸鎮軍威天下於是以述爲睦王領嶺南節度逾郴王渭北鄜坊節度過韓王汴宋節度造忻王昭義節度皆爲大使連爲恩王遘鄜王暹韶王遇端王通循王通恭王逵原王逸雅王並開府儀同三司然不出閣德宗建中初周天下訪太后所在述於諸王最長故拜奉迎太后使以工部尙書喬琳副之貞元七年薨

丹王逾始王郴建中四年與簡王同徙封元和十五年薨

恩王連元和十二年薨

韓王迥始王延慶郡以母寵故與鄭王先徙封貞元十二年薨

簡王遘始王鄜徙封簡元和四年薨

益王迺大曆十四年始王亡薨年

隋王迅興元元年薨

荆王選蚤薨建中二年追王

蜀王邏本名遂大曆十四年始王建中二年改今名

忻王造元和六年薨

韶王暹貞元十二年薨

嘉王運貞元十七年薨

端王遇貞元七年薨

循王適亡薨年

恭王通亡薨年

原王逵太和六年薨

雅王逸貞元十五年薨

德宗十一子昭德皇后生順宗皇帝帝取紹靖太子子誼爲第二子又取順宗子諲爲第六子餘八王史亡其母之氏位

舒王誼初名謨帝愛其幼取爲子大曆十四年始王舒與通虔肅資四王同封拜開府儀同三司詔有司給奉稍俄以軍興罷謨於諸王最長帝欲試以事故拜涇原節度大使時尙父郭子儀病篤帝臨軒遣謨持詔往視謨冠遠遊冠御絳袍乘象輅四馬飛龍士三百國府官皆袴褶以從子儀手叩頭謝恩謨宣詔已乃易服勞問還是李希烈反招討使李勉戰不勝奔宋州朝廷大震乃拜謨揚州大都督荆襄江西沔鄂節度使諸軍行營兵馬都元帥改名誼軍中以哥舒翰由元帥敗而王所封同之帝乃使徙王晉以兵部侍郎蕭復爲統軍長史湖南觀察使孔巢父爲行軍左司馬山南東道節度行軍司馬樊澤爲右刑部員外郎劉從一侍御史韋儂爲判官兵部員外郎高參掌書記右金吾大將軍渾瑊爲中軍虞候江西節度使嗣曹王臯爲前軍兵馬使鄂岳團練使李兼副之山南東道節度使賈耽爲中軍兵馬使荆南節度使張伯儀爲後軍兵馬使左神武軍使王价左衛將軍高承謙檢校太子詹事郭曙檢校右庶子常愿爲押衙未及行涇原兵士反誼從帝出奉天朱泚攻城誼晝夜傳勞諸軍不解



帶帝還京師復故封揚州大都督如故永貞元年薨

通王諶始王拜開府儀同三司貞元九年領宣武節度大使以李萬榮爲留後二年徙河東以李說爲留後皆不出閣

虔王諒以王拜開府儀同三司貞元二年領蔡州節度大使以吳少誠爲留後十年徙節朔方靈鹽以李燮爲留後明年領橫海又徙徐州以程懷信張愔爲留後不出閣

肅王詳資秀異帝愛之建中二年薨甫四歲帝欲用浮屠說塔而不墳禮儀判官李岩諫非禮乃止詔贈揚州大都督

文敬太子諫見愛於帝命爲子貞元初先諸王王邕歷義武昭義二軍節度大使以張茂昭王虔休爲留後不出閣十五年薨年十八追贈及謚葬日羣臣以位而哭通化門外陵及廟置令丞云

資王謙亡薨年

代王誣始王縉雲郡蚤薨建中二年追王

昭王誠貞元二十一年始王亡薨年

欽王諤順宗卽位與珍王同封亡薨年

珍王誠太和六年薨

順宗二十七子莊憲皇后生憲宗皇帝及綰張昭訓生經趙昭儀生結王昭儀生總約緄餘二十王史亡母之氏位四王蚤薨亡官謚

俊王經本名渙貞元四年始王建康郡與廣陵洋州臨淮弘農漢東晉陵高平雲安宣城德陽河東洛交十二王同封二十一年又與均淑莒密郃宋集冀和衡欽會珍福撫岳袁桂翼二十王皆進王王二十九年太和八年薨

均王緯初名沔王洋川後進王王三十三年開成二年薨

淑王縱初名洵王臨淮後進王王三十二年開成元年薨

莒王紆初名浼爲祕書監王弘農後進王王二十九年太和八年薨

密王綢初名泳王漢東後進王王三年元和二年薨

郃王總初名湜授少府監王晉陵後進王王四年元和三年薨

邵王約初名淑爲國子祭酒王高平進王王二年元和元年薨

宋王結初名滋王雲安進王王十八年長慶二年薨

集王緝初名淮王宣城進王王十八年長慶二年薨

冀王綽初名潁爲太常卿王德陽進王王三十年太和九年薨

和王綺初名浥王河東進王王二十八年太和七年薨

衡王絢王二十二年寶曆二年薨

會王纁王六年元和五年薨

福王綰歷魏博節度大使咸通元年進拜司空王五十七年咸通二年薨

珍王繕初名況王洛交後進王亡薨年

撫王紘咸通初歷司空又進司徒太尉王七十三年乾符三年薨

岳王緄王二十三年太和二年薨

袁王紳王五十六年咸通元年薨

桂王綸王十年元和九年薨

翼王綽王五十八年咸通三年薨

蘄王緝王六年咸通八年薨

欽王績亡薨年

憲宗二十子紀美人生寧懿安皇后生穆宗皇帝孝明皇后生宣宗皇帝餘十七王皆後宮所生史逸其母之號氏

惠昭太子寧貞元二十一年始王平原與同安彭城高密文安四王同封帝卽位進王鄧與澧深洋絳四王同封於是國嗣未立李絳等建言聖人以天下爲大器知一人不可獨化四海不可無本故建太子以自副然後人心定宗祏安有國不易之常道陛下受命四年而冢子未建是開窺覷之端乖慎重之義非所以承列聖示萬世帝曰善以寧爲皇太子更名宙前以制示絳等未幾復初名冊禮用孟夏雨不克改用孟秋亦雨冬十月克行禮明年薨年十九

澧王憚始王同安後進王惠昭之喪吐突承璀議復立儲副意屬憚帝自以穆宗爲太子帝崩之夕承璀死王被殺祕不發喪久之以告廢朝三日三子曰漢

王東陽郡曰源安陸曰濱臨安初憚名寬深王察洋王寰絳王寮建王審元和七年並改今名

深王悰始王彭城郡進王深子潭王河內淑吳興

洋王忻始王高密進王洋太和二年薨子沛王頴川郡

絳王悟始王文安進王敬宗崩蘇佐明等矯詔以王領軍國事王守澄等立文宗王見殺二子洙王新安滂高平

建王恪元和元年始封時淄青節度使李師古死其弟師道勾符節故詔恪爲鄆州大都督平盧軍淄青等州節度大使以師道爲留後然不出閤長慶元年薨無嗣

鄆王憬長慶元年始王與瓊沔婺茂淄衢澶七王同封開成四年薨子溥平陽郡王

瓊王悅子津河間郡王

沔王恂子瀛晉陵郡王

珍傲宋版印  
婺王懌子清新平郡王

茂王愔子瀟武功郡王

淄王協開成元年薨子澣許昌郡王渙馮翊郡王

衡王憺子涉晉平郡王

澶王忱子溥鴈門郡王

棟王惲大中六年始王與彭信二王同封咸通三年薨無嗣

彭王惕乾寧中韓建殺之石隄谷無嗣

信王擘咸通八年薨無嗣

榮王愆咸通三年始王廣明初拜司空子令平嗣王凡八王史失其薨年

穆宗五子恭僖皇后生敬宗皇帝貞獻皇后生文宗皇帝宣懿皇后生武宗皇

帝餘二王亡其母之氏位

懷懿太子湊少雅裕有尋矩長慶元年始王漳與安王同封文宗卽位疾王守

澄顛很引支黨撓國謀盡誅之密引宰相宋申錫使爲計守澄客鄭注伺知之

以告乃謀先事殺申錫又以王賢有中外望因欲株聯大臣族夷之乃令神策  
虞候豆盧著上飛變且言宮史晏敬則朱訓與申錫昵吏王師文圖不軌訓嘗  
言上多疾太子幼若兄終弟及必漳王立申錫陰以金幣進王而王亦以珍服  
厚答卽捕訓等繫神策獄榜掠定其辭諫官羣伏閣極言出獄牒付外雜治注  
等懼事洩乃請下詔貶王帝未之悟因黜湊爲巢縣公時太和五年也命中人  
持詔卽賜且慰曰國法當爾無它憂八年薨贈齊王注後以罪誅帝哀湊被讒  
死不自明開成三年追贈

安王溶初楊賢妃得寵於文宗晚稍多疾妃陰請以王爲嗣密爲自安地帝與  
宰相李珣謀珣謂不可乃止及帝崩仇士良立武宗欲重己功卽擿溶嘗欲以  
爲太子事殺之

敬宗五子妃郭氏生普餘四王亡母之氏位

悼懷太子普姿性韶悟寶歷元年始王晉文宗愛之若己子嘗欲爲嗣太和二  
年薨帝惻念不能已故贈卹加焉敬宗第二子休復文宗開成二年封梁王第

三子執中爲襄王第四子言揚爲紀王第五子成美爲陳王執中子寀爲樂平郡王

王陳成美初文宗以莊恪薨大臣數請建東宮開成四年帝乃立成美爲皇太子典冊未具而帝崩仇士良立武宗殺之於邸子儼王宣城郡

文宗二子王德妃生永後宮生宗儉

莊恪太子永太和四年始王魯帝以王幼宜得賢輔因召見傅和元亮元亮以卒史進有所問不能答帝責謂宰相王可教官屬應任士大夫賢者寧元亮比邪於是劇選戶部侍郎庾敬休兼王傅太常卿鄭肅兼長史戶部郎中李踐方兼司馬六年遂立爲皇太子帝承寶歷荒怠身勤儉率天下謂晉王生謹敏欲引爲嗣會蚤夭故久不議東宮事及太子立天下屬心焉開成三年詔宮臣詣崇明門謁朔望侍讀偶日入對太子稍事燕豫不能壹循法保傅戒告勅不納又母愛弛楊賢妃方幸數譖之帝它日震怒御延英引見羣臣詔曰太子多過失不可屬天下其議廢之羣臣頓首言太子春秋盛雖有過尙可改且天下本



不可輕動惟陛下幸赦御史中丞狄兼善流涕固爭帝未決罷羣臣又連章論  
救意稍釋詔太子還少陽院以中人護視誅倖昵數十人勅侍讀竇宗直周敬  
復詣院授經然太子終不能自白其讒而行己亦不加修也是年暴薨帝悔之  
明年下詔以陳王爲太子置酒殿中有俳兒緣橦父畏其顛環走橦下帝感動  
謂左右曰朕有天下返不能全一兒乎因泣下卽取坊工劉楚才等數人付京  
兆榜殺之及禁中女倡十人斃永巷皆短毀太子者宰相楊嗣復等不及知因  
言楚才等罪當誅京兆殺之不覆奏敢以請翌日詔京兆後有決死勅不覆者  
亦許如故事以聞

蔣王宗儉開成二年始王亡薨年

武宗五子其母氏位皆不傳

杞王峻開成五年始王

益王峴會昌二年始王與兗德昌三王同封

兗王岐

德王嶧

昌王嵯並逸其薨年

宣宗十一子元昭太后生懿宗皇帝餘皆亡其母之氏位

靖懷太子漢會昌六年始王雍與夔慶二王同封大中六年薨有詔追冊

雅王涇大中元年始王亡薨年

通王滋會昌六年始王夔與慶王沂同封帝初詔鄆王居十六宅餘五王處大明宮內院以諫議大夫鄭漳兵部郎中李鄴爲侍讀五日一謁乾符門爲王授經鄆王立爲懿宗乃罷滋徙王昭宗乾寧三年領侍衛諸軍是時誅王行瑜而李茂貞怨以兵入覲詔滋與諸王分統安聖奉宸保寧安化軍衛京師天子將狩太原諱建道迎之留次華州建畏王等有兵遣人上急變告諸王欲殺建脅帝幸河中帝驚召建論之稱疾不肯入勅滋與睦王濟王韶王彭王韓王沂王陳王謁建自解建留軍中奏言中外異體臣不可以私見又言晉八王擅權卒敗天下請歸十六宅悉罷所領兵帝不許建以兵環行在請誅大將李筠帝懼

斬筠以謝建盡逐衛兵自是天子孤弱矣初帝使嗣延王戒丕嗣丹王允往見李克用二王還建惡之又嗣覃王嘗督軍伐茂貞於是劾奏比歲兵纏近輔諸王階其禍使乘輿越在下藩不得安臣已請解其兵今延覃丹三王尙陰計以危國請誅之帝曰渠至是邪後三日與劉季述矯詔以兵攻十六宅諸王被髮乘垣走或升屋極號曰帝救我建乃將十一王并其屬至石堤谷殺之徐以謀反聞天下寃之濟韶彭韓沂陳延覃丹九王史逸其系胄云

慶王沂大中十四年薨

濮王澤大中二年始王亡薨年

鄂王潤大中五年始王乾符三年薨

懷王洽大中八年與昭康二王同封亡薨年

昭王訥乾符三年薨

康王汶乾符四年薨

廣王灑大中十一年始王與衛王同封乾符四年薨

衛王灌大中十四年薨

懿宗八子惠安皇后生僖宗皇帝恭憲皇后生昭宗皇帝餘六王亡其母氏位  
魏王份咸通三年始王與涼蜀二王同封

涼王侏乾符六年薨

蜀王佶

威王侖咸通六年始王郢十年徙王

吉王保咸通十三年始王與睦王同封王於兄弟爲最賢始僖宗崩王最長將  
立之楊復恭獨議以昭宗嗣乾寧元年李茂貞等以兵入京師謀廢帝立王會  
李克用以兵逐行瑜乃止

恭哀太子倚初封睦王爲劉季述所殺天復初追贈

僖宗二子史失其母氏位

建王震中和元年始王

益王陞光啓三年始王並亡薨年

昭宗十七年積善皇后生裕及哀皇帝餘皆失母之氏位

德王裕大順二年始王帝幸華州韓建已奪諸王兵不自安乃請王皇子之未王者既又殺諸王因請立裕爲皇太子釋言於四方時乾寧四年也劉季述等幽帝東內奉裕卽皇帝位季述誅裕匿右軍或請殺之帝曰太子冲孺賊彊立之且何罪詔還少陽院復爲王朱全忠自鳳翔還見王春秋威標字軒秀忌之密語崔胤曰王既竊帝矣大義滅親渠可留公任宰相盍啓之胤從容言如全忠意帝不許宅日以語全忠全忠曰此國大事臣安敢與此必胤賣臣也乃免帝遷洛宅日謂蔣玄暉曰德王朕愛子全忠奈何欲殺之言已泣下自齧指流血玄暉卽撻語全忠全忠恚帝被弑玄暉置酒邀諸王九曲池飲酣皆殺之投尸水中

棟王栩乾寧元年始王與虔沂遂三王同封

虔王禊

沂王禊

唐

書

卷八十二

列傳

七

中華書局聚

遂王禕

景王祕乾寧四年始王與祁王同封

祁王祺

雅王禕光化元年始王與瓊王同封

瓊王祥

端王禕天祐元年始王與豐和登嘉四王同封

豐王祁

和王福

登王禧

嘉王祐

頽王禕天祐二年始王與蔡王祐同封

蔡王祐

贊曰唐自中葉宗室子孫多在京師幼者或不出閣雖以國王之實與匹夫不

異故無赫赫過惡亦不能爲王室軒輊運極不還與唐俱殫然則歷數短長自有底止彼漢七國晉八王不得其效愈速禍云

唐書卷八十二

學錄卷八十二

正德九年八月十四日晉人王不其其效愈彰歸元

異文論... 懸衣不消... 王定博... 研對不... 後... 驗... 驗... 驗... 驗...



唐書卷八十二考證

靖恭太子琬傳男女五十八人得王者三人○舊書封爲郡王者二

丞王璘傳以薛鏐李臺卿韋子春劉巨鱗蔡嗣爲謀主○蔡嗣舊書作蔡垆

成式又遣裴戎以廣陵卒三千戍伊婁埭○裴戎舊書作裴戎

舒王誼傳鄂岳團練使李兼副之○李兼舊書作李謙

荆南節度使張伯儀爲後軍兵馬使○張伯儀舊書作張伯謙

肅王詳傳建中二年薨○舊書作三年十月薨

順宗二十七子○舊書作二十子

張昭訓生經○舊書作王昭儀生郊王經

郇王總傳○舊書作郇王綜

翼王綽傳○綽本紀作縹

斬王緝傳王六年咸通八年薨○舊書作咸通八年封

懷懿太子湊傳八年薨贈齊王○文宗紀薨在九年



唐書卷八十三

宋 端 明 殿 學 士 宋 祁 撰 公 主

列傳第八

諸公主

世祖一女

同安公主高祖同母媚也下嫁隋州刺史王裕貞觀時以屬尊進大長公主嘗有疾太宗躬省視賜縑五百姆侍皆有賚予永徽初賜實戶三百薨年八十六裕隋司徒柬之子終開府儀同三司

高祖十九女

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能偕奈何主曰公行矣我自爲計紹詭道走并州主奔

鄂發家貲招南山亡命得數百人以應帝於是名賊何潘仁壁司竹園殺行人稱總管主遣家奴馬三寶喻降之共攻鄂別部賊李仲文向善志丘師利等各持所領會戲下因略地盤屋武功始平下之乃申法誓衆禁剽奪遠近咸附勒兵七萬威振關中帝度河紹以數百騎並南山來迎主引精兵萬人與秦王會渭北紹及主對置幕府分定京師號娘子軍帝卽位以功給賚不涯武德六年薨葬加前後部羽葆鼓吹大路麾幢虎賁甲卒班劍太常議婦人葬古無鼓吹帝不從曰鼓吹軍樂也往者主身執金鼓參佐命于古有邪宜用之

高密公主下嫁長孫孝政又嫁段綸綸隋兵部尙書文振子爲工部尙書杞國公永徽六年主薨遺命吾葬必令墓東向以望獻陵冀不忘孝也

長廣公主始封桂陽下嫁趙慈景慈景隴西人帝美其姿制故妻之帝起兵或勸亡去對曰母以我爲命且安往吏捕繫于獄帝平京師引拜開化郡公爲相國府文學進兵部侍郎爲華州刺史討堯君素戰死贈秦州刺史諡曰忠公主更嫁楊師道聰悟有思工爲詩豪侈自肆晚稍折節以壽薨

長沙公主始封萬春下嫁豆盧寬子懷讓

房陵公主始封永嘉下嫁竇奉節又嫁賀蘭僧伽

九江公主下嫁執失思力

廬江公主下嫁喬師望爲同州刺史

南昌公主下嫁蘇勗

安平公主下嫁楊思敬

淮南公主下嫁封道言

真定公主下嫁崔恭禮

衡陽公主下嫁阿史那社爾

丹陽公主下嫁薛萬徹萬徹意甚公主羞不與同席者數月太宗聞笑焉爲置酒悉召它壻與萬徹從容語握契賭所佩刀陽不勝遂解賜之主喜命同載以

歸

臨海公主下嫁裴律師

館陶公主下嫁崔宣慶

安定公主始封千金下嫁温挺挺死又嫁鄭敬玄

常樂公主下嫁趙瓌生女爲周王妃武后殺之逐瓌括州刺史徙壽州越王貞將舉兵遺瓌書假道瓌將應之主進使者曰爲我謝王與其進不與其退若諸王皆丈夫不應掩久至是我聞楊氏篡周尉遲迥乃周出猶能連突厥使天下響震況諸王國公懿親宗社所託不捨生取義尙何須邪人臣同國患爲忠不同爲逆王等勉之王敗周興劾瓌與主連謀皆被殺

太宗二十一女

襄城公主下嫁蕭銳性孝睦動循矩法帝勅諸公主視爲師式有司告營別第辭曰婦事舅姑如父母異宮則定省闕止葺故第門列雙戟而已銳卒更嫁姜簡永徽二年薨高宗舉哀於命婦朝堂遣工部侍郎丘行淹馳驛弔祭陪葬昭陵喪次故城帝登樓望哭送柩

汝南公主蚤薨

南平公主下嫁王敬直以累斥嶺南更嫁劉玄意

遂安公主下嫁竇達達死又嫁王大禮

長樂公主下嫁長孫沖帝以長孫皇后所生故勅有司裝齋視長公主而倍之魏徵曰昔漢明帝封諸王曰朕子安得同先帝子乎然則長公主者尊公主矣制有等差渠可越也帝以語后后曰嘗聞陛下厚禮徵而未知也今聞其言乃納主於義社稷臣也妾於陛下夫婦之重有所言猶候顏色況臣下情隔禮殊而敢犯嚴顏陳忠言哉願許之與天下爲公帝大悅因請齋帛四十匹錢四十萬卽徵家賜之

豫章公主下嫁唐義識

北景公主始封巴陵下嫁柴令武坐與房遺愛謀反同主賜死顯慶中追贈立廟於墓四時祭以少牢

普安公主下嫁史仁表

東陽公主下嫁高履行高宗卽位進爲大長公主章正矩之誅主坐婚家斥徙

集州又坐章懷太子累奪邑封以長孫無忌舅族也故武后惡之垂拱中并二子徙置巫州

臨川公主韋貴妃所生下嫁周道務主工籀隸能屬文高宗立上孝德頌帝下詔褒答永徽初進長公主恩賞卓異永淳初薨道務殿中大監譙郡公範之子初道務孺祿時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍諡曰襄

清河公主名敬字德賢下嫁程懷亮薨麟德時陪葬昭陵懷亮知節子也終寧遠將軍

蘭陵公主名淑字麗貞下嫁竇懷悫薨顯慶時懷悫官兗州都督太穆皇后之族子

晉安公主下嫁韋思安又嫁楊仁輅

安康公主下嫁獨孤謀

新興公主下嫁長孫曦



城陽公主下嫁杜荷坐太子承乾事誅又嫁薛瓘初主之婚帝使卜之繇曰二  
火皆食始同榮末同戚請晝昏則吉馬周諫曰朝謁以朝思相戒也講習以晝  
思相成也燕飲以晨思相歡也婚合以夜思相親也故上下有成內外有親動  
息有時吉凶有儀今先亂其始不可爲也夫卜所以決疑若黷禮慢先聖人所  
不用帝乃止麟德初瓘歷左奉宸衛將軍主坐巫蠱斥瓘房州刺史主從之官  
咸亨中主薨而瓘卒雙柩還京師子顓封河東縣侯濟州刺史琅邪王冲起兵  
顓與弟紹以所部庸調作兵募士且應之冲敗殺都吏以滅口事泄下獄俱死  
合浦公主始封高陽下嫁房玄齡子遺愛主帝所愛故禮異宅壻主負所愛而  
驕房遺直以嫡當拜銀青光祿大夫讓弟遺愛帝不許玄齡卒主導遺愛異賞  
既而反譖之遺直自言帝痛讓主乃免自是稍疏外主怏怏會御史劾盜得浮  
屠辯機金寶神枕自言主所賜初浮屠廬主之封地會主與遺愛獵見而悅之  
具帳其廬與之亂更以二女子從遺愛私餉億計至是浮屠殊死殺奴婢十餘  
主益望帝崩無哀容又浮屠智勛迎占禍福惠弘能視鬼道士李晃高醫皆私

侍主主使掖廷令陳玄運伺宮省機祥步星次永徽中與遺愛謀反賜死顯慶時追贈

### 金山公主蚤薨

晉陽公主字明達幼字兕子文德皇后所生未嘗見喜愠色帝有所怒責必伺顏徐徐辯解故省中多蒙其惠莫不譽愛后崩時主始孩不之識及五歲經后所游地哀不自勝帝諸子唯晉王及主最少故親畜之王每出閣主送至虔化門泣而別王勝衣班于朝主泣曰兄今與羣臣同列不得在內乎帝亦爲流涕主臨帝飛白書下不能辯薨年十二帝閱三旬不常膳日數十哀因以瘡羸羣臣進勉帝曰朕渠不知悲愛無益而不能已我亦不知其所以然因詔有司簿主湯沐餘貲營佛祠墓側

### 常山公主未及下嫁薨顯慶時

新城公主晉陽母弟也下嫁長孫詮詮以罪徙嶺州更嫁韋正矩爲奉冕大夫遇主不以禮俄而主暴薨高宗詔三司雜治正矩不能辯伏誅以皇后禮葬昭

陵旁

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗天授中勗爲武后所誅神龍初進冊長公主實封千戶開府置官屬睿宗立增戶千薨開元時玄宗哭於暉政門遣大鴻臚持節赴弔京兆尹攝鴻臚護喪事

太平公主則天皇后所生后愛之傾諸女榮國夫人死后丐主爲道士以幸冥福儀鳳中吐蕃請主下嫁后不欲棄之夷乃真築宮如方士薰戒以拒和親事久之主衣紫袞玉帶折上巾具紛礪歌舞帝前帝及后大笑曰兒不爲武官何遽爾主曰以賜駙馬可乎帝識其意擇薛紹尙之假萬年縣爲婚館門隘不能容翟車有司毀垣以入自興安門設燎相屬道樾爲枯紹死更嫁武承嗣會承嗣小疾罷婚後殺武攸暨妻以配主主方額廣頤多陰謀后常謂類我而主內與謀外檢畏終后世無宅訾永淳之前親王食實戶八百增至千輒止公主不

過三百而主獨加戶五千及聖曆時進及三千戶預誅二張功增號鎮國與相王均封五千而薛武二家女皆食實封主與相王衛王成王長寧安樂二公主給衛士環第十步一區持兵呵衛僭肖宮省神龍時與長寧安樂宜城新都定安金城凡七公主皆開府置官屬視親王安樂戶至三千長寧二千五百府不置長史宜城定安非韋后所生戶止二千主三子崇簡崇敏崇行皆拜三品韋后上官昭容用事自以謀出主下遠甚憚之主亦自以軋而可勝故益橫於是推進天下士謂儒者多寡狹厚持金帛謝之以動大議遠近翕然嚮之玄宗將誅韋氏主與祕計遣子崇簡從事定將立相王未有以發其端者主顧溫王乃兒子可劫以爲功乃入見王曰天下事歸相王此非兒所坐乃掖王下取乘輿服進睿宗睿宗卽位主權由此震天下加實封至萬戶三子封王餘皆祭酒九卿主每奏事漏數徙乃得退所言皆從有所論薦或自寒穴躡進至侍從旋踵將相朝廷大政事非關決不下聞不朝則宰相就第咨判天子殆晝可而已主侍武后久善策人主微指先事逢合無不中田園徧近甸皆上腴吳蜀嶺嶠市

作器用州縣護送道相望也天下珍滋譎怪充于家供帳聲伎與天子等待兒  
曳紉穀者數百奴伯嫗監千人隴右牧馬至萬匹長安浮屠慧範畜貲千萬諧  
結權近本善張易之及易之誅或言其豫謀者於是封上庸郡公月給奉稍主  
乳媪與通奏擢三品御史大夫御史魏傳弓劾其姦賊四十萬請論死中宗欲  
赦之進曰刑賞國大事陛下賞已妄加矣又欲廢刑天下其謂何帝不得已削  
銀青階大夫薛謙光劾慧範不法不可貸主爲申理故謙光等反得罪玄宗以  
太子監國使宋王岐王總禁兵主恚權分乘輦至光範門召宰相白廢太子於  
是宋璟姚元之不悅請出主東都帝不許詔主居蒲州主大望太子懼奏斥璟  
元之以銷戢怨嫌監察御史慕容珣復劾慧範事帝疑珣離間骨肉貶密州司  
馬主居外四月太子表追還京師時宰相七人五出主門下又左羽林大將軍  
常元楷知羽林軍李慈皆私謁主主內忌太子明又宰相皆其黨乃有逆謀先  
天二年與尚書左僕射竇懷貞侍中岑羲中書令蕭至忠崔湜太子少保薛稷  
雍州長史李晉右散騎常侍昭文館學士賈膺福鴻臚卿唐駿及元楷慈慧範

等謀廢太子使元楷慈舉羽林兵入武德殿殺太子懷貞義至忠舉兵南衙爲應既有日矣太子得其姦召岐王薛王兵部尙書郭元振將軍王毛仲殿中少監姜皎中書侍郎王瑒吏部侍郎崔日用定策前一日因毛仲取內閑馬三百率太僕少卿李令問王守一內侍高力士果毅李守德叩虔化門梟元楷慈於北闕下縛膺福內客省執義至忠至朝堂斬之因大赦天下主聞變亡入南山三日不出賜死于第諸子及黨與死者數十人簿其田貲瓌瑤若山督子貸凡三年不能盡崇簡素知主謀苦諫主怒榜掠尤楚至是復官爵賜氏李始主作觀池樂游原以爲盛集旣敗賜寧申岐薛四王都人歲被禊其地

中宗八女

新都公主下嫁武延暉

宣城公主始封義安郡主下嫁裴巽巽有嬖姝主恚剛耳劓鼻且斷巽髮帝怒斥爲縣主巽左遷久之復故封神龍元年與長寧新寧義安安樂新平五郡主皆進封

定安公主始封新寧郡下嫁王同皎同皎得罪神龍時又嫁韋濯濯卽韋皇后從祖弟以衛尉少卿誅更嫁大府卿崔銑主薨王同皎子請與父合葬給事中夏侯銛曰主義絕王廟恩成崔室逝者有知同皎將拒諸泉銑或訴於帝乃止銛坐是貶瀘州都督

長寧公主韋庶人所生下嫁楊慎交造第東都使楊務廉營總第成府財幾竭乃擢務廉將作大匠又取西京高士廉第左金吾衛故營合爲宅右屬都城左順大道作三重樓以馮觀築山浚池帝及后數臨幸置酒賦詩又并坊西隙地廣鞠場東都廢永昌縣主勾其治爲府以地瀕洛築郭之崇臺蜚觀相聯屬無慮費二十萬魏王泰故第東西盡一坊渚沼三百畝泰薨以與民至是主勾得之亭閣華詭埒西京內倚母愛寵傾一朝與安樂宣城二主后媚邨國崇國夫人爭任事賊謁紛紜東都第成不及居韋氏敗斥慎交絳州別駕主偕往乃請以東都第爲景雲祠而西京鸞第評木石直爲錢二十億萬開元十六年慎交死主更嫁蘇彥伯務廉卒坐贓數十萬廢終身

永壽公主下嫁韋鐵蚤薨長安初追贈

永泰公主以郡主下嫁武延基大足中忤張易之爲武后所殺帝追贈以禮改葬號墓爲陵

安樂公主最幼女帝遷房陵而主生解衣以祿之名曰褻兒姝秀辯敏后尤愛之下嫁武崇訓帝復位光艷動天下侯王柄臣多出其門嘗作詔籍其前請帝署可帝笑從之又請爲皇太女左僕射魏元忠諫不可主曰元忠山東木強烏足論國事阿武子尙爲天子天子女有不可乎與太平等七公主皆開府而主府官屬尤濫皆出屠販納訾售官降墨勅斜封授之故號斜封官主營第及安樂佛廬皆憲寫宮省而工緻過之嘗請昆明池爲私沼帝曰先帝未有以與人者主不悅自鑿定昆池延袤數里定言可抗訂之也司農卿趙履温爲繕治累石肖華山墜杓橫邪回淵九折以石澹水又爲寶鑪鏤怪獸神禽間以槩貝珊瑚不可涯計崇訓死主素與武延秀亂卽嫁之是日假后車輅自宮送至第帝與后爲御安福門臨觀詔雍州長史竇懷貞爲禮會使弘文學士爲儻相王障



車捐賜金帛不貲翌日大會羣臣太極殿主被翠服出嚮天子再拜南面拜公卿公卿皆伏地稽首武攸暨與太平公主偶舞爲帝壽賜羣臣帛數十萬帝御承天門大赦因賜民酺三日內外官賜勳緣禮官屬兼階爵奪臨川長公主宅以爲第旁徹民廬怨聲囂然第成禁藏空殫假萬騎仗內音樂送主還第天子親幸宴近臣崇訓子方數歲拜太常卿封鎬國公實封戶五百公主滿孺月帝后復幸第大赦天下時主與長寧定安三家廝臺掠民子女爲奴婢左臺侍御史袁從一縛送獄主入訴帝爲手詔喻免從一曰陛下納主訴縱奴騶掠平民何以治天下臣知放奴則免禍劾奴則得罪於主然不忍屈陛下法自偷生也不納臨淄王誅庶人主方覽鏡作眉聞亂走至右延明門兵及斬其首追貶爲悖逆庶人睿宗卽位詔以二品禮葬之趙履温詔事主嘗褫朝服以項挽車庶人死蹈舞承天門呼萬歲臨淄王斬之父子同刑百姓疾其與役割取肉去成安公主字季姜始封新平下嫁韋捷捷以韋后從子誅主後薨

睿宗十一女

壽昌公主下嫁崔真

安興昭懷公主蚤薨

荆山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

涼國公主字華莊始封仙源下嫁薛伯陽

薛國公主始封清陽下嫁王守一守一誅更嫁裴巽

鄖國公主崔貴妃所生三歲而妃薨哭泣不食三日如成人始封荆山下嫁薛

儻又嫁鄭孝義開元初封邑至千四百戶

金仙公主始封西城縣主景雲初進封太極元年與玉真公主皆爲道士築觀

京師以方士史崇玄爲師崇玄本寒人事太平公主得出入禁中拜鴻臚卿聲

勢光重觀始興詔崇玄護作日萬人羣浮屠疾之以錢數十萬賂狂人段謙冒

入承天門升太極殿自稱天子有司執之辭曰崇玄使我來詔流嶺南且勅浮

屠方士無兩競太平敗崇玄伏誅

玉真公主字持盈始封崇昌縣主俄進號上清玄都大洞三景師天寶三載上言曰先帝許妾捨家今仍叨主策食租賦誠願去公主號罷邑司歸之王府玄宗不許又言妾高宗之孫睿宗之女陛下之女弟於天下不爲賤何必名繫主號資湯沐然後爲貴請入數百家之產延十年之命帝知主意乃許之薨寶應時

霍國公主下嫁裴虛己

玄宗二十九女

永穆公主下嫁王絲

常芬公主下嫁張去奢

孝昌公主蚤薨

唐昌公主下嫁薛鏞

靈昌公主蚤薨

常山公主下嫁薛譚又嫁竇澤

萬安公主天寶時爲道士開元新制長公主封戶二千帝妹戶千率以三丁爲限皇子王戶二千主半之左右以爲薄帝曰百姓租賦非我有士出萬死賞不過東帛女何功而享多戶邪使知儉嗇不亦可乎於是公主所稟始不給車服後咸宜以母愛益封至千戶諸主皆增自是著于令主不下嫁亦封千戶有司給奴婢如令

上仙公主蚤薨

懷恩公主蚤薨葬築臺號登真

晉國公主始封高都下嫁崔惠童貞元元年與衛楚宋齊宿蕭鄧紀郃國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜薨大曆時

衛國公主始封建平下嫁豆盧建又嫁楊說薨貞元時

貞陽公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得入侍興元元年請爲道士詔可賜名上善

普康公主蚤薨咸通九年追封

昌樂公主高才人所生下嫁竇鏐薨大曆時

永寧公主下嫁裴齊丘

宋國公主始封平昌下嫁溫西華又嫁楊徽薨元和時

齊國公主始封興信徙封寧親下嫁張垵又嫁裴頴末嫁楊敷薨貞元時

咸直公主貞順皇后所生下嫁楊洄又嫁崔嵩薨興元時

宜春公主蚤薨

廣寧公主董芳儀所生下嫁程昌胤又嫁蘇克貞薨大曆時

萬春公主杜美人所生下嫁楊拙又嫁楊錡薨大曆時

太華公主貞順皇后所生下嫁楊筠薨天寶時

壽光公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁裴玲又嫁姜慶初慶初得罪主幽禁中薨大曆時

壽安公主曹野那姬所生孕九月而育帝惡之詔衣羽人服代宗以廣平王入謁帝字呼主曰蟲娘汝後可與名王在靈州請封下嫁蘇發

肅宗七女

宿國公主始封長樂下嫁豆盧湛

蕭國公主始封寧國下嫁鄭巽又嫁薛康衡乾元元年降回紇英武威遠可汗乃置府二年還朝貞元中讓府屬更置邑司

和政公主章敬太后所生生三歲后崩養于韋妃性敏惠事妃有孝稱下嫁柳潭安祿山陷京師寧國公主方嫠居主棄三子奪潭馬以載寧國身與潭步日

百里潭躬水薪主躬爨以奉寧國初潭兄澄之妻楊貴妃姊也勢幸傾朝公主未嘗干以私及死撫其子如所生從玄宗至蜀始封遷潭駙馬都尉郭千仞反玄宗御玄英樓諭降之不聽潭率折衝張義童等殊死鬪主穀弓授潭潭手斬賊五十級平之肅宗有疾主侍左右勤勞詔賜田以女弟寶章主未有賜固讓不敢當阿布思之妻隸掖廷帝宴使衣綠衣爲倡主諫曰布思誠逆人妻不容近至尊無罪不可與羣倡處帝爲免出之自兵興財用耗主以貿易取奇贏千萬澹軍及帝山陵又進邑八千萬代宗初立屢陳人間利病國家盛衰事天子鄉納吐蕃犯京師主避地南奔次商於遇羣盜主諭以禍福皆稽顙願爲奴代宗以主貧詔諸節度餉億主一不取親紉綻裳衣諸子不服紈絺廣德時吐蕃再入寇主方妊入語備邊計譚固止主曰君獨無兄乎入見內殿翌日免乳而薨

鄰國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大曆時

郾國公主始封延光下嫁裴徽又嫁蕭升升卒主與彭州司馬李萬亂而蜀州別駕蕭鼎澧陽令韋憚太子詹事李昇皆私侍主家久之姦聞德宗怒幽主宅第杖殺萬斤鼎憚昇嶺表貞元四年又以厭蠱廢六年薨子位坐以蠱祝囚端州佩儒偲囚房州前生子駙馬都尉裴液囚錦州主女爲皇太子妃帝畏妃怨望將殺之未發會主薨太子屬疾乃殺妃以厭災諡曰惠

代宗十八女

靈仙公主蚤薨追封

真定公主蚤薨追封

永清公主下嫁裴倣

齊國昭懿公主崔貴妃所生始封升平下嫁郭曖大曆末寰內民訴涇水爲磴壅不得溉田京兆尹黎幹以請詔撤磴以水與民時主及曖家皆有磴勾留帝曰吾爲蒼生者可爲諸戚倡即日毀由是廢者八十所憲宗卽位獻女伎帝曰



太上皇不受獻朕何敢違還之薨元和時贈號國賜諡穆宗立復贈封

華陽公主貞懿皇后所生韶悟過人帝愛之視帝所喜必善遇所惡曲全之大曆七年以病勾爲道士號瓊華真人病甚嚙帝指傷薨追封

玉清公主蚤薨追封

嘉豐公主下嫁高怡與普寧公主同降有司具冊禮光順門以雨不克罷薨建

中時

長林公主下嫁衛尉少卿沈明貞元二年具冊禮德宗不御正殿不設樂遂爲

故事薨元和時

太和公主蚤薨追封

趙國莊懿公主始封武清貞元元年徙封嘉誠下嫁魏博節度使田緒德宗幸望春亭臨餞厭翟敝不可乘以金根代之公主出降乘金根車自主始薨元和時贈封及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨太和時

義清公嫁下嫁祕書少監柳杲

壽昌公主下嫁光祿少卿竇克良薨貞元時

新都公主貞元十二年下嫁田華具禮光順門五禮由是廢

西平公主蚤薨

章寧公主蚤薨

德宗十一女

韓國貞穆公主昭德皇后所生幼謹孝帝愛之始封唐安將下嫁祕書少監章宥未克而朱泚亂從至城固薨加封諡

魏國憲穆公主始封義陽下嫁王士平主恣橫不法帝幽之禁中錮士平于第久之拜安州刺史坐交中人貶賀州司戶參軍門下客蔡南史獨孤申叔爲主作團雪散雪辭狀離曠意帝聞怒捕南史等逐之幾廢進士科薨追封及諡

鄭國莊穆公主始封義章下嫁張孝忠子茂宗薨加贈及謚

臨真公主下嫁祕書少監薛釗薨元和時

永陽公主下嫁殿中少監崔誣

普寧公主蚤薨

文安公主勾爲道士薨太和時

燕國襄穆公主始封咸安下降回紇武義成功可汗置府薨元和時追封及謚

義川公主蚤薨

宜都公主下嫁殿中少監柳昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭縱辭歸第涕泣不自勝

德宗曰兒有不足邪對曰思相離無它恨也帝亦泣顧太子曰真而子也永貞

元年與諸公主皆進封時咸近爭爲奢詔事主獨以儉常用鐵簪畫壁記田租

所入文宗尤惡世流侈因主入問曰姑所服何年法也今之弊何代而然對曰妾自貞元時辭宮所服皆當時賜未嘗敢變元和後數用兵悉出禁藏纖麗物賞戰士由是散於人間內外相矜狃以成風若陛下示所好于下誰敢不變帝悅詔宮人視主衣製廣狹徧諭諸主且勅京兆尹禁勿浮靡主嘗誨諸女曰先姑有言吾與若皆帝子驕盈貴侈可戒不可恃開成五年薨

梁國恭靖公主與漢陽同生始封咸寧郡主徙普安下嫁鄭何薨追封及諡

東陽公主始封信安郡主下嫁崔杞

西河公主始封武陵郡主下嫁沈暈薨咸通時

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮主縱恣常微行市里有薛樞薛渾李元本皆得私侍而渾尤愛至謁渾母如姑有司欲致詰多與金使不得發克禮以聞穆宗幽主禁中元本乃功臣惟簡子故貸死流象州樞渾崖州

潯陽公主崔昭儀所生太和三年與平恩邵陽二公主並爲道士歲賜封物七

百正公主

臨汝公主崔昭訓所生蚤薨

號國公主始封清源郡主徙陽安下嫁王承系薨追封

平恩公主蚤薨

邵陽公主蚤薨

憲宗十八女

梁國惠康公主始封普寧帝特愛之下嫁于季友元和中徙永昌薨詔追封及  
諡將葬度支奏義陽義章公主葬用錢四千萬有詔減千萬

永嘉公主爲道士

衡陽公主蚤薨

宣城公主下嫁沈熾

鄭國溫儀公主始封汾陽下嫁韋讓薨追封及諡

岐陽莊淑公主懿安皇后所生下嫁杜悰帝爲御正殿臨遣絲西朝堂出復御

唐

書

卷八十三

列傳

十四中華書局聚

延喜門止主車大賜賓從金錢開第昌化里疏龍首池爲沼后家上尙父大通  
里亭爲主別館貴震當世然主事舅姑以禮聞所賜奴婢僊蹇皆上還勻直自  
市悰爲澧州刺史主與偕從者不二十婢乘驢不肉食州縣供具拒不受姑寢  
疾主不解衣藥糜不嘗不進開成中悰自忠武入朝主寢疾曰願朝與慶宮雖  
死於道不恨道薨

陳留公主下嫁裴損損爲太子諭德

真寧公主下嫁薛翊

南康公主下嫁沈汾薨咸通時

臨真公主始封襄城下嫁衛洙薨咸通時

普康公主蚤薨

真源公主始封安陵下嫁杜中立

永順公主下嫁劉弘景

安平公主下嫁劉異宣宗卽位宰相以異爲平盧節度使帝曰朕唯一妹欲時

見之乃止後隨異居外歲時輒乘驛入朝薨乾符時

永安公主長慶初許下嫁回鶻保義可汗會可汗死止不行太和中句爲道士  
詔賜邑印如尋陽公主故事且歸婚貲

義寧公主未下及嫁薨

定安公主始封太和下嫁回鶻崇德可汗會昌三年來歸詔宗正卿李仍叔祕  
書監李踐方等告景陵主次太原詔使勞問係塗以黠戛斯所獻白貂皮玉指  
環往賜至京師詔百官迎謁再拜故事邑司官承命答拜有司議邑司官卑不  
可當羣臣請以主左右上媵戴鬢帛承拜兩襜持命又詔神策軍四百具鹵簿  
羣臣班迓主乘輅謁憲穆二室欷歔流涕退詣光順門易服褫冠鑊待罪自言  
和親無狀帝使人勞慰復冠鑊乃入羣臣賀天子又詣興慶宮明日主謁太  
皇太后進封長公主遂廢太和府主始至宣城以下七主不出迎武宗怒差奪  
封絹贖罪宰相建言禮始中壺行天下王化之美也請載于史示後世詔可

貴鄉公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇滌

金堂公主始封晉陵下嫁郭仲恭薨乾符時

清源公主薨太和時

饒陽公主下嫁郭仲詞

義昌公主爲道士薨咸通時

安康公主爲道士乾符四年以主在外頗擾人詔與永興天長寧國興唐四主

還南內

敬宗三女

永興公主

天長公主



寧國公主薨廣明時

文宗四女

興唐公主

百平公主

朗寧公主薨咸通時

光化公主薨廣明時

武宗七女

昌樂公主

壽春主公

長寧公主薨大中時

延慶公主

靜樂公主薨咸通時

樂温公主

永清公主薨咸通時

宣宗十一女

萬壽公主下嫁鄭顥主帝所愛前此下詔先王制禮貴賤共之萬壽公主奉舅姑宜從士人法舊制車輿以鐐金釵飾帝曰我以儉率天下宜自近始易以銅主每進見帝必誨勉篤誨曰無鄙夫家無干時事又曰太平安樂之禍不可不戒故諸主祇畏爭爲可喜事帝遂詔夫婦教化之端其公主縣主有子而寡不得復嫁

永福公主

齊國恭懷公主始封西華下嫁嚴祁祁爲刑部侍郎主薨大中時追贈及謚

廣德公主下嫁于琮初琮尙永福公主主與帝食怒折匕筋帝曰此可爲士人妻乎更許琮尙主琮爲黃巢所害主泣曰今日誼不獨存賊宜殺我巢不許乃縊室中主治家有禮法嘗從琮貶韶州侍者纔數人卻州縣饋遺凡內外冠婚喪祭主皆身答勞疏戚咸得其心爲世閨婦

義和公主

饒安公主

盛唐公主

平原公主薨咸通時已而追封

唐陽公主

許昌莊肅公主下嫁柳涉薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸通十年薨帝既素所愛自製挽歌羣臣畢和又許百官祭以金貝寓車廄服火之民爭取煨以汰寶及葬帝與妃坐延興門哭以過柩仗衛彌數十里冶金爲俑怪寶千計實墓中與乳保同葬追封及諡

安化公主

唐

書

卷八十三

列傳

七 中華書局聚

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平主

昭宗十一女

新安公主

平原公主積善皇后所生帝在鳳翔以主下嫁李茂貞子繼俛后謂不可帝曰不爾我無安所是日宴內殿茂貞坐帝東南主拜殿上繼俛族兄弟皆西向立

主徧拜之及帝還朱全忠移茂貞書取主還京師

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

贊曰婦人內夫家雖天姬之貴史官猶外而不詳又僖昭之亂典策埃滅故諸帝公主降日薨年粗得其概亡者闕而不書

唐書卷八十三

贊皇公入內夫案錄天致之貴又官辭快而不藉又爵厚之顯與兼其屬姑前

樂平公主

昔安公主

齊襄公主

光祿公主

贊南公主

惠興公主

益昌公主

首勝公主

主諱孫女又帝庶未全法統其康壽公主諱承嗣上諱德宗兄憲晉西而立

唐書卷八十三考證

廣寧公主傳下嫁程昌胤○后妃傳中作程昌裔

韓國貞穆公主傳○舊書德宗紀作莊穆

潯陽公主傳太和三年與平恩邵陽二公主並爲道士○太和疑作元和

唐書卷八十三考證

卷八十三

○大球孫升承  
○公主並孫士  
○孫升承  
○孫升承

○孫升承  
○孫升承

卷八十三



唐書卷八十四

宋 端 明 殿 學 士 宋 祁 撰

列傳第九

李密

李密字玄邃一字法主其先遼東襄平人曾祖弼魏司徒賜姓徒何氏入周爲太師魏國公祖暉邢國公父寬隋上柱國蒲山郡公遂家長安密趣解雄遠多策略散家貲養客禮賢不愛藉以蔭爲左親衛府大都督東宮千牛備身額銳角方瞳子黑白明澈煬帝見之謂宇文述曰左仗下黑色小兒爲誰曰蒲山公李寬子密帝曰此兒顧眄不常無入衛宅日述諭密曰君世素貴當以才學顯何事三衛間哉密大喜謝病去感厲讀書聞包愷在緱山往從之以蒲韉乘牛挂漢書一帙角上行且讀越國公楊素適見于道按轡躡其後曰何書生勤如此密識素下拜問所讀曰項羽傳因與語奇之歸謂子玄感曰吾觀密識度非若等輩玄感遂傾心結納嘗私自謂密曰上多忌隋曆且不長中原有一日警

公與我孰後先密曰決兩陣之勝噫嗚咄嗟足以警敵我不如公擊天下英雄  
馭之使遠近歸屬公不如我大業九年玄感舉兵黎陽遣人入關迎密密至謀  
曰今天子遠在遼左去幽州尚千里南限鉅海北阻彊胡號令所通惟榆林一  
道爾若鼓而入薊直扼其喉高麗抗其前我乘其後不旬月齎糧竭舉麾召之  
衆可盡取然後傳檄而南天下定矣上計也關中四塞之地彼留守衛文昇易  
人耳若徑行勿留直保長安據函嶺東制諸夏是隋亡襟帶我勢萬全中計也  
若因近趣便先取東都頓兵堅城下不可以勝負決下計也玄感曰公之下計  
乃吾上策今百官家屬皆在洛當先取之以搖其心且經城不拔何以示武密  
計不行玄感至東都所戰必克自謂功在旦暮既獲內史舍人韋福嗣遂任之  
故謀不專密福嗣恥見執策議皆持兩端密揣其貳謂玄感曰福嗣窮爲我虜  
志在觀望公初舉大事姦人在側事必敗請斬以徇不從密謂所親曰玄感好  
反而不圖勝吾屬虜矣福嗣果遁去會左武侯大將軍李子雄得罪傳送行在  
道殺使者奔玄感勸舉大號玄感問密密曰昔張耳諫陳勝自王荀彧止魏武

求九錫皆見疑外今密將無類之乎然阿諛順旨非義士也且公雖屢勝而郡縣未有應者東都尙彊救兵踵來公當率精甲身定關中奈何亟自帝玄感笑而止及隋軍至玄感曰策安決密曰元弘嗣方戍隴右可陽言其反使迎我因引軍西從之至陝欲圍弘農宮密曰今給衆入關機在速而追兵踵我若前不得據險退無所守何以共完玄感不聽留攻三日不能拔引去至闔鄉追及而敗密羸行入關爲邏所獲與支黨護送帝所密謂衆曰吾等至行在且蒞醢今尙可以計脫何爲安就鼎鑊衆然之乃令出所有金示監使曰卽死幸報德使者顧金禁漸弛益市酒飲笑謹譁守者懈密等遂夜亡去抵平原賊郝孝德不見禮去之淮陽歲飢削木皮以食變姓名爲劉智遠教授諸生自給鬱鬱不得志哀吟泣下人有告太守趙佗者佗捕之遁免往依媚壻雍丘令丘君明轉匿大俠王季才家爲吏迹捕復亡去時東郡賊翟讓聚黨萬人密因介其徒王伯當以策干讓曰今主昏於上人怨於下銳兵盡之遼海和親絕於突厥南巡流連空棄關輔此實劉項挺興之會足下資豪傑士馬精勇指罪誅暴爲天下先

楊氏不足亡也讓由是加禮遣說諸賊至輒下因爲讓計曰今稟無見糧難以持久卒遇敵其亡無時不如取滎陽休兵館穀待士逸馬肥乃可與人爭利讓聽之遂破金隄關徇滎陽諸縣皆下滎陽太守楊慶河南討捕大使張須陁合兵討讓讓素憚須陁欲引去密曰須陁健而無謀且驟勝易驕吾爲公破之讓不得已陣而待密率驍勇常何等二十人爲游騎伏于丘莽間須陁素輕讓引兵搏之讓少却伏發與游軍乘之遂殺須陁十三年讓分兵與密別爲牙帳號蒲山公密持軍嚴雖盛夏號令士皆若負霜雪然戰得金寶盡散之繇是人爲用復說讓曰今羣豪競興公宜先天下攘除羣凶寧常剽奪草間求活哉若直取興洛倉發粟以振窮乏百萬之衆一朝可附霸王之業成矣讓曰僕起鄙隴志不及此須君得倉更議之二月密以千人出陽城北踰方山自羅口拔興洛倉據之獲縣長柴孝和開倉賑食衆繼屬至數十萬隋越王侗遣將劉長恭房勣討密又令裴仁基統兵出成臯西密乃爲十隊跨洛水抗東西二軍令單雄信徐世勣王伯當騎爲左右翼自引麾下急擊長恭等破之東都震恐衆保太

微城臺寺俱滿讓等乃推密爲主建號魏公鞏南設壇場卽位刑牲歃血改元永平大赦其文移稱行軍元帥魏公府以讓爲司徒邴元貞左長史房彥藻右長史楊德方左司馬鄭德韜右司馬單雄信左武侯大將軍徐世勳右武侯大將軍祖君彥記室城洛口周四十里居之命護軍將軍田茂廣造雲旛三百具以機發石爲攻城械號將軍礮進逼東都燒上春門四月隋虎牢將裴仁基淮陽太守趙佗降長白山賊孟讓以所部歸密以仁基爲上柱國與讓率兵二萬襲回洛倉守之入都城掠居人火天津橋隋出軍乘之仁基等敗還保鞏司馬楊德方戰死密自督衆三萬破隋軍於故城復得回洛倉俄而德韜死乃以鄭頰爲左司馬鄭虔象右司馬諸賊帥黎陽李文相洹水張昇清河趙君德平原郝孝德皆歸密因襲取黎陽倉永安大族周法明舉江黃地附之齊郡賊徐圓朗任城大俠徐師仁來歸密令幕府移檄州縣列煬帝十罪天下震動護軍柴孝和說密曰秦地阻山帶河項背之亡漢得之王今公以仁基壁回洛翟讓保洛口公東鎧倍道趨長安百姓誰不郊迎是征而不戰也衆附兵彊然後東向

指撝豪傑天下廓清無事矣令遲之恐爲人先密曰僕懷此久顧我部皆山東人今未下洛安肯與我偕西且諸將皆羣盜不相統一敗則掃地矣遂止是時隋軍益出密負銳急與之礮中流矢臥營中隋軍乘之密衆潰棄倉守洛口高祖起師太原密自謂主盟遣將軍張仁則致書于帝呼爲兄請以步騎會河內帝覽書笑曰密陸梁不可折簡致之吾方定京師未能東略若不與是生一隋密適爲吾守成辜拒東都兵使不得西更遣勦將莫如密吾寧推順使驕其志我得留撫關中大事濟矣令記室溫大雅作報書厚禮尊讓密大喜示其下曰唐公見推顧天下無可慮者遂專事隋九月遣將李士才將兵十二萬攻隋鷹揚郎將張珣河陰舉之珣極罵不屈死齊方士徐鴻客上書勸密因士氣趨江都挾帝以令天下密異其言具幣邀之已亡去煬帝遣王世充選卒十萬擊密世充營洛西戰不利更陳洛北登山以望洛口密引度洛與世充戰密兵多騎與長槊而北薄山地隘騎不得騁世充多短兵盾積蹙之密軍卻世充乘勝進攻密月城密還洛南引而西突世充營世充奔還師徒多喪孝和溺死洛水

密哭之慟自是大小六十餘戰翟讓部將王儒信憚密威望勸讓自爲大家宰總乘衆務收密權讓兄寬亦曰天子當自取何乃授人密聞之與鄭頰陰圖讓會世充兵又至讓出拒少退密馳助之戰石子河世充走明日高會饗士讓至密所密令房彥藻引其左右就別帳飲密出名弓示讓讓挽滿遣劍士蔡建從後擊之并殺其兄姪及儒信密馳入讓壁慰諭士無敢動者以徐世勳單雄信王伯當分統其兵隋將楊慶守滎陽因說下之世充夜襲倉城密伏甲殪其衆義寧二年世充復營洛北爲浮梁絕水以戰密以千騎迎擊不勝世充進薄其壘密提敢死士數百邀之世充大潰士爭橋溺死者數萬洛水爲不流殺大將六人獨世充脫會夜大雨雪士卒僵死且盡密乘銳拔偃師修金墉城居之有衆三十萬又與東都留守韋津戰上春門執津於陣將作大匠宇文愷子儒童河南留守職方郎柳續河陽都尉獨孤武都河內郡丞柳燮皆降於是海岱江淮間爭響附竇建德朱粲楊士林孟海公徐圓朗盧祖尙周法明等悉上表勸進府官屬亦請之密曰東都未平且勿議五月越王侗稱帝六月宇文文化及擁

兵十餘萬至黎陽侗遣使授密太尉尙書令東南道大行臺行軍元帥魏國公令平化及而後入輔密受之乃引兵東進化及黎陽密知化及乏食利速戰乃持重以老其兵使徐世勳保黎陽倉化及攻不可下密與隔水陣遙謂化及曰公家本戎隸破野頭爾父子兄弟受隋恩至妻公主上有失德不能諫又虐弑之冒天下之惡今安往能卽降尙全後嗣化及默然良久乃瞋目爲鄙語辱密密顧左右曰此庸人圖爲帝吾當折箠驅之乃以輕騎五百焚其攻具火終夜不滅度化及糧盡乃僞與和化及喜使軍恣食旣而密饋不至乃寤遂大戰童山下密中矢頓汲縣堅壁化及勢窮掠汲郡趣魏縣其將陳智略張童仁等率所部兵歸密前後相踵初化及留輜重東郡遣所署刑部尙書王軌守之至是軌舉郡降密由是引而西遣使朝東都執弑逆人于弘達獻於侗侗召密入朝至温聞世充殺元文都乃止遂歸金墉拘侗使不遣初密旣殺翟讓心稍驕不卹士素無府庫財軍戰勝無所賜與又厚撫新集人心始離民食興洛倉者給授無檢至負取不勝委於道踐蹂狼扈密喜自謂足食司倉賈潤甫諫曰人國



本食人天今百姓飢捐暴骨道路公雖受命然賴人之天以固國本而稟取不節敖庾之藏有時而餽粟竭人散胡仰而成功不聽徐世勳數規其違密內不憲使出就屯故下苟且無固志初世充乏食密少帛請交相易難之邴元真好利陰勸密許焉後世充士飽降者益少密悔而止武德元年九月世充悉衆決戰先以騎數百度河密遣迎戰驍將十餘人皆被創返明日密留王伯當守金墉自引精兵出偃師北阻邙山待之密議所便裴仁基曰世充悉勁兵來東都必虛請選衆二萬向洛世充必自拔歸我整軍徐還兵法所謂彼歸我出彼出我歸以疲之也密眩於衆不能用仁基擊地嘆曰公後必悔遂出兵陣世充陰索貌類密者使縛之旣兩軍接埃霧囂塞世充軍江淮士出入若飛密兵心動世充督衆疾戰使索類密者過陣諫曰獲密矣士皆呼萬歲密軍亂遂潰裴仁基祖君彥皆爲世充所禽偃師劫鄭頰叛歸世充密提衆萬餘馳洛口將入城邴元真已輸款世充潛導其軍密知不發期世充度兵半洛水掩擊之候騎不時覺比出世充絕河矣卽引騎遁武牢元真遂降衆稍散密將如黎陽或曰向

殺翟讓世勳傷幾死瘡猶未平今可保乎時王伯當棄金墉屯河陽密輕騎歸之謂曰敗矣久苦諸君我今自刎以謝衆伯當抱密慟絕衆皆泣莫能仰視密復曰幸不相棄當共歸關中密雖無功諸君必富貴掾柳燮曰昔盆子歸漢尙食均輸公與唐同族雖不共起然遏隋歸路使無西故唐不戰而據京師亦公功也密又謂伯當曰將軍族重豈復與孤俱行哉伯當曰昔蕭何舉宗從漢今不昆季盡行以爲媿豈公一失利輕去就哉雖隕首穴胷所甘已左右感動遂來歸初密建號登壇疾風鼓其衣幾仆及卽位狐鳴於旁惡之及將敗鞏數有回風發於地激砂礫上屬天白日爲晦屯營羣鼠相銜尾西北度洛經月不絕及入關兵尙二萬高祖使迎勞冠蓋相望密大喜謂其徒曰吾所舉雖不就而恩結百姓山東連城數百以吾故當盡歸國功不滅竇融豈不以台司處我及至拜光祿卿封邢國公殊怨望帝嘗呼之弟妻以表妹獨孤氏後禮薄執政者又求賄滋不平因朝會進食謂王伯當曰往在洛口嘗欲以崔君賢爲光祿不意身自爲此未幾聞故所部將多不附世充者高祖詔密以本兵就黎陽招

撫故部曲經略東都伯當以左武衛將軍爲密副馳驛東至稠桑驛有詔復召密密大懼謀叛伯當止之不從乃曰士立義不以存亡易慮公顧伯當厚願畢命以報今可同往死生以之然無益也乃簡驍勇數十人衣婦人服戴幕羅藏刀裙下詐爲家婢妾者入桃林傳舍須臾變服出據其城掠畜產趣南山而東馳告張善相以兵應己熊州副將盛彥師率步騎伏陸渾縣南邢公岷之下密兵度橫出擊斬之年三十七伯當俱死傳首京師時徐世勳尙爲密保黎陽帝遣使持密首往招世勳世勳表請收葬詔歸其尸乃發喪具威儀三軍縞素以君禮葬黎陽山西南五里墳高七仞密素得士哭多歐血者邴元真之降也世充以爲行臺僕射鎮滑州密故將杜才幹恨其背密僞以兵歸之斬取其首祭密冢已乃歸國

單雄信曹州濟陰人與翟讓友善能馬上用槍密軍中號飛將偃師敗降世充爲大將秦王圍東都雄信拒戰槍幾及王徐世勳呵之曰秦王也遂退後東都平斬洛渚上

祖君彥齊僕射孝徵子博學彊記屬辭瞻速薛道衡嘗薦之隋文帝帝曰是非  
殺斛律明月人兒邪朕無用之煬帝立尤忌知名士遂調東都書佐檢校宿城  
令世謂祖宿城負其才常鬱鬱思亂及爲密草檄乃深斥主闕密敗世充見之  
曰汝爲賊罵國足未君彥曰跽客可使刺由但愧不至耳世充令撲之旣困臥  
樹下世充已自欲盜隋中悔命醫許惠照往視之欲其蘇郎將王拔柱曰弄筆  
生有餘罪乃蹙其心卽死戮尸於偃師

贊曰或稱密似項羽非也羽興五年霸天下密連兵數十百戰不能取東都始  
玄感亂密首勸取關中及自立亦不能鼓而西宜其亡也然禮賢得士乃田橫  
徒歟賢陳涉遠矣噫使密不爲叛其才雄亦不可容於時云

唐書卷八十四考證

李密傳邴元貞左長史房彥藻右長史○舊書房彥藻爲左長史邴元貞爲右長史

密自謂主盟遣將軍張仁則致書于帝呼爲兄弟帝令記室溫大雅作報書云云

○臣德潛

按此密棄倉守洛口時事也時煬帝尙在江都舊書作義寧二年事互異

唐書卷八十四考證

Vertical columns of text, likely bleed-through from the reverse side of the page. The text is mostly illegible due to fading and bleed-through.

唐書卷八十五

宋 端 明 殿 學 士 宋 祁 撰

列傳第十

王竇

王世充字行滿祖西域胡號支頽耨後徙新豐死其妻與霸城人王粲爲庶妻  
頽耨子收從之冒粲姓仕隋歷懷汴二州長史生世充豺聲卷髮忌刻深阻涉  
書傳喜兵法通龜策推步以蔭爲左翊衛遷御府直長兵部員外郎從楊素北  
伐爲幽州長史大業初爲民部侍郎善占對習法敢舞文上下人或辨駁世充  
以口舌緣飾衆知其非亦不能屈也出爲江都贊治遷郡丞煬帝數南幸世充  
善伺帝顏色阿意順旨性機巧飾臺沼陰奏遠方珍物以媚帝帝愛昵之拜江  
都通守兼知宮監事世充觀隋政方亂而江左浮剽易動乃陰結豪傑有繫獄  
者皆撓法貸減以樹私恩楊玄感反吳人朱燮晉陵人管崇起江南應之兵十  
餘萬隋將吐萬緒魚俱羅討之不克世充以偏將募江都萬人頻擊破之每捷

必歸功於下虜獲盡推與士卒故人爭爲效由是功最多大業十年齊賊孟讓轉寇諸郡至盱眙世充拒之保都梁山列五壁不戰羸兵以示弱讓笑曰世充文法吏安知兵吾今生縛之鼓行下江都矣時百姓皆入保野無所掠讓衆餒又苦五壁閉道不得南卽分兵圍之世充數戰陽不利走壁讓益驕數日稍分其下南略裁留兵足圍壁世充知賊懈夜夷竈撤幕爲方陣外向毀垣而出奮擊大破之讓以數十騎去斬首萬級虜十餘萬人煬帝以世充有將帥略復委捕諸盜所向輒定會突厥圍帝鴈門世充悉發江都兵赴難詐爲可喜事以邀聲譽在軍蓬首垢面日夜悲泣不釋甲臥必席藁帝以爲忠愈屬信之厭次賊格謙兵十餘萬屯豆子航太僕卿楊義臣殺謙世充討其餘黨夷之進擊賊盧明月於南陽俘係數萬還帝自持酒爲勞世充啓帝江淮良家女願備後廷無繇進帝喜令閼端麗者以庫貲爲聘費不可校署計簿云勅別用有司不敢聞具舟送東都宮會道路剽奪使者苦之或沈舟亡去世充屏不奏李密逼東都詔世充爲將軍以兵屯洛口大小百餘戰無大勝負詔卽拜右翊衛將軍趣破



賊十四年世充引軍與密戰洛南有氣若城壓其營世充大敗衆幾盡走保河陽自繫獄請罪於越王侗侗以書慰勉賜金帛安之召還洛哀亡散得萬人屯含嘉城畏縮不敢出會江都弒逆羣臣奉侗爲帝以世充爲吏部尙書封鄭國公字文化及擁兵北還侗聽內史令元文都盧楚等謀以重官畀李密使討賊若化及破而密兵亦疲乘其弊可得志乃遣使以太尉尙書令卽軍中拜密趣兵北討密稱臣奉制引兵從化及黎陽戰勝來告衆大悅世充獨謂其下曰文都等刀筆才必爲密禽且我軍與賊戰多殺其父子兄弟一旦爲之下吾屬無類矣以此言激衆文都等聞大懼侗欲以文都爲御史大夫世充不許曰嘗與公等約左右僕射尙書令御史大夫留待勳舊今各欲得則流競開矣何以共守文都憾焉潛與楚謀因世充入殿伏甲殺之納言段達庸怯畏不果馳告世充世充夜以兵襲含嘉門圍宮城右武衛大將軍皇甫無逸等遣將費曜田闍拒戰太陽門曜敗世充入之無逸以單騎遁收楚殺之時紫微宮尙閉世充扣門給侗曰元文都等欲執陛下降李密臣不反誅反者耳段達執文都送世充

殺之世充悉遣腹心代衛士然後入謝曰文都楚無狀規相屠戮臣急爲此非敢它伺與之盟進拜尚書左僕射總督內外諸軍事乃去舍嘉城居尚書省專宰朝政以其兄世暉爲內史令居禁中子弟皆將兵分官吏爲十頭以主軍政未幾李密破化及還屯金墉勁兵良馬多死世充欲擊之恐士心未一乃謀以鬼動衆令德陽門衛張永通言夢人謂己曰我周公能以兵助討密世充白伺立祠洛旁使巫宣言周公令急擊密有大功不然兵且疫世充下皆楚人信妖遂請戰乃簡精卒二萬騎二千跨洛水爲三橋以度兵密軍偃師北山新破敵有輕世充心不設壁壘世充夜遣二百騎蔽山伏因秣馬蓐食遲明薄之密陣未成伏兵上北原乘高馳下壓其營縱焚廬落密衆大潰降其將張童仁陳智略進拔偃師初密得世充兄世偉及子女應於化及軍囚之至是皆歸世充兵次洛口密長史邴元真司馬鄭虔象以城降悉收美人寶貨而還密以數十騎跳奔於是世充自爲太尉尚書令加黃門印綠綬綬以尚書省爲府置官屬乃設三榜於府外其一求文學堪濟世務者其一武幹絕衆推鋒陷陣者其一能

治冤抑不申者繇是上書陳事日數百皆慰勞省接雖吏卒必飾詞誘納而世  
充素詭妄不能讎其語士大夫遂貳初殺文都欲詭衆取信乃請事侗母劉太  
后爲假子至是加號聖感太后散騎常侍崔德本曰此王莽文母何異乎後食  
侗前得嘔疾疑見毒遂不復朝以將張績董濬衛宮城武德二年矯侗詔假黃  
鉞相國總百揆封鄭王授九錫冕十有二旒建天子旌旗金根車駕六馬備五  
時副車旄頭雲罕舞八佾設宮縣出入警蹕術士桓法嗣自言能決讖乃上孔  
子閑房記畫男子持一竿驅羊狀因說世充曰隋楊姓也於文干一爲王王處  
羊後大王代隋之符又陳莊周人間世得充符二篇曰上下篇與大王名協明  
受符命德被人間爲天子也世充喜曰天命也拜受之以法嗣爲諫議大夫又  
羅取飛鳥書符命於帛繫鳥頸縱之有彈捕得鳥而獻者亦拜官諷百官勸進  
時納言蘇威老就第世充以威隋大臣有素望每表必署威名使段達等脅侗  
曰天命不常今鄭王功德甚盛請揖讓用堯舜故事侗怒曰天下者高祖天下  
若隋德未究此言不可發必天命遂改尙何禪公非先帝舊臣乎朕何賴達等

流涕世充又詐曰天下未定須鎮以長君待天下安則復子明辟四月矯侗策禪位幽侗於含涼殿猶三讓遣諸將以兵清宮世充襲戎服法駕導鼓吹入宮每歷一門從者必呼至東上閣更袞冕卽正殿僭位建元開明國號鄭乃封兄世衡爲秦王世偉楚王世憚齊王諸族屬以次封拜以子玄應爲皇太子玄恕爲漢王世充每聽朝決政誨喻言語諄復百緒以示勤篤百司奏事者聽受爲疲出輕騎無警蹕游歷衢肆行者但止立徐謂百姓曰故時天子居九重在下之情無絲察世充非貪位者本救時耳正若一州刺史事皆親覽當與士人共議之恐門衛有禁無以盡通令止順天門外置坐廳事又詔西朝堂聽冤訴東朝堂延諫者絲是章牘填委觀省不暇後亦不能復出五月裴仁基與其子行儼及宇文儒童崔德本等謀劫世充復立侗不克夷三族六月鳩殺侗以絕衆望世充率衆東徇地至滑以兵臨黎陽時黎陽爲竇建德守故建德亦破世充殷州以報其役三年下書大赦築練兵臺於伊闕守將羅士信豆盧達稍稍歸國世充顧下多背己乃峻誅暴禁以威之戶一人逃家無少長皆坐父子兄弟

夫婦許相告免令伍伍相保一家叛舉伍誅樵牧出入皆爲限公私不聊生遣臺省官督十二郡營田行者自謂仙去以宮城爲大獄意所猜惡必收繫其人內家屬宮中或命將亦質其孥乃遣旣而囚質且萬口食不足餓死者日數十七月高祖詔秦王率兵攻之至新安屯堡多下敗世充於慈澗城八月王陳兵青城宮世充悉精兵來拒隔澗言曰隋失其國天下分崩長安洛陽各有分地吾常自守不敢西顧熊穀二州在度內不取敦鄰好也今王遠涉吾地越三嶠饋糧千里勤師遠出將何求王曰四海之人皆承唐正朔獨公迷不復東都士民來請師陛下重違我是以來公若降富貴可保必拒我勉之無多言世充約割地不許潁州總管田瓚請舉山南二十五郡歸九月王君廓進拔轅轅徇地至管城河南州縣以次降定始竇建德與世充隙至是建德遣使結好并陳赴援意世充遣兄子琬內史令長孫安世報且乞師四年二月青城宮守將以宮降王進保之世充張兵出方諸門臨穀水以戰王陣北邛令屈突通步士五千踰水擊之兵接王以騎決戰世充排瓚兵殊死鬪自辰及午乃潰俘斬八千人

王傳城塹而守之世充糧且盡人相食至以水汨泥去礫取浮土糲米屑爲餅  
民病腫股弱相藉倚道上其尙書郎盧君業郭子高等皆餓死御史大夫鄭頌  
丐爲浮屠世充惡其言殺之然氣竭但嬰城須建德之救五月王禽建德并獲  
王琬長孫安世俘示東都城下且遣安世入言敗狀世充惶惑將突圍出保襄  
漢謀於諸將皆不答遂率將吏降軍門王受之以屬吏陳兵入城發府庫賚將  
士其黃門侍郎薛德音以移檄慢逆崔弘丹造弩多傷士前誅之又收段達楊  
汪孟孝義單雄信楊公卿郭士衡郭什柱董濬張童仁朱粲王德仁等斬洛渚  
上以世充歸長安高祖數其罪世充曰計臣罪不容誅但秦王許臣以不死乃  
赦爲庶人與其族徙于蜀將行爲羽林將軍獨孤修德所殺初修德父機嘗仕  
越王侗世充旣篡謀歸唐爲所屠者也高祖免修德官子玄應兄世偉在道謀  
反伏誅世充篡凡三年滅

竇建德貝州漳南人世爲農自言漢景帝太后父安成侯充之苗裔材力絕人  
少重然許喜俠節鄉人喪親貧無以葬建德方耕聞之太息遽解牛與給喪事

鄉黨異之盜夜劫其家建德立戶下盜入擊三人死餘不敢進請其尸建德曰可投繩係取之盜投繩建德乃自縻使盜曳出躍起捉刀復殺數人繇是益知名爲里長犯法亡會赦歸久之父卒里中送葬千餘人所贈予皆讓不受隋大業七年募兵伐遼東建德補隊長方如軍會邑人孫安祖盜羊爲縣令捕劾笞辱安祖刺殺令亡抵建德建德陰舍之時山東饑羣盜起乃謀曰往文皇帝時天下盛彊發百萬衆伐遼東猶爲所敗今水潦爲災民力凋敝主上不是恤而親駕臨遼且往歲西征十不一返今創夷未平又重發兵人情危駭易以搖動丈夫不死當建功于世渠爲亡命虜乎我聞高雞泊廣袤數百里葭藪阻奧可以違難承間竊出推埋掠斂足以自資因得聚豪傑且觀時變以就大計安祖然之建德爲招亡兵及民無產者數百使安祖率之入高雞爲盜安祖號摸羊公時鄆人張金稱亦結衆萬餘依河渚間移人高士達兵千餘屯清河鄆上諸盜往來漳南者多剽殺人焚鄉聚獨不入建德閭郡縣意建德與賊通捕族其家建德至河間聞家屠滅卽率麾下二百人亡歸士達士達自稱東海公以建

德爲司兵安祖爲金稱所殺其下數千人歸建德衆益盛至萬人猶保高難泊然傾身接物其執苦與士卒均由是能致人死力十二年涿郡通守郭絢率兵萬人討士達士達自以智略不及建德乃推爲軍司馬以兵屬焉建德旣統衆思用奇厭伏羣盜乃請士達守輜重自以精兵七千迎絢詐爲亡狀士達取所虜陽言建德妻子殺之建德遺絢書約降請前驅執賊自效絢信之引兵從建德至長河界欲與盟兵懈不設備建德襲殺其軍數千人獲馬千匹絢以數十騎去追斬於平原獻首士達威振山東隨遣太僕卿楊義臣討破張金稱於清河殘黨畏誅復屯嘯歸建德義臣乘勝欲遂入高難泊窮剗根穴建德謂士達曰隋善將獨義臣耳新破金稱其鋒不可當宜引兵避之彼欲戰不得軍老食乏乘之可有功士達不納留建德守壁身將兵逆戰置酒享士建德聞曰東海公未捷遽自矜大禍至不日矣隋兵勝必長驅而來吾不能獨支乃留衆保壁帥銳士據險待後五日義臣斬士達於陣追北薄壘守兵潰建德不能軍以百餘騎走饒陽饒陽無備因取之義臣已殺士達謂餘黨不足憂引去故建德得



還平原收士達士死皆葬焉爲士達發喪軍皆縞素招潰卒得數千人軍復振  
自稱將軍初佗盜得隋官及士人必殺之唯建德恩遇甚備引故饒陽長宋正  
本爲客尊任之參決軍議隋郡縣吏多以地歸之勢益張兵至十餘萬上谷賊  
王須拔自號漫天王以兵略幽州戰死其下魏刀兒號歷山飛壁深澤衆十萬  
建德以計襲取之并有其地十三年正月築壇場於河間樂壽自立爲長樂王  
十四年五月更號夏王建元丁丑署官屬分治郡縣七月隋右翊衛將軍薛世  
雄督兵三萬討之屯河間七里井建德以勁兵伏旁澤中悉拔諸城僞遁世雄  
以爲畏稍弛備建德率敢死士千人襲之會大霧晝冥跬不可視隋軍驚遂潰  
相騰藉死者如丘世雄引數百騎亡去盡得其衆獲河間丞王琮勞遣之琮復  
嬰城建德進攻未下而河間食盡聞煬帝遇弒琮率吏發喪乘城大臨建德遣  
使入弔琮因請降建德爲退舍飭饌具琮率郡屬素服面縛軍門建德親釋徽  
纆與言隋之亡琮伏哭極哀建德亦爲泣麾下或言河間久拒守多殺士今力  
窮而下請烹之建德曰琮誼士也吾方旌擢以勵事君者且往爲盜可妄殺人

今將安百姓定天下而害忠臣乎卽令其軍曰與琮隙者敢輒搖罪三族乃授琮瀛州刺史始都樂壽號金城宮備百官準開皇故事冬至大會僚吏有五大鳥集其宮羣鳥從之又宗城人獻玄圭一景城丞孔德紹曰昔天以是授禹今瑞與之侔國宜稱夏建德然之改元五鳳以德紹爲內史侍郎武德元年宇文化及至魏縣建德謂其納言宋正本及德紹曰吾隋民也隋吾君也今化及殺之大逆不道乃吾讎欲爲天下誅之何如正本等曰大王奮布衣起漳南隋之列城莫不爭附者以能仗順扶義安四方也化及爲隋姻里倚之不疑今戕君而移其國讎不共天請鼓行執其罪建德善之卽引兵討化及連戰破之化及保聊城乃縱撞車機石四面乘城拔之建德入先謁蕭皇后語稱臣執宇文智及楊士覽元武達許弘仁孟景等召隋文武官共臨斬之梟首轅門囚化及并其子載以檻車至大陸縣斬之建德性約素不喜食肉飯脫粟加蔬具妻曹未嘗衣紈綺及爲王妾侍裁十數每下城破敵貲寶並散賚將士至是得隋宮人尙千數悉放去其文武驍果尙萬餘各聽所之乃以誅化及報越王侗侗封之

夏王遂號大夏以隋黃門侍郎裴矩爲尙書右僕射兵部侍郎崔君肅爲侍中少府令何稠爲工部尙書餘隨才署職委以政事有願往關中及東都者恣聽不留仍給道里費以兵護出于境二年陷邢趙滄三州復陷冀州執刺史麴稜赦之復以爲刺史八月陷洛州虜刺史袁子幹遂遷都焉更號萬春宮使人如灌津祠先墓置守冢三十家又遣使朝侗因與王世充結歡北聘突厥士馬益精雄俄而世充廢侗乃絕之始建天子旌旗出入警蹕書稱詔追諡隋煬帝爲閔帝以齊王暕子政道爲鄭公義成公主在突厥遣使迎蕭后建德自將千餘騎送之并獻化及首未幾連突厥侵相州刺史呂珉死之進攻衛州執河北大使淮安王神通同安長公主黎陽守將李世勣釋之復使世勣守黎陽館王公主饋以客禮滑州刺史王軌爲奴所殺奴以首奔建德建德曰奴殺主大逆納之不可不賞賞逆則廢教將焉用爲命斬奴而返軌首滑人德之遂降齊濟二州亦降兗賊徐圓朗聞風送款三年世勣自拔歸國吏白建德誅其父建德曰世勣唐臣不忘其主忠也父何罪釋不問高祖遣使修好建德卽以公主等歸

京師嘗執趙州刺史張志昂邢州刺史陳君賓大使張道源等將殺之國子祭酒凌敬諫曰夫犬吠非其主彼悉力堅守以窮就禽仗節士也今殺之無以勸建德怒曰我傳其城猶不下勞費士旅何可赦敬曰王之將高士興抗羅藝於易南兵未交士興卽降王以爲可乎建德悟卽釋之然其大將王伏寶數持兵功略在諸帥上或讒其反建德殺之伏寶臨死呼曰我無罪王何信讒自刈左右手乎後戰數不利九月建德自帥師圍幽州爲羅藝所敗藝乘勝襲其營建德陣營中填塹而出敗藝衆進薄其城不能拔乃還濟陰賊孟海公兵三萬據周橋城以掠河南建德自擊之會秦王伐東都其中書舍人劉斌獻說曰唐據關內鄭王河南夏有冀方此鼎足相持勢也今唐悉兵臨鄭出入二年鄭人日蹙二國兵不解唐彊鄭弱勢必舉鄭鄭滅則大夏有齒寒之憂爲大王計莫若援鄭使鄭抗其內我攻其外唐之兵必卻唐卻而鄭完然後徐觀其變鄭若可圖因而取之并二國兵乘唐師老長驅而西關中可遂有也建德曰善乃遣使聘世充與連和會世充亦自乞師卽令其臣李大師魏處繪來朝請解鄭圍

秦王留之不答四年建德克周橋虜海公留其將范願戍之悉發海公徐圓朗之衆并兵號三十萬救世充至滑州世充行臺僕射韓弘開城納之建德進逼元梁管三州皆陷遂屯滎陽運糧汴河西上舟相屬不絕壁成臯東原築營板渚遣使與世充約期又遺秦王以書三月王進據虎牢翌日以騎五百覘建德營設伏道側獨以數騎去賊營三里覺賊出騎追之王漸卻誘至伏所卒起奮擊賊騎驚引去追斬三百級獲其將殷秋石瓚乃報建德以書建德失二將又聞唐兵精得書猶豫頓六十日不敢西時世充弟世辯爲徐州行臺亦遣將郭士衡兵數千人從建德王遣王君廓以輕騎抄其饜執賊大將張清特建德懼人情攜駭其諸將又新破海公掠獲盈給日夜思歸凌敬說建德曰今唐以重兵圍東都守虎牢我若悉兵濟河取懷州河陽以重將戍之然後鳴鼓建旗踰太行入上黨傳檄旁郡進壺口以駭蒲津收河東地此上策也且有三利乘虛擣境師有萬全一也拓土得衆二也鄭圍自解三也建德將從之而王琬長孫安世日請兵西每言必流涕又陰齎金玉啗諸將以撓其謀衆乃曰凌敬書生

豈知戰建德乃謝曰今士心銳天贊我也師將大捷方用衆議不得如公言敬固爭建德怒命扶出其妻諫曰祭酒計甚善王盍用之夫自溢口道乘唐之虛連營漸進以取山北因招突厥西抄關中唐必還師自救鄭難紓矣今頓兵虎牢下徒自苦恐無功建德曰此非女子所知且鄭朝暮待吾來旣許之豈可見難而退且示天下不信五月建德自板渚出爲陣西薄汜南屬鵠山亘二十里鼓而前郭士衡爲游兵秦王登虎牢城望其軍按甲不戰曰賊起山東未嘗見大敵今度險士囂令不肅也逼城而陣有輕我心待其饑破之果矣日中建德士皆坐列渴爭飲意益怠王麾軍先登騎怒塵大漲乃率史大柰秦叔寶纏靡幟馳出賊陣後建德軍顧而驚遂大潰建德被重創竄牛口谷車騎將軍白士讓楊武威獲之傳而西斬長安市年四十九初其軍有謠曰豆入牛口勢不得久至是果敗建德妻與其左僕射齊善行以騎數百遁還洛州餘黨欲立其養子爲主善行曰夏王奄定河朔號爲威彊今一出不復非天命有歸哉不如委心請命無爲塗炭生民也遂分府庫散給將士令各解去善行乃與右僕射裴

矩行臺曹旦率官屬及建德妻奉山東地并傳國入璽來降建德起兵至滅凡六年

贊曰煬帝失德天醜其爲生人顛辜羣盜乘之如蝟毛而奮其劇者若李密因黎陽蕭銑始江陵竇建德連河北王世充舉東都皆磨牙搖毒以相噬螫其間亦假仁義禮賢才因之擅王僭帝所謂盜亦有道者本夫孽氣腥焰所以亡隋觸唐明德折北不支禍極凶殫乃就殲夷宜哉

唐書卷八十五





唐書卷八十五考證

竇建德傳十四年七月隋右翊衛將軍薛世雄督兵三萬討之○沈炳震曰是年五月高祖受禪隋已亡矣安得七月中隋復命將討賊耶當從舊書作十三年

武德元年字文化及至魏縣建德謂納言宋正本云云引兵討化及連戰破之

○臣德潛

按舊書武德二年字文化及僭號于魏縣建德討之綱目書夏王建德破字文化及于聊城誅之亦在二年新書應誤

嘗執趙州刺史張志昂○舊書作張昂

唐書卷八十五考證